

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

48 pes

Namba 1,366

Wik i stat long Fonde Ogas 31, 2000

70t

Ol ripot long palamen

pes 2

Strong bilong mani i go antap

pes 3

Pengau Nengo em ekting Gavana

pes 4

SAPLIMEN

30 yia bilong Wantok niuepepa

16 pes ripot

PNG i ken planim rais, Zeming i tok

WENCESLAUS MAGUN i raitim

DEPUTI Praim Minista na Minista bilong Agrikalsa, Mao Zeming, i egensim wanpela ripot we i tok olsem: 'Menesing Dairekta bilong Trukai Industries Limited, Phil Franklin, i tok, Papua Niugini em i no gutpela kantri bilong ronim bisnis bilong rais.'

Plantu ol memba i no amamas long dispela hap toktok i kamap long wanpela bikman bilong Trukai Industries Limited, na i askim Mista Zeming long rausim Mista Franklin long kantri.

Mista Zeming i tokim Palamen olsem dispela tok Mista Franklin i mekim, sapos i tru long niuspepa, em i no tru.

Tasol em i tok rais i ken gro long Papua Niugini long ples i wet na ples i gat wara. Tasol Papua Niugini i no redi yet long planim rais long pasin bilong salim long ovasis maket long wanem ol pipel i nogat ol risoses na teknoloji yet long dispela taim.

Mista Zeming i tokaut long dispela taim em i bekim sampela askim i kam long memba bilong Mul Baya, Nobert Nagle long Palamen aste. Em i tok las mun insait long wanpela kibung opis bilong em i holim long Lae, ol i bin go lukluk raun long wanpela ples long Buam we i gat rais projek na tu ples bilong klinim rais long Bambu na ol memba na ol savemanmeri bilong gavman i lukim olsem rais i ken kamap gut tru long PNG.

Long dispela as, Mista Zeming i tok, Gavman bilong em wantaim Sir Mekere i pasim tok pinis olsem insait long 2001 baset, Gavman bai putim moa mani i go insait long Agrikalsa sekta. Tasol em i salensim wan wan ol memba long Palamen long helpim Gavman tu long skelim sampela mani insait long Rurel Eksen Program Fan bilong ol i go insait long baim ol mesin bilong klinim rais (rais palpa mesin) na givim i go long ol pipel bilong ol, husat i go het long planim rais.

Mista Zeming i tok tu olsem Gavman bilong em wantaim Sir Mekere i gat bikpela laik na tingting long helpim ol pipel long ples.

Mista Zeming i bekim tu askim bilong memba bilong Wapenamanda, Masket langalio, husat i laik save sapos Gavman i kamapim sampela kain lo bilong helpim ol pipel long ples long planim rais bilong kaikai na i no bilong salim na tu sapos gavman i gat rekot bilong amas ol kumu na prut ol kampani i ronim bisnis insait long kantri i save baim long arapela kantri na salim long PNG taim PNG inap planim ol dispela kumu na prut.



• Tupela Tumbuan bilong Madang i kamaut long namba 6 Papua Niugini Tumbuan Mask festival long Madang las wiken.

Morobe Gavman rausim Sengero

YAKAM KELO i raitim

MOROBE Edministreta Ainea Sengero i sanap nau long mak bilong pinis long wok bihain long wanpela pepa bilong pinisim em long wok i pundaun pinis long opis bilong em long Tunde dispela wik.

Pepa bilong rausim em long wok (saspensen notis) i bin redi long Mande na Deputy Gavana Smith Cornelius i givim

Mista Sengero long dispela wik Mande tasol em i no bin go kisim. Mista Cornelius i makim Gavana Luther Wenge long givim dispela saspensen pepa bikos Gavana i stap long Mosbi long palamen miting.

Provinsal Eksekutiv Kaunsil (PEC) i bin holim wanpela bung long las wik Fraide Ogas 25, 2000 na kamap wantaim risolusen (strongim tok) long rausim Mista Sengero olsem Edministreta bilong provins. Bikpela toktok em Mista Sengero i bin givim ol krangki tok stia long ol provin-

sal lida. Sam Sawe i givim Mista Sengero wanpela wik long mekim ol toktok bilong em long dispela disisen bilong pinisim em long wok. Sapos Sam Sawe i skelim olsem ol toktok i no gutpela tumas, Sam Sawe bai mekim ripot i go long Praim Minista long mekim kamap long bung bilong Nesenel Eksekutiv Kaunsil (NEC) long pinisim kontrak bilong Mista Sengero na makim nupela Edministreta bilong Morobe provins.

Long nau yet, Sam Sawe i makim Willy Kokoba olsem ekting Edministreta na ol i makim Manasupe Zurenuoc na Benson

I go moa long pes 2

Nestlé MILO IKEN WOKIM GUTPELA SAMTING LONG YU

PLIS RIPOT

Mosbi:

WANPELA kriminel i dai, tupela i kisim bagarap na tupela i bin ronawe bihainim sutaut wantaim plis long Taurama long las wiken, ol plis ripot i tok.

Birua i bin kamap long taim ol raskol i hensapim wanpela man long Air Niugini Viles long Tu Mail, sutim em na kisim ka bilong em na draivim i go long baksait bilong Taurama Supamakot.

Bos bilong ol plis long Mosbi siti John Marru i tok faipwela raskol i bin laik hensapim ka bilong ol CIS tasol ol lain i bin gat gan na ol i wokim sutaut wantaim ol raskol ya.

Em i tok ol plis i go na ol i helpim ol CIS lain na skruim sutaut. Ol i ronim ol raskol i go olsem long Pot Mosbi Jenerel haus sik

Mista Marru i tok long sutaut ya, wanpela rasokl i dai, tupela i kisim bagarap na narapela tupela i bin ronawe.

Lae, Morobe:

Operesen Rot Sefti long Lae i mekim kirap nogut planti draiva taim ol plis i sekim ol ka na pulim planti bilong ol long sait rot bikos ol brukim sampela lo bilong trafik o ol ka i gat sampela bagarap long en na i no gutpela long ol i ron long rot.

Operesen bai i go het long tupela wik. Plis i tok ol i wokim dispela long traim daunim ol birua bilong ol ka long rot bikos Lae i stap long top lista insait long kantri wantaim mak bilong ol ka eksiden i stap antap tru.

Bos bilong ol plis long Lae Awan Sete taim em i tok tenkyu long ol lain husat i go pas long operesen ya olsem Dipatmen bilong Trensport na Sivil Aviesen, Plis, Moto Vikels Insurens kampani na Nesenel Rot Sefti Kaunsil i tok ol bai karimaut wankain operesen long ol arapela hap bilong kantri.

Mosbi:

Plis i ripotim olsem wanpela yangpela manki husat i gat 16 krismas i bin dai long las wiken bihain em i kapsaitim karasin na kukim em yet.

Bos bilong ol plis long Mosbi Inspekta John Marru i tok birua ya i bin kamap long Hoskem bihain long papamama i pasim manki long go long sios.

Westen Hailans:

Plis long Westen Hailans i karimaut wanpela wok painim long paia i bin kukim wanpela dabel klasrum long Minj long as wik Fraide.

Ol i bilip olsem paia ya i bin stat long klasrum na kukim klasrum bilong ol Gret 10 sumatin.

Ol Gret 10 sumatin nau i bungim hevi na ol i wok long skul aninit long ol diwai.

Ol papamama i wari na ol i askim ol palamen memba bilong ol na ol bisnis haus long givim helpim wantaim mani bilong bildim bek ol klasrum ya na ol pikinini i ken skul gut.

Balob, Lae:

Ol raskol i bin sutim tupela sumatin man long Balob Tisas Kolis long Lae las wik, plis ripot i tok. Tupela i no bin dai tasol ol bin kisim bagarap tasol.

Plis i tok ol raskol i bin sutim na kamapim bagarap long tupela sumatin taim ol bin opim dua na go ausait long lukluk ausait bihain wanpela sumatin i givim signal olsem em i stap long hevi. Dispela em taim ol raskol i bin hensapim em ausait.

Plis i tok moa long 30 raskol i haitim pes bilong ol na ol i katim banis bilong skul na go insait na stilim ol kaikai, ol samting bilong kuk wantaim bilong skul we pe bilong ol inap long K1,000.

Palamen nius wantaim WENCESLAUS MAGUN

Moa long 50 pipel i dai long Komoioyo ples


DETI wara i kilim moa long 50 pipel bilong Komoioyo ples insait long Wes Kikori eria bilong Gulf provins, Rijinel Mema bilong Guff, Riddler Kimave i tok.

Em i askim Minista bilong Helt long glasim dispela hevi na helpim ol pipel bilong em.

Minista bilong Helt Ludger Mond i tok Dipatmen bilong Enviromen na Konsevesen i karim aut wanpela wok painim long dispela hevi na i painim olsem ol wara kala bilong ol i yelo i gat poisin na ol pipel i noken dring.

Em i tok Mista Kimave i mas sindaun wantaim em na Minista bilong Enviromen na Konsevesen na ol i ken glasim wanem samting ol bai mekim long stretim dispela hevi.

BHP bai baim kompens-esen bilong bagarapim enviromen, Somare i tok



• Sir Michael Somare

GAVMAN i no inap larim BHP wanpela bikpela maining kampani bilong Ostrelia husat i gat sia long Ok Tedi Main long lusim kantri inap ol i baim olgeta kompensesen bilong bagarapim enviromen, Maining na Bogenvil Afeas Minista, Sir Michael Somare i tok.

Sir Michael i tokaut long dispela taim em i bekim askim bilong Gavana bilong Western Provins, Nobe Makmop, long Palamen long Tunde, husat i tok, bos bilong BHP, Paul Anderson, i tokaut olsem BHP i gat tingting long lusim wok bilong main long Ok Tedi maski de na taim bilong pasim main i no yet.

Sir Michael i tok sapos BHP i laik go orait ol i mas salim 52 pesen (%) sia bilong ol insait long Ok Tedi i go long Nesenel Gavman bai Gavman i ken salim dispela sia i go long husat ol arapela kampani i gat laik long kam kisim ples bilong ol.

Em i tok nau yet Nesenel Gavman i wok long paitim toktok wantaim ol bikman bilong BHP long dispela tingting.

Em i tok laip taim bilong Ok Tedi i luk olsem 10-pela moa ya yet na Nesenel Gavman i nogat tingting long pasim main.

Sir Michael i tok Nesenel Gavman i gat kontrak wantaim BHP, Inmet na ol Papagraun na olsem nogat wanpela samting inap kamap nating sapos ol dispela samting i no bihainim ol toktok insait long kontrak.

Pasin bilong Koloniel masta i wok long PNG i no gutpela, Benjamin i tok

MINISTA bilong Leba na Emploimen, Charlie Benjamin i tok, em i no laikim ol waitman i bihainim pasin bilong ol koloniel masta, sapos ol i wok insait long Papua Niugini.

Mista Benjamin i tokaut long dispela taim em i bekim sampela askim memba bilong Lagaip Pogera, Opis Papo, i askim long Palamen aste.

Mista Papo i sutim tok olsem i gat sampela waitman husat i bin wok olsem kiap bipo nau i wok long Pogera na Kutubu husat i bihainim yet pasin bilong ol koloniel masta.

Em i tok dispela i kamapim bruk pasin namel long ol papagraun long ol eria we ol bikpela risos projek i stap.

Long bekim ol dispela toktok, Mista Benjamin i tok, em bai salim ol wok manmeri bilong em i go long ol main eria na sekim sapos dispela ol toktok i tru.

Em i tok husat ol manmeri bilong arapela kantri i kam wok long PNG i gat kondisen bilong wok na sapos ol i no bihainim ol dispela kondisen, Gavman i gat olgeta rait long rausim ol i go bek long kantri bilong ol.

Embel bai sekim hevi bilong edministreta bilong Oro

MINISTA bilong Pablik Sevis, Philemon Embel i tok, em bai sekim ol wokmanmeri long opis bilong em long painim aut wanem samting i no stret na Gavman i no makim nupela edministreta bilong Oro Provins stat long 1995 i kam inap tude.

Mista Embel i tokaut long dispela bihain long Gavana bilong Oro, Slyvanus Siembo

Mista Siembo i givim tu strongpela

tok lukaut olsem Mista Embel i mas glasim dispela hevi na stretim insait long tupela wik.

Tasol Mista Embel i tok stat long 1995 i kam inap nau, Opis bilong Pablik Sevis i bin salim lista i gat nem bilong ol man husat Gavman i ting ol inap mekim wok olsem edministreta bilong Oro.

Tasol em i tok, olgeta taim ol i salim dispela lista i go, Gavman bilong Oro i no save makim

tripela kendidet insait long dispela lista na salim i kam bek long Gavman. Dispela i mekim na Gavman i no inap makim wanpela edministreta.

Em i tok i luk olsem Oro Provins Gavman yet i kamap wantaim lista bilong ol man ol yet i laikim bilong kisim wok olsem edministreta bilong Oro provins. Tasol Mista Embel i tok dispela em i no pasin bilong makim ol edministreta bilong wan wan provins.

Ol memba i givim las rispek long Alois Koki long Palamen

OLGETA memba long Palamen i givim las rispek bilong ol i go long memba bilong Pomio, Alois Koki, taim ol famili bilong em i bringim bodi bilong em i go long Palamen aste.

Mista Koki i bin dai long Tunde 22 Ogos bihain long em i bin sik long-pela taim.

Plantil ol lida i tok Mista Koki em i no man bilong mekim planti toktok tasol em man bilong wok tru.

Ol i tok tu olsem em i no man bilong kalap kalap long wanpela pati na i go long narapela pati.

Plantil lida i tok Mista Koki i bin sanap strong long Gavman i mas bringim sevis i go long ol pipel long ples na tu givim pawa bilong gavman i go long ol pipel long ples.

Ol lida i tok Mista Koki i bin go pas tu long pusim lo bilong ol Politikel Pati na Kendidet.

Brata bilong Mista Koki, na Gavana bilong Is Niubriten, Francis Koimanrea, i tenkim ol lida bilong Palamen, Spika, Klak, ol pipel bilong Pomio, na ol memba bilong Kivung Asosiesen long givim tok orait na ogenaisim bodi bilong Mista Koki long kam olgeta long Palamen.

Em i tok i tru Mista Koki i dai na go tasol em bai stap yet long pinisim ol wok brata bilong em i statim na i no pinisim.

Mista Koki i lusim bihain meri bilong em Pauline, 10-pela pikinini, 9-pela tumbuna, foapela brata na wanpela susa.

Morobe Gavman rausim Sengero

I kam long pes 1

Suwang olsem tupela kendidet tu bilong skelim long dispela sia bilong Edministreta. Mista Zurenuoc pastaim i bin tokim Gavana Wenge olsem em i nogat laik long kamap Edministreta.

Benson Suwang i no moa wok olsem pablik sevans bikos em i lusim wok long 1997 na sanap resis long nesenel ileksen. Mista Zurenuoc tasol wantaim Mista Kokoba i pablik sevans bikos tupela i wok yet long dipatmen.

Tasol insait ripot i tok olsem Morobe Gavman i no laik long pinisim o rausim Mista Sengero olgeta. Ol i laik askim NEC long givim wanpela bikpela wok long em olsem long Provinsal Afeas na Lokol Level Gavman Dipatmen o kamap wanpela embeseda bilong Papua Niugini long ovasis.

Ripot i tok tu olsem kontrak bilong Mista Sengero bai pinis long Julai 24, 2001 long neks ya. Olsem na ol i laik kain senis olsem pastaim na redi gut long taim Mista Sengero

i pinis long wok neks ya.

Mista Sengero i gat bikpela bilip olsem Morobe Gavana Luther Wenge yet i papa long go pas long dispela plen o muv bilong pinisim em long wok bilong em olsem Morobe Edministreta.

Insait ripot i tokaut olsem long mun Julai, wanpela PEC miting i bin kamap we Mista Sengero i stap long en. Tasol siaman bilong PEC, Gavana Wenge i askim Mista Sengero long lusim miting na go bikos ol bai toktok long ol politiks toktok. Na Gavana i tokim Mista Sengero olsem ol i no inap mekim wanpela toktok long em (Sengero). Tasol dispela i no tru bikos ol i pasim toktok long pinisim Mista Sengero pastaim long kontrak bilong em i pinis long Julai 24, 2001.

Insait ripot i tokaut moa olsem Mista Sengero i bin save long dispela plen long taim. Olsem na long Mande nait (Ogas 7) Mista Sengero wantaim sampela sapota bilong em i bin go long wanpela praivet klap we Gavana Wenge wantaim ol provinsal

siaman i stap long en na bungim ol. Em i kros wantaim na mekim sampela strongpela toktok long ol long dispela nait. Long Tunde moning, mosen bilong rausim em i kamap long floa bilong Tutumang.

Ripot i tok long dispela wik, BMS opis long Morobe hetkota i no bin op long Mande. Wanpela notis toksave stap we i tok BMS opis bai pas inap sampela taim. BMS i save lukautim ol pepa wok na sek bilong kisim mani. Ol bikman i traim long larim opis bilong BMS i op gen long Tunde.

Gavana Wenge i bekim olsem Mista Sengero i no bin sekim gut baset na tok klia long ol long mani i stap o nogat bilong go long fri skul fi sabsidi bikos dispela em provinsal gavman i vot long dispela disisen pinis long kamapim. Mista Sengero i tok em i orait tasol bihain i nogat mani long baset long dispela dispela fri edukesen sabsidi bilong ol skul. Dispela em as we ol i rausim Mista Sengero long en bikos em i no sekim gut wok bilong em na givim tok stret long Morobe provinsal gavman, pas bilong Mista Wenge i tokaut olsem.

WANTOK

All departments. Phone: 3252500 - Fax: 3252579

P. O. Box 1982, Boroko, NCD, Papua New Guinea.

Publishing Weekly, Wednesday, for Word Publishing Company Ltd.

Printed and Published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Ltd.

General Manager and Group Editor in Chief: Anna Solomon
Acting Advertising Manager: Jocko Oberleuter

Papers distributed by air throughout PNG. Available by air mail subscription within Papua New Guinea and overseas
Email address: word@global.net.pg

Advertising deadlines, Display bookings: Tuesday midday. Camera ready copy: Tuesday midday. Classified Advertising: Tuesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10% and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms and conditions are available at Word Publishing Company Ltd. and are set out in full on the reverse side of its official display Advertising Bookings form.

Strong bilong Kina i go antap long dispela yia, Sir Mekere i tok

WENCESLAUS MAGUN i raitim

STRONG bilong Kina i go antap long dispela yia bikos i gat kain kain as, Praitim Minista Sir Mekere Morauta i tok.

Em i tok strong bilong Kina i bin go antap long ol arapela mani we PNG i save mekim bisnis wantaim ol, insait long las 6-pela mun. Tasol em i tok long Julai, strong bilong Kina i bin kam daun, bikos long ol presa bilong baim ol samting long arapela kantri.

Em i tok namba wan samting i mekim strong bilong Kina i go antap em bikos PNG i gat moa saplai bilong mani bilong ol arapela kantri na PNG i no yusim tumas ol dispela mani long baim samting long ol arapela kantri.

Sir Mekere i tok long dispela yia, Intanesenel Monifori Fan (IMF) i tok tok orait long givim 115 milien US dola dinau bilong stap rere sapos PNG Gavman i laik yusim long baim ol samting long ol arapela kantri. Moa yet, Wol Beng (WB) i givim 90 milien US dola long PNG aninit long Straksurel Edjasmen Dinau na antap long dispela Gavman bilong Japan i givim 50 milien US dola na Gavman bilong Ostrelia i givim nara-

pela 80 milien US dola.

Em i tok narapela samting i mekim strong bilong Kina i stap antap em bikos Gavman bilong em i kamapim ol gutpela na strongpela monitori na fiskel polisi.

"Ol polisi bilong yumi i givim, insait long sotpela taim, bilip long ol gavman bilong ol arapela kantri, ol investa na ol bisnis manmeri long kantri na long ol arapela kantri," Sir Mekere i tok.

Em i tok long pinis bilong Disemba 1999 i go long pinis bilong Jun 2000, strong bilong Kina i go antap long 10 pesen (%) agens long US dola, 20 pese (%) agens long Ostrelia dola, na 14 pesen (%) agens long Japanis yen na 16 pesen (%) agens long Euro.

Sir Mekere i tok PNG i gat liklik strong bilong mani long resis wantaim ol arapela kantri long intanesenel maket olsem na wanem ol senis i kamap insait long prais bilong ol agrikalsa produs na ol minirel risos long intanesenel maket bai givim hevi long strong bilong Kina.

Em tok nau yet, PNG i yusim bikpela hap mani bilong en long baim ol samting bilong kaikai na yusim long ol arapela kantri na olsem dispela bai givim yet hevi long strong bilong Kina.

NGO long Hailans laik 5-pela soldia i go fri

YAMES KAY i raitim

OL NON-Gavman Ogenaisesen (NGO) insait long Hailans rijon i bin mekim wanpela bikpela protes tru long wanpela rali we i bin kamap long Mt Hagen long stat bilong dispela mun.

Ol i bin karim ol bikpela hap pepa na laplap we i soim ol toktok olsem, "Lusim tripela soldia i go fri".

Long rali ol NGO lain i askim ol faivpela Hailans Gavana long tokim Praitim Minista Sir Mekere Morauta long larim tripela soldia bilong PNG Difens Fos husat nau i stap kalabus long i go fri.

Ol NGO i tok olsem gavman i mas larim ol dispela tripela soldia i go fri bikos em i no long laik bilong ol yet na nau ol i stap long kalabus. Ol i mekim wok long sevim kantri taim dispela Sandlain hevi i bin kamap long kantri long 1997.

Dispela rali i bin kamap long Pop John Paul oval we ol Gavana bilong faivpela

Hailans provins i bin stap. Dispela bung i bin kamap bihain long Hailans Gavanoas Rijinol Kaunsil Konferens.

Mausman bilong ol NGO, Mista Ropra i bin givim strongpela toktok na tu sampela lain memba bilong NGO i karim ol pepa na sanap soim piksa i go long ol Gavana bilong Hailans rijon.

Insait long wanpela resolusen ol 5-pela Gavana bilong Hailans Rijon i mekim em ol i pasim tok wantaim long lukluk i go het long dispela petisen ol NGO i givim ol na toktok wantaim Praitim Minista, Sir Mereke Morauta long rausim dispela 3-pela soldia bilong PNG Difens Fos husat gavman i kalabusim pinis.

Ol dispela soldia em Kepten Bola Renagi, Meja Linus Osaba na narapela poroman bilong ol.

Ol NGO i tok strong olsem ol dispela 3-pela lain i mekim wok long helpim dispela kantri long stapim hevi we i ken kamap long Bogenvil, tasol gavman i no luksave long en.

Sir Rabbie i tok lo bilong ol Politikel Pati na Kendidet bai wok ...Sapos gavman i stretim sampela samting

NAMBA four prime minista bilong Papua Niugini, na memba bilong Kokopo, Sir Rabbie Namaliu i sapotim lo bilong ol Politikel Pati na Kendidet tasol em i laikim bai gavman i mas stretim sampela liklik lo insait long dispela Mama Lo.

Sir Rabbie i tok, namba wan astingting bilong em long sapotim dispela lo em bikos em i tok olupela sistem i no gutpela tumas.

"Ol lain bilong mipela husat i bin gat hona long wok olsem wanpela prime minista i save olsem politikel sistem bilong yumi i no gutpela tumas, na lus pati sistem bilong yumi, i bagarapim wok bilong bringim sevis i go long ol pipel na kamapim gutpela gavman bilong ol pipel bilong yumi," Sir Mekere i tok.

Em i tok wanpela senis em i bin mekim long taim bilong em olsem praim minista em long kamapim lo bilong 18 taim na insait long dispela taim i no inap i gat vot i nogat bilip, bihain long ileksen bilong wanpela nupela praim minista.

Em i tok dispela lo bilong ol politikel pati na kendidet i

skruiwok em i statim na olsem em i amamas long en.

Tasol em i tok i gat sampela eria we gavman i mas lukluk long en na stretim sapos gavman i laik lukim dispela nupela lo i wok tru.

Em i tok namba wan samting, gavman i mas karim aut wanpela bikpela pablik awenes kempen, na tu gavman i mas putim inap mani long kamapim atoriti we bai wok em yet, long lukautim ron bilong pati sistem, givim mani long ol pati, na wok bilong ol memba na ol kendidet, olsem dispela nupela lo i tok long en.

Sir Rabbie i tok moa yet olsem i mas i gat inap manmeri na ol samting bilong karim aut dispela nupela lo we nau yet Papua Niugini i sot long en.

Em i givim strongpela tok lukaut olsem gavman i mas luksave olsem tude Ogenik Lo long ol Provinsel na Lokol Level Gavman i no wok. Em i tok spirit bilong dispela senis i no wok gut bikos i nogat inap mani, manmeri bilong wok, na ol i nogat gutpela skul bilong karim aut dispela nupela wok



TOKSAVE

SENSES bilong dispela yia i gutpela senses. senses saveman bilong Australia Mista Alex McNaughton o Meknoten i tok.

"Taim yu raun i go long ples bilong ol grasrut long ol rurel eria na toktok wantaim ol distrik senses kodineita bai yu save olsem 2000 Nesenel Populeisen Senses i gutpela senses," Mista McNaughton i tok.

Em i bin mekim dispela toktok long Pot Mosbi long Tunde long NSO o Nesenel Stetiskol Opis.

NSO i bin wokim senses long kauntim ol manmeri pikinini na kisim toktok bilong ol pipel long helpim Gavman plenim gut developmen bilong kantri na developim ol ples we i nogat ol samting olsem rot, bris, skul, hausik, stoa, pawa bilong lait, klinpela gutpela wara bilong dring na kuk, na ol kainkain arapela samting bilong helpim ol pipel sidaun gut.

Long Tunde, ol senses opisa long Pot Mosbi, Senses Direkta Mista John Kalamoroh na bos bilong NSO, Mista Nick Suvulo, husat em i Nesenel Stetistisen, i bin mekim liklik sindaun long tok gutbai long Mista McNaughton.

Tumora bai Mista McNaughton i lusim Papua Niugini na i go bek long Australian Bureau of Statistics o Australian Biyurou bilong Stetistiks long wok ken wantaim ol wanwok bilong em long stretim ol samting nau long wok bilong senses long Australia.

Senses bilong Australia bai i kamap long Ogas neks yia. Australian Biyurou bilong Stetistiks i mekim wankain wok olsem NSO

Mista Kalamoroh i tok olsem Mista McNaughton i bin mekim bikpela wok tru olsem teknikal advaisa bilong senses long Papua Niugini.

"Em i bin skulim ol senses wokmanmeri long wei bilong mekim senses na bihain em i bin wok tu long stretim gut ol samting long taim bilong senses," Mista Kalamoroh i tok.

"Mista McNaughton, tenkyu tru long kam na helpim mipela long senses bilong mipela."

Mista Suvulo, bos bilong NSO, i tok olsem olgeta senses opisa i sori bikos Mista McNaughton bai i go bek long Austarlia.

"Em i gutpela man na wok bilong em i gutpela tru," Mista Suvulo i tok.

Mista McNaughton i tok olsem senses bilong Papua Niugini i lainim em long planti samting.

"Senses bilong Papua Niugini i no isi olsem senses bilong Australia," Mista McNaughton i tok.

"Planti ol hap bilong Papua Niugini i no gat 2-wei reidio long salim tok i go i kam long taim bilong senses na dispela i mekim wok bilong senses hat tru.

"Planti ol ples i stap long we tru insait long bikbus na ol maunten na dispela tu i mekim wok bilong senses hat tru long Papua Niugini"

Mista McNaughton i tok olsem em i hamamas tru long kam na wok long Papua Niugini na em bai sambai tasol long kam bek long mun Oktoba long helpim NSO ken long ol arapela wok bilong sens-

● Gavman bilong Papua Niugini na Gavman bilong Australia i sapotim 2000 Nesenel Senses.

Palamen tok orait long senisim sampela lo bilong ol Politikel Pati na Kendidet

79 MEMBA bilong Palamen i bin vot aste long pasim tok orait long senisim sampela lo bilong ol Politikel Pati na Kendidet. Nogat wanpela memba i vot agensim dispela lo.

Praitim Minista Sir Mekere Morauta i tok dispela em i wanpela gutpela sain tru i we soim olsem ol lida i gat bikpela laik na tingting long helpim ol pipel na kantri bilong yumi, Papua Niugini.

Ekting Spika, Sir Tom Koraiia i tokim Palamen aste olsem, aninit long Mama Lo bilong kantri, Palamen i mas wet inap long narapela tupela mun bipo long ol i sindaun gen na vot long pasim dispela lo.

Aninit long Mama Lo, Gavman i mas kisim 73 vot insait long Palamen long pasim dispela lo. Palamen bai bung long mun Oktoba long pasim dispela lo.

Wanpela bikpela lo Palamen i senisim insait long lo bilong ol Politikel Pati na Kendidet aste em lo bilong wok bilong ol rejistra bilong ol politikel pati, na lo i glasim wok bilong ol ausait lain husat i tingting long fandim ol politikel pati.

Sir Mekere i tok dispela em i wanpela bikpela step Gavman i kisim long strongim politikel sistem insait long las 25 yia taim PNG i kisim indipendens.

Em i tok namba wan bikpela senis long dispela lo bilong ol Politikel Pati na Kendidet em ol i pasim pinis na ol arapela senis em i no bikpela wari tumas long wanem gavman bai glasim yet na stretim.

Sir Mekere i bungim ol lida bilong Gavman na Oposisen aste long Palamen na tenkim olgeta long sanap wantaim long sapotim dispela lo.





NIUGINI AILAN NIUS

Sir Michael sapotim Bogenvil independens vottasol Momis na Kabui tromoim salens long gavman

VERONICA HATUTASI i raitim

BOGENVILAFEAS na Maining Minista Sir Michael Somare i redi long sapotim independen vot long Bogenvil, ripot i kamap long wanpela niuspepa bilong Australia i tok.

Sir Michael i bin stap insait long ol bung long Swiselan na Australia bilong toktok long ol hevi na samting i kamap long Bogenvil.

Long ol ripot we Sir Michael i bin mekim long Weekend Australian niuspepa, em bin tok em i kamap wantaim dispela tingting bikos planti hevi i stap yet long dispela wok bilong painim gutpela sindaun na wanpela rot we em i lukim long pinisim ol dispela samting em long sapotim independen vot long Bogenvil.

Em bin tok em bai kisim tingting bilong em i go long kabinet na ol i ken kamapim senis long mamalo na independen vot long Bogenvil i ken kamap.

Sir Michael i tok ol hevi long Fiji na Solomon Ailan i givim strongpela tingting long em olsem senis i mas kamap long mamalo bihain long 25 krismas PNG i kisim independen.

Ol ripot i tok Foren Minista bilong Australia Alexander Downer i sapotim

tingting bilong Sir Michael bikos em tu i lukim olsem dispela em wanpela rot bilong pinisim hevi long Bogenvil.

I kam inap nau, planti toktok i kamap olsem ol Bogenvil lida olsem foma BRA komanda Sam Kauona, Gavana John Momis na BPC Presiden Joseph Kabui i no amamas long Nesenel Gavman bikos em ino wok long bisi tumas long stretim hevi long ailan. Na em no wokim ol strongpela toktok na ol pipel bai save long tingting na sanap tru bilong em long sait bilong givim moa papa na independen vot long Bogenvil.

Mista Kauona long las wik i bin tok sapos gavman i no wokim samting hariap, pait bai kirap bek gen long ailan. Na em bin tok em bai lusim skul bilong em long Nu Silan we em wok long tren olsem pailot na go bek long Bogenvil long go pas long pait.

Bihainim ripot bilong tingting bilong Sir Michael, Gavana Momis na Presiden Kabui i salensim gavman long Waigani bilong kamap wantaim ol gutpela bekim long ol proposel na tingting bilong ol Bogenvil lida we i sut long moa pawa na independen vot.

Gavana Momis na Presiden Kabui i bin tok nau em ol bikipela toktok long Bogenvil i stap na i moabeta long Nesenel gavman

long mekim na autim ol strongpela tingting bilong em long traim pinisim hevi ya.

"Salens i go long Sir Michael na ol etvaisa na grup bilong em husat i wok wantaim em long kamapim ol gutpela tingting.

"Ol pipel bilong Bogenvil i wok hat long kamapim gutpela sindaun, stapim pait, stretim ples na rot bilong painim ansa long politiks bilong Bogenvil em wanpela rot tasol i stap nau.

"Planti Bogenvil pipel i bin dai long pait, planti blut i kapsait. Bilong pinisim pait na kamapim gutpela sindaun, ol bin tok orait long gavman i gat moa pawa na rait long independen vot.

"Planti lain i wok long wet na ol i les long harim na lukim gavman i wokim samting.

"Agrimen bilong nesenel gavman long kamap wantaim politikel setelmen bipo Septemba 15 em bikipela samting bikos ol Bogenvil pipel i wet long dispela de," Gavana Momis na Presiden Kabui i bin tok.

Narapela raun bilong ol Bogenvil toktok bai kamap long neks wik tasol ol no klia tumas we. Sir Michael i bin tok bung bai kamap long Wewak tasol ol Bogenvil lida i laikim bung long kamap long Rabaul.

Solwara pretimol manmeri long ailan

OL PIPEL bilong Carterets Ailan long Bogenvil i laikim gavman na ol atoriti long Bogenvil bilong helpim ol bikos ol liklik ailan bilong ol i stap long hevi.

Ol i askim gavman long helpim painim wanpela hap long bikailan Bogenvil we ol i ken stap na sindaun long en.

Dispela i bihainim solwara i rausim na karim graun long nambis bilong ol ailan na tu bikipela solwara i go insait long ailan na bagarapim ol gaden kaikai, stat yet long 1960.

Ol ripot i tok nau hevi i go bikipela na solwara i wok long karim ol ailan, ol pipel i pret olsem sapos ol atoriti long Bogenvil i no wokim samting hariap long surukim ol i go sindaun long narapela hap long bikailan, ol bai bagarap wantaim ol ailan bilong ol.

Carterets Ailan grup i stap eitpela awa longwe taim ol i go long sip long Buka. I gat siksipela ailan long grup na dispela em long Han we i bikipela bilong ol, Piul, Iolesa, Iosela, Huene na langain. I gat samting olsem 2,000 pipel i stap long Carterets Ailan grup.

Wantok i bin bungim na toktok wantaim sampela famili bilong Carteret Ailan na ol i autim wari bilong ol.

Long makim maus bilong ol, bikman Joseph Mologai i bin tok ol i laikim helpim kwiktiam i kam long ol atoriti long Bogenvil bikipela solwara i wok long karim ol liklik ailan we ol i stap long en. Na tu bikipela solwara i go insait long ailan na bagarapim ol gaden kaikai na ol arapela diwai kaikai olsem kapiak, banana na yar samting. Dispela em bikos taim solwara i go insait long taim bilong haiwara, em i save lusim ol liklik raunwara i gat sol long en na sol i save bagarapim ol diwai kaikai na ol narapela samting.

Mista Mologai i tok hevi long solwara i karim graun i bin stat long 1960 na nau i go bikipela. Na ol pipel i wari bikos bikipela hap ailan bilong ol em solwara i wok long karim. Na ol i wok long sot long kaikai.

Em i tok long Hue e Ailan, bikipela solwara i brukim ailan pinis plan i famili i lusim dispela ailan na go stap long Iolasa long bikipela ailan Han, solwara i wok long bagarapim ailan long olgeta sait na em i wok long go liklik. Iosela, Iosela na langain Ailan i stap level wantaim solwara na taim bikipela solwara i kamap, solwara i save stap antap long ol. Na dispela i mekim ol pipel i pret moa.

Mista Mologai i tok tru ol i bildim ol siwol long traim banisim na stapim solwara long bagarapim ol ailan. Na ol i planim ol nangru diwai tu tasol ol dispela samting i no inap.

Em i tok long 1971, bikipela solwara i bin bagarapim tru ailan na namba tu bikipela solwara em dispela we i bin kamp long 1995. Nesenel Disasta na Imejensi servis na Provinsel etministresen i save helpim ol wantaim kaikai taim hevi i go nogut.

Maikro Fainens Skim helpim ol Bogenvil

OL PIPEL bilong Bogenvil i laik kirapim wanpela Maikro Fainens o Liklik Mani Skim bilong helpim ol grasruts pipel long ples long sevim liklik mani na tu long kisim ol dinau mani long ol samting olsem ol skul fi, wokim bek ol haus, pik na kakaruk projeks, wok long stretim kakau na ol arapela samting we ol i laikim tru taim ples i wok long kamap orait.

Dispela em wanpela kredit skim yet bilong Bogenvil na ol i kolim long "Bogenvil Haus Mani" skim.

Ol komyuniti, ol pipel na ol bikman long ples i lukim nit long dispela bikos em i hat long ol i kisim helpim long ol komesel beng na ol bin kirapim ol toktok na ol wok redi long dispela kredit skim long 1997 yet.

AusAID na Kredit Yunien Faundes bilong Australia i wok long givim helpim wantaim ol wok-sop.

Bikipela Kredit Yunien man bilong Australia John Newson. Tim Dyce na narapela i save ranim ol woksop

bilong givim skul long ol lain husat i laik kirapim skim long ol distrik olsem Siwai, Bana, Sentrel Bogenvil na Nissan Ailan.

Ol bin givim tok orait long opiseli statim kredit skim long mun Epril long dispela yia.

Het opis i stap long Buka na man i go pas long en em Peter tauko.

Pwter Simili, wanpela man Siwai husat i bin stap insait long wanpela woksop long las mun i tok foapela eria olsem Siwai, Bana, Kieta na Nissan em ol pailot projek eria we ol i laik traim skim long en.

Mista Simili i bin tok i gat bikipela intres i kam long ol grasrut pipel. Em i tok long Siwai eria yet, ol gat pinis 4,000 memba.

Em i tok ol komesel beng i no save laik helpim tumas ol grasrut pipel na olsem ol pipel i gat bikipela laik long go insait long dispela kain skim.

Tu dispela skim i helpim ol pipel long helpim ol yet na i no wetim ol mani i kam long gavman.

WANTOK

NIUSPEPA BILONG YUMI OL PAPUA NIUGINI STRET

P. O. Box 1982, Boroko
Telepon namba: 325 2500
Feks namba: 325 2579
email: word@global.net.pg

**PE BILONG WANPELA
YIA 52 NIUSPEPA**

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Skulim pipel long krop rotesen long abr isim hevi

OL PIPEL bilong Siwai long Saut wes Bogenvil i laikim Dipatmen bilong Agrikalsa na Laipstok long salim ol teknikal opisa i go long ol distrik na rurel eria long provins long skulim ol pipel long planim ol kain gaden kaikai we bai gutpela long planim wetim na redim ol yet long taim bilong hevi.

Paul Mairaka wanpela opisa bilong Pogo Kaunsil ov Eldas long Korikunu Lokol Level Gavman eria insait long Siwai, sautwes Bogenvil i wokim dispela toktok bihainim taim bilong bikipela ren na ol pipel long saut Bogenvil i sot long kaikai.

Mista Mairaka i tok dispela hevi long bikipela ren na sot long kaikai i no nupela samting, tasol i wok long kamap long planti yia. Na i moabeta long ol komyuniti lida, ol atoriti long distrik na ol lain distrik na provinsel Dipatmen bilong Agrikalsa na Laipstok (DPI) long wok bung wantaim na helpim ol pipel long planim ol kaikai we i gutpela long taim bilong bikipela san, bikipela ren na ol kain taim nogut olsem.

"Mipe long LLG i wok long kisim toktok long planti pipel long toksave long ol provinsel atoriti bilong salim kaikai long helpim ol long taim nogut.

"Dispe hevi i no nupela samting em i wok long kamap long olgeta yia.

"Mipe laikim provinsel DPI long salim ol krop opisa na ol teknikel opisa bilong ol i kam long ol rurel distrik na skulim ol pipel long senisim rot bilong painim na senisim ol kaikai gaden.

"Krop rotesen o pasin bilong kaikai we pipel i planim em wanpela bikipela eria we ol DPI i mas strongin pipel long bihainim.

"Na i mas tokim na skulim ol pipel long planim ol kain kaikai na i no kaukau ol.

"Long dispela taim, ol keskrop na wail laipstok isa i save stap long ol distrik taso rogat fud krop opisa we i ken helpim ol pipel i skulim ol pipel long painim ol nupela kaikai na bihainim op rotesen we bai gutpela nogut.



BIA BIABIA DRING WANTAIM OL WOK BOIS BILONG EM LONG HAUS...

HEY, GUYS.. RIWAINIM SWIT TALA! BIA I SWIT I STAP. (CHIC!)

CLICK!

OL I WOK LONG HARIM SINGSING BILONG "OLD DOGS" SWIT TALA NA OL I WOK LONG RIWAINIM DISPELA SINGSING TASOL!!!


SWIT TAALAA??

MERI BILONG BIABIA HARIM SINGSING YAH TASOL IGO NA EM LES OLGETA!!!


HAMAS TAIM BAI YUPELA RIWAINIM DISPELA SINGSING.. ATING YUPELA GAT LAIK LONG EM!!

WANTU BIABIA APIM BIA NA TOKIM MERI OLSEM EM SWIT TALA TASOL YAH!!!

EM YAH! DISPELA EM SWIT TALA! MI NO INAP FORGETIM!!



SEPIK NIUS



Baua Baua tieta grup skulim ol pikinini

HELEN REI i raitim

WANPELA drama grup bilong Wewak ol i kolim Baua Baua i stap pinis long Mosbi na i wok long kamapim ol edukesen pilai raun i stap. Dispela grup i save mekim ol drama pilai bilong ol olgeta taim long Wewak i mekim namba wan raun bilong ol go kamap long Mosbi na mekim planti lain i kirap nogut.

Baua Baua em tok ples Botin long Angoram distrik bilong Is Sepik provins na i sut long noken hariapim ol samting o isi isi long en. Grup ya em ol lain yangpela bilong Sak Sak Kompaun long Wewak taun.

Dispela grup i kamap long 1995 aninit long lidasip bilong Lucas Kou husat i bin wangepela olpela memba bilong Raun Isi Tieta long Wewak tasol i bin bruk daun pinis.

Baua Baua i kamapim ol kain kain pilai na singsing wantaim danis we i sut long ol pasin tumbuna o kalsa (planti long Wara Sepik tumbuna singsing), ol sotpela edukesen na amamas pilai na ol singsing bilong helt, edukesen, sindaun bilong ol meri na pikinini na wok bilong lukautim gut ol samting bilong bus, wara na graun.

Drama pilai na ol singsing bilong ol i save sut stret long laip tude we i sut long laip bilong ples na long ol setelmen long taun.

Bikos ol i save stap long setelmen long Wewak, ol i save long wanem kain pilai we i sut long laip bilong setelmen long sait bilong helt na ol samting i stap long setelmen we ol manmeri i save mekim planti taim.

Long dispela taim nau, pilai bilong ol i sut long sindaun bilong ol meri na ol pikinini. Lainim long luksave long gutpela na nogut bilong en, wantaim drama na musik em bikpela het tok bilong ol pilai drama na musik bilong ol.

Ol i wok long kirapim na strongim tripela bikpela astingting; helt, envaromen na humen raits. Astingting em long traim daunim ol hevi we i save kamap long dispela

tripela eria.

Planti memba bilong graun i bin nogat gutpela save o skul bilong mekim ekt o drama pilai. Dairekta bilong grup Mista Kou i bin strongim dispela grup wantaim sapot bilong Jeffery Monje. Tupela wantaim i bin olpela memba

bilong Raun Isi Tieta grup.

Ol memba bilong Baua Baua grup em; Lawrence Yinbin, Jeffery Monje, Rita Augwie, Josephine Dila, Stephenie Womting, Judith Theo, Nason Alois, Moses Buasi, Willie Pangan, Paul Kimbang na Angela Kanawi.

Ol i bin pilai raun pinis long Vanimo, Madang na Wewak yet inap dispela taim ol i kamap long Mosbi.

Ol i gat sampela gutpela sapot na sponsa long helpim raun na pilai bilong ol.

Long Mosbi ol i raun mekim ol pilai bilong ol long ol skul.



• Baua Baua tieta grup bilong Wewak i raun long Mosbi na kamapim ol planti pilai bilong givim skul long ol skul mangi na ol manmeri long laip na sindaun bilong ol pipel na envaromen.



Diwai kilim dai man Sepik

WANPELA man Sepik i bin dai taim diwai em i wok long katim i pondaun antap long en. Nem bilong man ya em Willie Matthew husat i gat 34 krismas Em i bilong Lumi long Wes Sepik provins.

Birua ya i bin kamap long Vudal Agrikalsa Kolis long Is Nu Briten we ol bin kisim em long mekim wok bilong katim diwai.

Wanpela man husat i bin lukim birua tok daiman ya i bin wokim mistek long rot we diwai bai pondaun long en na olsem em no abrus gut na em i bungim dai.

Wok olsem seso opereta i bin kisim Willie long planti hap bilong kantri na nogat birua i save kamap long en i kam inap nau, ol ripot i tok.

Wok bung wantaim bai kamapim strong Momase rijen

PATRICK MATBOB i raitim

OL MOMASE provins i mas wok bung wantaim long kamapim developmen, papa na lida bilong PNG husat i holim Ministri bilong Bogenvil na Maining Afeas i bin tokim bung bilong ol Momase lida i no long taim i go pinis long Madang.

Sir Michael i bin tok em i no bilip olsem PNG i mas bruk long liklik hap tasol bihain long 32 krismas em i stap insait long wok politik, em i luksave olsem i gat nit long ol strongpela rijinel grup long bung wantaim na wok long kamapim developmen.

Em bin tok ol pipel bilong Momase rijen i wok olsem ol misinari, leiba na ol arapela kain wok long bildim kantri. Na ol Momase lida i bin helpim long kisim kantri igo long independens.

"Stat long 1973 inap long 1975, Momase i bin kamapim planti gutpela wok tasol bihain long dispela, em i slet. Yumi i no go het o kamapim sampela bikpela wok," Sir Michael i tok.

Em bin tok ol politisen i ken toktok tasol ol edministrata na ol pablik sevan i long mekim ol samting i kamap.

"Yumi i mas lus tingting pastaim long patri politiks na wok gut wantaim long kamapim strong rijen bilong yumi," Sir Michael i bin tok.

Em i tok rijen i gat 29 memba long Paiamen na sapos ol i bung wantaim ol i ken kamapim gutpela samting long mekim rijen i go het strong.

"Sapos yumi putim vot wantaim olsem wanpela blok, bikpela samting i ken kamap," Sir Michael i tok.

Em bin tok sapos bikpela hevi i kamap long Morobe o Sepik, ol lida i ekn bung wantaim na helpim ples we hevi i stap long en.

Em bin tok Momase i mas developim ol rot na ol arapela bikpela projek olsem Ramu Nike!

WIN! WIN! WIN!

TOYOTA HILUX 4WD TO BE WON! **AND 25 PEOPLE TO WIN K1,000 EACH** **DRAWN ON 15th SEPTEMBER 2000**

SEND IN ANY 3 EMPTY WRAPPERS OF HI-WAY HARDMAN OR HI-WAY BEEF IN AN ENVELOPE WITH YOUR NAME AND ADDRESS TO: EMTV P.O. BOX 443 BOROKO, NCD.





Paradise TOYOTA



SAUTEN



RIJON



Gavana Philemon egensim tambu long si kukamba

MILEN Be Gavana Titus Philemon i no wanbel long disen bilong Nesenel Fiseris Atoriti we i putim tambu long putim tambu long provins i lukautim, kism na salim ol si kukamba.

Mista Philemon i singaut long NFA long noken go hetim tambu tasol bilong wet pastaim taim ol i glasim na skelim ol samting we i kamap long si kukamba maket long provins.

Mista Philemon i tok bihainim maket i bin op long Milen Be i salim ol si kukamba i go long Saina, senis i kamap long prodaksen.

Em i tok pastaim ol i save maketim ol Blek na Wait Mama, Prikli Ret, Sempis na ol arapela. Tasol ol i mas lukautim gut ol dispela bikos ol i ken bagarap hariap.

Em i tok nau i gat bikpela maket long ol dispela we kwaliti bilong ol i no gutpela tumas olsem Sokpis, Gripis na Taiga Pis.

Mista Philemon i tok provins bilong en i wok hat long painim maket na nau taim ol samting i wok long go gut tasol em no gutpela long NFA i stapim ol.

Em i tok long namba wan taim tu ol i opim ol maket long ol arapela eria olsem Esa'ala na Gutinaf, Trobrien na Wutlak Ailan, na Suau na Kep Vogel long bikples.

Em i tok dispela em i namba wan taim ol dispela ples i go insait long bisnis bilong pulim mani long en.

Em i tok ol pipel bilong Milen Be i lukim ol rif bilong ol olsem ol gaden bilong solwara na ol i lukautim ol gut na ol risos bilong ol.

Em i tok ol ples lain i no olsem ol pairat bilong Esia husat i save go hait na kism ol samting bilong solwara i no bilong ol na long hap bilong ol arapela lain.

Em i tok ol pipel bilong en i yusim rot bilong ol tumbuna long lukautim na kism ol si kukamba na ol arapela risos bilong sol-

wara. Gutpela piksa em ol lain long Trobrien Ailan husat i stap long kism sempis long mun Februari bikos ol i laikim bai ol dispela pis i go planti gen.

Em i askim strong NFA long riviwiwim ol polisi long kwota na rot bilong lukautim gut ol samting bilong solwara na tok kwota lo i mas stap long ol sampela pis na si kukamba we i ka aninit long lo bilong lukautim ol samting we i nogat planti bilong ol i stap, na i no long olgeta.

Em i tok pasin bilong lukautim ol samting we i no planti i stap long en i mas stap balens wantaim wok bilong developim risos we i inapim laik bilong ol papa bilong ol risos.

Em i tok bikpela helpim we ol i ken givim i go long bisnis em long wokim ol lo we bai larim tasol ol papa bilong ol samting i kism ol si kukamba na rausim ol dispela lain o opereta husat i laik kism hariap olgeta samting, kism bikpela mani long ol na lusim ples.

Plen long kamapim pis fektori long Losuia

OL TINGTING i stap pinis long kirapim wanpela fektori long wokim tin-pis long Losuia Ailan insait long Milen Be provins.

Gavana Titus Philemon i bin tokaut long dispela samting bihain long em i toktok wantaim bikman bilong Trobrien Ailan sief Daniel Pulayasi, foma palamen memba Dennis Young na Tom Cameron presiden bilong Kiriwina Rurel Lokol Gavman Kaunsil husat i saiman tu bilong provinzel Kalsa, Turisim na Hom Afeas. Kiriwina RLLG bai papa bilong kampani we bai go pas long dispela projek.

Kiriwina RLLG bai papa long 33 pesen sea na wankain mak em Mista Young bai holim. Ol lain i papa bilong Nako Fiseris em Luke Critten na Neil Stanton bai holim narapela 33 pesen sea long en.

Wan wan patna bai putim K50,000 i go long kirapim projek ya. Bisnis ya bai i ron long hap graun long nambis long Losuia we Mista Young i bin baim long asples bisnisman Morris Kalubaku long Ogas 21 bilong dispela ya.

Gavana Philemon taim em i amamas long dispela bisnis i bin tok em i gutpela long bisnis ya i kirap long Kiriwina bikos ples ya i nogat ol gol, wel, timba na ol arapela bikpela bisnis olsem insait long planti krismas.

Em bin tokim ol pipel olsem ol i gat planti samting bilong solwara na nau em i sans bilong ol long go insait long wok bisnisna putim mani i go long poket bilong ol pipel.

Em i tok Kiriwina na Losuia bai i kism gutpela samting taim projek ya i kamap na go het.

Kiunga kism taim nogut bihain long bikpela ren

IAN KAKARERE i raitim

BIKPELA ren long Westen provins i bagarapim Kiunga na ol opisa bilong gavman i wok long kism ripot long ol bagarap we ol taitwara i kamapim long ol gaden kaikai samting.

Ol ripot i tok ol setelmen lain klostu long Kiunga taun i bungim bikpela hevi moa. Wara Kwire i katim rot i go olsem long Hongos, bihain long Kiunga sekonderi skul.

Haiwe rot we i joinim Kiunga na Tabubil i bin stap aninit long wara. Dispela em long Ok Mart bris eria. Ol liklik ka i no bin inap long ron long dispela taim.

Long haiwe rot klostu long Tabubil, graun i bin bruk long sampela hap tasol ol bin stretim rot hariap na ol pipel na ka i no bin gat hevi long yusim rot ya.

Long Kiunga bris hap au, Wara Flai i wok long kamap antap bikos long taitwara. Mak long wara i go antap em long 11.9 mita.

Taitwara bilong Flai i no kamapim hevi long rot bilong kism ol saplai kaikai long bot i kam long Mosbi tasol hevi i stap long rot bilong tilim ol i go long ol rurel eria bilong Not long rot bikos taitwara i katim ol rot na balus i no i inap long podaun. long ples balus i pulap long wara long en.

Long dispels taim Not Flai eria i wok long bungim hevi bilong La Nina we i save kamapim hevi ren long longpela taim. Dispela em i egensim El Nino we i save kamapim bikpela san na nogat ren.

Long wankain taim, ol lain bilong dringim bia long Westen provins bai i kism taim bikos dispela wanpela stoa long taun we i save salim ol strongpela dring em ol i putim tambu long en bilong wokim dispela.

Ol atoriti i putim dispela tambu bihain long hevi namel long ol Westen Hailans pipel na Hailans lain we wanpela man Daru i bin dai.

Man Daru i bin dai taim ol i spak na pait long ples bilong danis we ol bin wok long salim bia wantaim nogat tok orait.



Ol yangpela makim wok

• Ol sumatin bilong Pot Mosbi Nesenal Hai Skul long taim bilong Keria Wik. Dispela em taim bilong ol yangpela sumatin long makim wanem kain wok ol bai mekim taim ol i pinisim skul na kism moa trening long yuni-vesiti na long ol teknikal koles inait long kantri.

Roots Rice 1 kg	K1.37	Maggi Noodles 85 gr	K .50
Cold Power 200gr	K1.33	Blue Bird Sardines 423gr	K1.95
Paradise No.1 Biscuits 100gr	K0.44	Sunshine Milk 1litre	K0.95
Zenag Kaikai 900gr	K4.60		
Ilimo Eggs 60gr Doz	K3.50		
Saveloys per kg	K3.95		

EXTENDED TRADING HOURS


Monday to Wednesday - 8.00am to 7.30pm

Thursday / Friday - 8.00am to 8.00pm

Saturday / Sunday - 8.00am to 7.00pm

Planti moa kaikai prais i go daun long en!

Ph: 325 7566, 325 0863 Fax: 325 7096



HAILANS



NIUS



Japan man i traim bilas bilong PNG



• Wanpela man Japan i amamas na bilas tumbuna long Maunt Hagen So tupela Wik i go pinis. Em i sanap wantaim Kalsa na Turism Minista Andrew Baing na Westen Hailans Gavana Pater Robert Lak. I bin planti turis na manmeri bilong insait long kantri yet i bin kamap long amamasim na lukim kainkain singsing grup na so ol pipel i kamapim.

Wankain ba kamap taim Goroka So i kamap long mun Septemba. Dispela so bang wantaim amamas bilong 25 yia independens bilong kantri. Foto: TIMOTHY AIMS.

Ol Hailans skul nogat tem 3 holide, Minista Waiko i tok

MINISTA bilong Edukesen Dokta John Waiko i tokaut olsem ol tisa long Hailans provins bai i no inap kisim holide long tem tri dispela yia. Em i mekim dispela toktok long palamen las wik olsem ol tisa bin holim straik long pe na planti pikinini i no bin skul gut i kam.

Dokta Waiko i tok olgeta hevi bilong ol tisa i orait pinis na Gavman i stretim ol wok na pepa bilong apim pe bilong ol tisa i go antap.

Tasol Dokta Waiko i tok ol tisa i bin lusim sampela taim bilong skul na olsem ol skul pikinini i mas traim long kisim bek ol dispela taim we ol i lusim na i no bin skul.

Em i tok tem tri bai i nogat holide bikos ol studen i mas lainim gut ol samting we ol i bin abrusim long taim

ol tisa i bin holim straik long las mun.

Gavman i wanbel pinis long apim pe bilong olgeta tisa i go antap insait long kantri. Stat long neks yia 2001, bai pe bilong ol tisa i go antap isi isi we insait long tripela krismas bhain bai pe bilong ol tisa i go antap long 30 pesen (%).

Stat long mun Januari dispela yia i kam, ol tisa bai kisim 7% pe i go antap long pe bilong ol bhanim eria bilong produktiviti. Long sait bilong pefomens pe, ol tisa bai kisim 3.3% wan yia inap 2002 we inap kamap olsem 9.8% pe i go antap.

Long yia 2002 Desemba, ol pe i go antap bai i kamap long mak olsem 30.9%. Ol tisa i bin askim long 60% pe i go antap tasol Gavman i bin oraitim pinis 30% pe i go antap.

Nupela komiti redim gut Goroka So progrem

YAMES KEI i raitim

BIKTAUN bilong Isten Hailans provins, Goroka i wok long redi nau long bikpela Goroka So we bai kamap long Septemba 15 inap 17 dispela yia.

Ol singsing grup insait long ol haus lain long Isten Hailans i redim ol bilas bilong ol na tu ol narapela husat bai kamap tu long ol arapela provins tu i wok long redim rot bilong ol long go long Goroka long dispela bikpela So.

So dispela yia i stap aninit long ogenaissen bilong olpela Primia bilong provins Walter Nombé husat i präsident na vais präsident em Mewie Launa. Tresera bilong so komiti em wanpela bisnismen bilong Goroka yet, Mista Yanga Kare.

Isten Hailans Provinsal gavman i givim samting olsem K150,000 i go long helpim dispela so. Sampela bikpela kampani tu i helpim wantaim sampela mani na wok long mekim so long dispela yia i kamap moa gut.

Mista Nombé na Mista Launa wantaim ol komiti bilong ol i wok hat tru long redim ol progrem bilong so na i luk olsem dispela yia Goroka So bai kamap moa naispela tru.

Planti trusis i wok long kamap pinis long Hailans rijon taim ol i go long

Hagen So long las wiken. Olsem na i gat bikpela bilip olsem Goroka So bai i lukim moa ovasis turis i go raun na lukim ol pasin tumbuna bilong PNG.

Planti ol gutpela samting tru olsem tumbuna singsing, rok konsat na ol planti kain kain pilai bai stap insait long progrem bilong dispela so.

Las yia, Goroka So i no bin kamap, olsem na i luk olsem long dispela yia ol so komiti i laik mekim dispela so i gutpela tru na ol manmeri bai amamas long en.

Nau yet ripot i kam long ol bikpela hotel na ol haus slip insait long provins olsem ol rum na spes i pulap pinis na i luk olsem planti manmeri tru long ol ausait provins bai i kamap long dispela so.

Long sait bilong ol musik o rok konsat, olpela musikman bilong Waghi Helcats na papa bilong Kumul Studio, Pat Siwi i go pas long redim. Ol i gat ripot olsem Junia Wali Hits bilong Madang wantaim fran man bilong ol Gedix Atege bai pilai long dispela so.

I no longtaim i go pinis Gedix wantaim ol lain bilong Tumbuna Trek Studio long Madang i bin i go kamap long Goroka na givim paia lait stret long wanpela skul pati klostu long Kamaliki. Bihain ol i bin go pilai long Lahani Klap long Goroka taun.

Stil pasin kamapim bikpela wari long Goroka taun

Wanpela bikpela stil pasin i bin kamap long Edventis Eviesen balus kampani long Goroka taim sampela raskol i katim waia banis na i go insait na stilim moa long 30 kopi bek. Kos bilong ol dispela kopi pasmen bek i klostu K5,000.

Dispela ol kopi bek ol i stilim, balus i bin kam long hap bilog Karamui eria insait tru long bus na i bin stap insait long wea haus bilong Edventis Eviesen taim ol raskol i brukim na go insait long stil.

Wanpela kaunsila bilong Karamui, Simon i tok em i no amamas long kain pasin ol dispela stilman i mekim bikos ol kopi ya em ol man long bus i hatwok tru long kisim na karim i kam long salim. Tasol ol lain husat i save stap nating long taun i stilim kopi bilong ol.

Wanpela man husat i lukim

dispela hevi na wanpela sekyuriti gad yet i tok olsem dispela i bin kamap long nait taim ren i pun-daun.

Dispela hevi i bin kamap taim wanpela sekyuriti gad tasol i bin wok. Em i tok olsem samting olsem 12-pela man olgeta i bin kam olsem long Genauka setelmen na yusim samting bilong waia na yusim kruba long brukim wanpela bikpela kontena we ol kopi i bin stap long en.

Dispela hevi long stil pasin long ol haus klost long Genauka setelmen i wanpela bikpela hevi tru long Goroka taun. Ol plis long Goroka tu i save long dispela na traim hat tru long holim pas ol dispela raskol o stilman.

Nau yet em i no seif o gutpela tumas long yu wanpela i wokabout long rot bilong Genauka setelmen i go olsem long eaprot rot.

Ol sampela yangpela man i save sanap na lukluk long husat man o meri i wokabout wanpela na ol i save go na putim naip long em na pulim bilum o paus bilong ol. Planti ol wokmanmeri bilong ol kampani olsem Pacific Helicopters, SDA Eviesen, Farmset, Kopi Industri na ol kampani arere long ples balus i save bungim dispela hevi.


Ol dispela yangpela stilman i save sanap na skelim ol man i werim ol gutpela samting olsem stokmen su na hanwas na bhain ol i save giaman na toktok wantaim ol na stil gen long ol.

Planti lain i tok moabeta plis i mas go insait long Genauka setelmen na rausim ol dispela lain i nogat wok na i save stap nating na stil long ol manmeri long taun.

Cat **CS-563C**
CP-563C
Vibratory Soil Compactors



Designed to provide...
**Outstanding Performance,
Reliability and Fuel Efficiency.**



The 563C Series Compactors are high production units with estimated production up to 765m³ per hour – keep up with earthmoving equipment or large fill projects. Standard dual amplitude, changeable from the operator's station, expands the application range. Operate in high amplitude to get density on thick lifts in the fewest passes. Select low amplitude when operating next to structures, when approaching final density, or to avoid fracturing aggregates. Patented eccentric weight design assures positive amplitude selection and helps extend vibratory system service life.

Check out the range at your nearest branch today!

Hastings Deering



PORT MORESBY
Phone: 325 6422
Fax: 325 0774

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 982 1244
Fax: 982 1129



MADANG NIUS



FPCD helpim Madang helt sevis

KIWURAM KANAKO i raitim

OL haus sik wantaim ol liklik klinik na edpos long ol distrik na liklik ples long Madang nau bai inap long mekim sampela gutpela wok long helpim sindaun bilong ol manmeri long lukautim ol yet bhain long ol i kisim liklik helpim long wanpela non gavman ogenaísesen

Dispela NGO em long Foudation for People and Community Development (FPCD) husat i gat tupela opis tu long Madang. Dispela opis em long GROW projek na Eko-Forestri.

Kos bilong ol samting FPCD i givim em long mak bilong samting olsem K20,000.

Bos bilong FPCD, Yati Bun i bin tok em i hamamas tru long helpim wok bilong helt dipatmen long Madang. Mista Bun i askim helt dipatmen long Madang long lukim gut ol dispela samting na skelim i go long ol haus sik olsem long Bogia, Aiome, Saidor, Walium na Daigul wantaim ol liklik klinik long helpim sindaun bilong ol manmeri long ples.

"Wok bilong grup bilong mi olsem ol lain GROW projek hia long Madang i no sut tasol long wok bilong painim gutpela kaikai na mekim wok long katim diwai bilong yu yet. Nogat. Mipela i laik bungim olgeta dispela wok long helpim ol komyuniti bilong mipela. Sapos mipela i toktok long planim gutpela kaikai, mipela i mas lukluk tu long helpim ol manmeri tu long lukautim ples bilong ol, olsem ol i mas lukautim ol yet na abrusim ol kain kain sik," Mista Bun i tok.

Em i tim: "Mipela i no mas wokim ol haus sik tasol na lainim ol i stap. Nogat, mipela i mas tokim ol manmeri tu long klinim dispela haus sik olsem em i samting bilong ol."

Em i tok ol dispela helpim we i bin kam long Ostrelia insait long wanpela bikpela ain bokis i gat ol bet, matres, sia, ol liklik naip na arapela samting bilong mekim wok. Planti bilong ol dispela samting bilong mekim wok i no save wok long pawa na i gutpela bilong ol haus sik na klinik i stap ausait long taun we i gat pawa long en.

"Planti bilong ol dispela samting i no save yusim pawa na i gutpela bilong i stap long helt senta we i stap long bus. Planti bilong ol dispela samting i nupela yet we ol i no bin yusim. Dispela ol samting bilong mekim wok i no sekenhen," Mista Bun i tok.

Em i tok wanpela grup long Sydney, Ostrelia, we ol i save wok klostu wantaim FPCD, em long Australia Foundation for Asia Pacific (AFAP) i bin givim ol dispela samting i kam long FPCD, bhain long Mista Bun i bin askim ol long givim em ol dispela samting. Ol dispela samting i bin sindaun nating i stap long bikpela bakstua long Sydney.

Bahin tenkim FPCD

SIAMAN bilong Madang Jenerel Haus Sik bod, Florian Sawan Bahin i tenkim Foundation for People and Community Development (FPCD) long sevis ol i givim.

Em i tok, dispela em i namba wan taim tru bilong wanpela NGO long luksave na helpim helt dipatmen long Madang.

Em i tok tok dispela em i bikpela samting tru, na i soim olsem i gat bikpela tingting bilong wok namel i mas kamap namel long ol NGO, sios na gavman.

"Nau mi singaut long ol arapela NGO long kam na wok bung wantaim mipela. Nau i no taim bilong wok wan wan na hait i stap. Yumi mas wok long helpim ol pipel bilong yumi," Mista Bahin i tok.

Long strongim toktok bilong Mista Bahin, nara-pela memba bilong Madang Haus Sik bod, John Levi husat i wok olsem namba wan kuskus i tok olsem, helt dipatmen i gat bikpela tingting na laik long wok bung wantaim ol NGO long kamapim kaikai bilong dispela nupela helt plen we gavman i bin oraitim pinis.

"Mi gat bikpela hamamas long FPCD long luksave long wok bilong helt dipatmen. Mi tok tenkyu long em long dispela helpim we bai i sut tu long mekim kamap wanem ol tingting na toktok em gavman i oraitim pinis long dispela Nesanel Helt Plen we bai stat long 2001 na pinis long 2010," Mista Levi i tok.

Kot saspending Gavana Kas

... Pengau kisim ples bilong em

WENCESLAUS MAGUN i raitim

DEPUTI Madang Gavana, Pengau Nengo, i kisim ples bilong Madang Gavana Jim Kas na i ronim provinsel gavman olsem Ekting Madang Gavana stat long Fonde Ogas 17, taim Lidasiip Traibunel i harim kot bilong Mista Kas.

Memba bilong Raikos, Stahl Musa i tok, stat long taim dispela kot i stat na i go inap long wanem de na taim dispela kot i pinis, Kot i saspending Mista Kas long holim publik opis olsem Gavana bilong Madang provins.

Mista Musa i tok long dispela taim, Provinsel Eksekutiv Kaunsel, (PEC) i makim Deputi Gavana, Pengau Nengo, long holim wok bilong Mista Kas.

Mista Musa i tok tu olsem wok bilong Gavana Kas olsem Siaman bilong Fainens na Treseri long Madang provins nau i go long han bilong em.

Long wankain taim, Mista Musa i tok, singaut bilong holim Vot i Nogat Bilip long rausim Mista Kas, i no inap kamap long wanem Mista Kas i no moa holim wok olsem Gavana bilong Madang.

Mista Musa i salensim tu ol provinsel memba husat i tingting long kisim sia bilong Madang Gavana, long wet inap 2002 Jenerel Ilekse na resis long rijinel sia.

Em i tok tu olsem, plis long Madang i no sasim yet Mista Kas long birua bilong ka em i bin bungim long mun i go pinis, taim wanpela bisnis man, Alois Kiangua i dai.

Moa yet, Mista Musa i tok, disisen PEC i mekim bilong yusim mani bilong Lo na Oda fan insait long Madang Disasta na Imejensi Baset long lukautim lo na oda insait long provins taim birua bilong Mista Kas i bin kamap em i no disisen bilong Mista Kas.

Em i tok long taim PEC i mekim disisen long yusim K89,000 long stretim hevi

bilong Mista Kas, Mista Kas i bin hait i stap long Simbai bhainim edvais bilong ol plis.

Mista Musa i tok PEC i tok orait long yusim mani bilong ol pipel long mak bilong K89,000 bilong lukautim ol publik propeti na laip bilong ol publik long ol birua inap kamap bhainim dai bilong Mista Kiangua.

Em i tok K37,000 Mista Kas i yusim long baim ol wantok bilong Mista Kiangua, olsem bel kol mani, em i kam aninit long baset bilong baim ka bilong Mista Kas olsem gavana bilong Madang.

Mista Musa i tok K10 milien o amas mani ol wanblut bilong Mista Kiangua i askim long baim kompensesen, em i samting bilong Mista Kas yet wantaim ol famili bilong Mista Kiangua long stretim.

Ol ripot i kam long sampela komyuniti lida long Madang i soim olsem ol pipel bilong Madang i no amamas long disisen bilong PEC.

Aesop Bisnis Voluntia helpim ol skul pikinini long Madang



• Siaman bilong Danip Vokesenel Skul, Paschal Feria i givim nupela ka i go long het-masta bilong skul. Ol bai yusim dispela ka long mekim wok bilong Vanila: Foto: BEN TAUMAI

Nesanel Gavman na Lands Dipatmen kisim tok long glasim kwik Madang Taun graun

NOELLA WAVU na PIUS IKUMA i raitim

NESENEL Gavman na Lands Dipatmen i bin kisim tok long glasim kwik ol graun insait long Madang taun.

Edvaisa bilong ol Madang Taun Landowner Asosiesen, Paul Kamang, i sutim tok long Gavman na Lands Dipatmen

long i no mekim inap wok long stretim dispela hevi kwik.

Em i tok dispela hevi nau i kamap bikpela hevi tru long ol papagraun bilong Yabob, Krangkot Ailan, Mis, Biliau, na Sisiak.

Mista Kamang i tok nau em i moa long 10-pela yia bilong kontrak gavman i sainim wantaim ol papagraun long yusim graun bilong ol long kamapim Madang

taun, na gavman i no bhainim kontrak na askim bilong ol papagraun long sainim bek gen dispela kontrak. Em i tok kontrak i pinis long Septemba 13, 1987.

Long dispela as, Mista Kamang i askim ol bisnis lain i ronim bisnis long Madang taun long noken go het na salim ol haus na ol bisnis bilong ol long taun inap ol papagraun na gavman i stretim dispela hevi.

WANPELA non gavman ogenaísesen bilong Canberra, Ostrelia, Aesop Business Volunteers Limited, i helpim ol liklik pikinini husat i no go long skul yet long kisim sampela save long ol kindagaden insait long Madang provins na kantri.

Nem bilong dispela skul em Kindagaden Long Ples. Het opis bilong Kindagaden Long Ples insait long PNG, i stap long Madang.

Aesop i save skulim ol pipel long menesmen na teknikel trening bilong ol bisnis haus long ol kantri i wok long develop yet olsem Papua Niugini na ol arapela kantri long Asia Pasifik rijen.

I no longtaim i go pinis, ol i kisim Kathleen Warren bilong Newcastle, Niu Saut Wales, long Ostrelia bilong i kam long PNG na i go tisim ol liklik pikinini long kindagaden long Madang.

Mama Warren i gat 67 krismas olgeta na i no moa wok olsem wanpela tisa long Ostrelia. Em i gat Doktoret long skulim ol pikinini taim ol liklik yet long skul bilong ol pikinini.

Lae Nius

Nalau kamap siaman bilong CMB

Olpela Gavana bilong Morobe provins Jerry Nalau em nupela siaman bilong Kopra Maketing Bod (CMB).

Namba tu Praim Minista na Minista bilong Agrikalsa na Laivstok Mao Zeming i bin makim Mista Nalau long holim dispela wik bihain long olpela siaman, Robinson Namaliu i pinis long wok siaman bilong kontrak bilong em i pinis long las wik. Tasol ol i makim gen Robinson Namaliu long stap olsem bod memba long nara-

pela tripela krismas.

PNG Groas Asosiesen (PNGGA) i amamas long dispela makim bilong Jerry Nalau long kamap siaman bilong CMB. Ol i tok ol i gat bilip long kain lidasip na pasin bilong Jerry Nalau long go pas long kain opis olsem bikos em i man bilong sanap strong na sut stret long toktok na wanem hevi i stap. Ol i amamas long wok klostu wantaim Jerry Nalau long taim bilong em olsem siaman bilong CMB.

Morobe So i kamap 40 krismas nau

MOROBE Provinsial Agrikalsa So i amamasim 40 krismas bilong em long dispela yia, yia 2000.

Long taim we ol arapela so i pilim hevi bilong mani insait long kantri, Lae so i plen long mekim so bilong dispela yia i bikpela na gutpela moa.

Mipela i laikim dispela 40 yia so bilong mipela i olsem lait bilong Lae na Morobe provins insait long yia we i gat hevi long sait bilong mani na bisnis insait long kantri, Mike Quinn, presiden bilong Morobe So i tok.

So bai kamap long Oktoba 13 i go pinis long Oktoba 15 long dispela yia na so bai

soim wanem ol gutpela samting Morobe provins i gat long soim. Program bai soim 6-pela bikpela eria olsem, Agrikalsa, Hotikalsa, Laivstok, ol pilai na ol samting bilong soim insait long namel (ring events), ol bisnis na kampani bai soim ol samting ol i save mekim na ol skul tu bai soim ol pilai na ol samting ol i save lainim.

Insait long dispela tripela de bai so program i soim kain kain pilai na ol samting bilong soim, ol pilai resis, ol musik na ol tumbuna singsing, ol kaikai na paiawoks. I gat ol wanwan lain, ol grup, ol komyuniti na ol bisnis kampani bai

resis long winim ol bikpela prais long ol samting ol i mekim na soim.

Morobe So i save gutpela na amamas de bilong ol famili long raun na baim o lukim ol samting na pilai ol laki resis nambaut. So i save kirapim tu ol divelopmen na strongim ol agrikalsas wok insait long provins.

Morobe Agrikalsa So i bin stat long 1959 na i bin pulim planti sapat i kam long olgeta level bilong sosaiti. Ol helpim wantaim mani na mekim wok insait long lukautim so i ron gut i helpim long mekim so i groa strong olgeta taim gutpela moa.

Wenge laikim beng i helpim ol liklik manmeri

YAKAM KELO i raitim

MEMBA bilong Nawae Kennedy Wenge i no amamas tru long pasin bilong ol beng long givim dinau mani long ol liklik manmeri bilong ples.

Mista Wenge i mekim dispela toktok long haus palamen las wik olsem ol beng i save askim ol liklik manmeri bilong ples ol bikpela bikpela askim we i no sut long ol.

Mista Wenge i tok ol beng opisa i save askim sapos ol ples lain i gat televisen, ka na ol bikpela samting we i save wok long masin na pawa.

Em i tok ol ples lain i save laik kisim dinau mani long beng long mekim ol wok bisnis na projek bilong ol antap long graun bilong ol. Tasol kain askim olsem we beng i save laikim i mekim hat tru long ol liklik manmeri long kirapim ol wok long ples.

Em i tok dispela i mekim na tude i gat planti bikpela skul manmeri bilong PNG i no save mekim wanpela gutpela wok. Ol i save sindaun arere long rot na salim buai na lus smok long Kamkumung na Erima maket. Ol i gat pepa bilong yunivesiti na ol bikpela trening koles na teknikel skul tasol rot bilong ol i painim wok o mekim wok i hat long kain pasin

bilong ol beng long askim long ol bikpela sekyuriti na ol samting pastaim long ol i givim dinau long ol.

Papa bilong kantri, Sir Michael Somare tu i sapatim dispela toktok bilong Kennedy Wenge na i tok dispela em wanpela bikpela hevi na ol siaman bilong ol beng i mas senisim lo bilong ol kamapim sampela gutpela polisi we beng i ken helpim ol liklik manmeri bilong ples.

Sir Michael Somare i tok long em yet, em i ken kisim beng dinau isi bikos em i gat tupela haus, wanpela long Mosbi na wanpela long Wewak. Dispela em ol kain sekyuriti we beng i save askim o laikim pastaim long ol i givim beng dinau.

Sir Michael Somare i tok tru tumas ol beng i mas senisim lo bilong ol na mekim isi long ol liklik manmeri long kisim dinau long kirapim ol wok long ples na tu ol beng i mas daunim ol interes bilong ol i kam daun long ol dinau we ol pipel i kisim.

Kennedy Wenge i tok ilektoret bilong em long Nawae i gat bikpela graun na ol i save mekim mani olsem na beng i mas skelim kain samting olsem na givim dinau long ol pipel bilong em long ples bikos ol bai mekim mani.

ELC-PNG Ukata distrik makim nupela presiden

Wanpela sios distrik insait long ELC-PNG long Morobe provins i mekim pinis sevis long wok lidasip bilong distrik bilong ol. Ol i makim pinis nupela distrik presiden bilong ol.

ELC-Ukata distrik i holim namba 8 distrik konfrens bilong ol long Yalumet stesin long wik i go pinis. Yalumet seket yet i go pas long lukautim dispela wanpela wik konfrens.

Long pinis bilong konfrens ol i makim pinis nupela man long kisim ples bilong pasto Seru Milenge husat nau i stap Ukata distrik presiden.

I gat foapela pasto ol i resis long dispela ileksen bilong kamap distrik presiden na pasto John Bata em nau seket presiden bilong Yalumet seket i winim dispela ileksen.

Ol sios na Gavman lida husat i bin kamap na witnesim dispela



• (Ilephan) ELC-PNG Asisten Bisop Reveren Motoro Kiage wantaim memba Ginson Saonu na ol wokman bilong Kabwuk distrik opis ol i kam bung long namba 8 ELC-PNG Ukata Distrik Konfrens na ileksen bilong nupela Distrik Presiden.

konfrens na ileksen we i kamap em Asisten Bisop bilong ELC-PNG Reveren Motoro Kiage, nesenel memba bilong Kabwum Ginson Saonu, kaunsi presiden bilong Deyamos

Lokol Gavman Kaunsi Patrick Basa na presiden biling Dugusaru Lokol Gavman Kaunsi Mista Basuk Erewiong. Pasto John Bata bai holim dispela opis bilong ELC-Ukata dis-


trik inap foapela krismas na bihain bai em i ken go gen long nara-pela ileksen long dispela sia bihain long foapela krismas i pinis. Dispela em long yia 2004.



LIDA BILONG OPOSISEN

TOK SORI

Hon. Peter Peipul, Ekting Oposisen Lida, ol Oposisen memba na ol woklain i laik salim bikpela tok sori tru i go long Misis Pauline Koki na 7-pela pikinini bilong ol, Is Nu Briten Gavana, Hon Francis Koimanrea, ol pipel bilong Pomio, ol famili memba na ol pren bilong:



LEIT ALOIS KOKI

long dai bilong em long 22 Ogas, 2000 long ples bilong em long Pomio insait long Is Nu Briten provins bihain long em i bin sik longpela taim i kam.

Leit Mista Koki em wanpela olpela lida bilong Papua Niugini na planti lida na ol pren husat i save gut long em na wok klostu wantaim em bai lusim em.

Mipela i serim dispela sori na wari wantaim famili na ol pipel bilong Pomio long dispela taim bilong hevi.

“Bikpela God papa i givim laip wanpela taim na kisim bek wanpela taim”.

SOL BILONG EM I KEN KISIM GUTPELA MALOLO

HON. PETER PEIPUL, OBE, MP
EKTING OPOSISEN LIDA

Wewak daiosis tingim Asbisop Leo Arkfeld

MOA long 100 pipel i bin bung long Wewak matmat, long tingim Asbisop Leo Arkfeld long namba wan aniveseri bilong em long Ogas 21 las yia.

Insait long dispela liklik seremoni ol i bin blesim matmat bilong Papa Leo. Antap long matmat i gat sampela toktok i stap na long saiti bilong matmat i gat wanpela alta.

Bihain long lotu i pinis long matmat, ol i go bung long Wirui Saun Sel long selebretim Misa bilong Papa Asbisop Arkfeld.

Tupela memba bilong Arkfeld famili, Jake Ohlinger na Alvin Kohl, i kam olgeta long America long stap insait long dispela selebresen na ol i bungim narapela wanblut bilong ol, Pater Vince Ohlinger, SVD long Hagen.

Ol i bringim wanpela waitpela seramik kalis na wanpela komuni plet, olsem wanpela presen i kam long peris bilong Papa Asbisop Arkfeld, long Panama, Iowa.

Ol arapela bsiop na pater i bung wantaim Wewak Bisop Ray Kalisz em long Bisop Tony Burgess, Bisop Michael Marai, na samting olsem 24 pater.

Long pinis bilong misa, Bisop Kalisz i tokim olgeta bilip manmeri na pikinini long wanpela stori ol pipel bilong Keram i raitim antap long wanpela hap diwai ol i sapim. Dispela hap diwai i gat stori bilong Papa Asbisop Leo Arkfeld.

Bikpela bilong dispela stori bod em i olsem 3.5 mita longpela na 1.5 mita brait.

Dispela stori bod i stori long taim Leo i bin wok long gade bilong papa bilong em wantaim sampela hos. Em i stori tu long taim em i sutim sampela pinga long lek bilong em wantaim gan na taim em i tok gutbai long famili bilong em na i go kalap



• **Piksa hia i soim wanpela hap stori insait long hap diwai we ol Keram i katim na raitim laip stori bilong Papa Asbisop Leo Arkfeld. Dispela poto i soim Bisop Leo i odenim Pater Cherubim Dambui.**

long wanpela tren na i go long seminari.

Ol bikpela stori long stori bod bilong Papua Niugini i gat stori bilong bisop Leo i ronim balus, taim em i kamapim ol Rosari Sista, wokim Wewak Haus Lotu na taim em i odenim Pater Cherubim Dambui olsem namba wan Sepik pater.

Namel long dispela stori bod i

gat piksa bilong Leo i selebretim 100 yia bilong Katolik Sios long PNG long 1996.

Astingting bilong dispela selebresen em bilong pinisim sori long dai bilong Papa Leo na long selebretim ol gutpela yia i kam bihain long wok bilong wanpela bikpela man husat i mekim tru wok bilong em olsem wanpela bisop.

STOPAIDS PNG skulim ol Angliken man long HIV/AIDS

HELEN REI i raitim

STOPAIDS PNG i holim gen namba tu tri de woksop long HIV/AIDS awenes las wik long St John Angliken Katidrel long Ogas 23 i go long 25.

STOPAIDS em an bilong Angliken Sios bilong Mosbi. I gat 6-pela memba long dispela tim na ol i wok insait long eria bilong edukesen.

Namba wan kain woksop olsem i i bin kamap long Ju 22 i go long 24 bilong skulim ol Yunion memba bilong ol mama grup.

Astingting bilong dispela woksop em bilong skulim ol pipel sampela skul long abrusim sik HIV/AIDS, skulim ol yangpela long save long dispela sik na ol i mas mekim wanem long dispela kain sik olsem wanpela Kristen bilip manmeri.

Wanpela ol man husat i kam long skul bilong ol dokta long yunivesiti bilong Papua Niugini, Dokta Clement Anyiwo, i toktok long tes bilong HIV/AIDS long ol blut, i toktok long wanem samting i save kamap na ol i save mekim kain tes long husat ol lain.

Em i toktok tu long wanem samting

i wok long kamap long Afrika, wanpela kantri we em i bin go lukim i no longtaim i go pinis na givim toktok long ol pipel long hap.

Meri husat i go pas long ronim dispela woksop na meri bilong Angliken bisop long Mosbi, Bennita Hough i tok, em i no gutpela samting long toktok tasol long HIV/AIDS.

Em i tok dispela woksop i lukluk tu long pasin bilong wok bung, komyniti laip na wanem ol wok bilong wan wan manmeri na pikinini insait long dispela ol eria.

Astingting bilong namba tu woksop em bilong helpim ol yangpela man. I no planti man i bin kamap long dispela woksop tasol ol ironim gut.

Ol lain i kam long kain kain hap tasol i gat wanpela astingting bilong helpim na daunim sik HIV/AIDS long Mosbi.

Ol i wok wantaim insait long ol liklik grup na paitim toktok na serim na putim kamap ol pilai na drama. Ol i kisim skul long bodi bilong man na meri na wanem samting i save kamap namel long ol man na meri, pasin bilong mekim ol senis na kisim wok long mekim.

Ol Jomba Katolik mama grup i senisim basket wantaim Kayan

JAIVE SMARE i raitim

OL Katolik mama bilong Jomba Katolik Mama Grup insait long Madang i senisim basket wantaim ol Kayan Katolik Mama bilong Bogia i no longtaim i go pinis.

Grup seketeri, Rita Suguman i tok dispela seremoni em hap bilong wanpela fan resing program bilong dispela tupela grup.

Long taim bilong senisim basket, Mis Suguman i tok ol meri i mekim nupela pren taim ol i senisim ol tumbuna basket na insait long ol dispela wan wan basket, i gat K10, ol kaikai bilong stua na ol gaden kaikai olsem taro na saksak.

Mis Suguman i tok wokabaut i go long Kayan i kisim ol sampela hawa.

Ol i stat long Fraide wantaim bas, kisim wanpela bot, na wokabaut long tupela hawa olgeta.

Taim ol i kamap long ples ol pipel long ples i welkamim ol wantaim wanpela singsing tumbuna tasol ol mama i no amamas long wanem longpela wokabaut i mekim ol i slek olgeta.

Mis Suguman i tok seremoni i kamap long narapela de na ol i go bek long Madang long Sande bihain long wanpela misa long Kayan

Em i tok nau ol i wetim ol mama bilong Kayan long go bek na senisim basket wantaim ol long Jomba peris. Dispela pasin i save kamap olgeta yia. Las yia ol i bin go long Karkar ailan na bung wantaim ol Katolik mama long Karkar.

Ol Madang Kristen yut i no sapotim lo bilong pamuk

ANNETTE SETE na KENNETH AVIRA i raitim

OL Kristen yut bilong Madang, i autim wari bilong ol long tingting bilong wanpela politisen long kamapim lo bilong pasin pamuk long kantri.

Insait long wanpela kibung bilong ol yut long Holi Spirit Katidrel long Ogas 17, ol yut i bin autim dispela tingting.

Dollorose Sariwa, wanpela yut lida, i tok, sapos gavman i kamapim lo bilong pasin pamuk, em i olsem ol meri bai lusim veliu bilong ol insait long komyniti na ol man bai i gat atoriti antap long ol.


Em i tok: "Em bai bagarapim skul bilong mipela ol yangpela meri bikos mipela bai no laik long skul na mekim dispela pamuk pasin long kisim moni."

Robby William bilong Yunaited Sios i tok, lo bilong pasin pamuk bai mekim sem pasin long Melanesia, Kalsa na bilip Kristen. Em i tok tu olsem dispela bai mekim sik HIV/AIDS i go bikpela.

Ol yut bai raitim wanpela petisen na givim i go long Gavman na tu holim wanpela publik awenes kempen long Madang taun maket long narapela mun.

Ol lida maus manmeri bilong Maritime Koles, Divain Wod Yunivesiti, Luteran Skul Ov Nasing, Holi Spirit Katolik Yut grup na Luteran Sios yut i bin bung na autim tingting bilong ol.

Ol mama bilong Madang Katolik Women's Asosiesen na ol memba bilong Yunaited Sios tu i bin kamap long dispela kibung.



• **Dispela diwai kaving i stori long laip stori bilong Asbishop Leo Arkfeld. Zacharias Kram bilong Kambot viles i bin kamapim dispela wantaim han. Dispela diwai i wanpela tasol na em i bin dro antap long en. Piksa i soim taim Asbisop Arkfeld i yangpela long ples bilong em, wanem kain wok em i bin mekim taim em i kamap long PNG na taim em lapun. (Hap bilong dispela piksa i stap antap long dispela stori).**

NGO helpim wok bilong helt long Madang

OL haus sik wantaim ol liklik klinik na edpos long ol distrik na liklik ples long Madang nau bai inap long mekim saŋpela gutpela wok long helpim sindaun bilong ol manmeri long lukautim ol yet bihain long ol i kisim sampela liklik helpim i kam long wanpela non gavman ogenaisesen.

Dispela NGO em long Foundation for People and Community Development (FPCD) husat i gat tupela opis tu long Madang. Dispela opis em long Grow Project na Eco-Forestry.

Bos bilong FPCD, Mista Yati Bun i bin tok em i hamamas tru long helpim wok bilong helt dipatmen long Madang. Mista Bun i askim helt dipatmen long Madang long lukim gut ol dispela samting na skelim i go long ol haus sik olsem long Bogia, Aiome, Saidor, Waliun na Daigul wantaim ol liklik klinik long helpim sindaun bilong ol manmeri long ples.

"Wok bilong grup bilong mi olsem ol lain Grow Project hia long Madang i no sut tasol long wok bilong planim gutpela kaikai na mekim wok long katim diwai bilong yu yet. Nogat. Mipela i laik bungim olgeta dispela wok long helpim ol komyuniti bilong mipela. Sapos mipela i toktok long planim gutpela kaikai, mipela i mas lukluk tu long helpim ol manmeri tu long lukautim ples bilong ol, olsem ol i mas lukautim ol yet na abrusim ol kainkain sik", Mista Bun i surukim tok. "Mipela i no mas wokim ol haus sik tasol na larim ol i stap. Nogat, mipela i mas tokim ol manmeri tu long klinim dispela haus sik olsem em i samting bilong ol".

Ol dispela helpim we i bin kam long Ostrelia insait long wanpela bikpela ain boks i gat ol bet, matres, sia, ol liklik naip na arapela samting bilong mekim wok. Planti bilong ol dispela samting bilong mekim wok i no save wok long pawa na i gutpela bilong ol haus sik na klinik i stap ausait long taun we i nogat pawa long en.

"Planti bilong ol dispela samting i no save yusim pawa na i gutpela bilong i stap long ol helt senta we i stap long bus. Planti bilong ol dispela samting i nupela yet ol i no bin yusim. Dispela ol samting bilong mekim wok i no sekenhen. Nogat", Mr Bun i strongim tok.

Wanpela grup long Sydney, Australia we i save wok klostu wantaim FPCD, em long Australian Foundation for Asia Pacific (AFAP) i bin givim ol dispela samting i kam long FPCD bihain long Mista Bun i bin askim ol long givim em ol dispela samting we i bin sindaun nating i stap long bikpela bakstua long Sydney. Dispela bakstua long Sydney i gat kainkain samting bilong wok long haus sik i stap long en.

"Taim mi lukim ol dispela sia na tebol i stap long dispela bikpela haus long Sydney, mi bin askim sapos inap AFAP i putim ol dispela samting insati long ol bikpela ain boks na salim i kam long Madang. Na ol i tok yes na salim ken. Mi hamamas tru long dispela kain bekim. Nau mi laikim tu Madang haus sik long tilim ol dispela samting i go long helpim ol manmeri bilong yumi long ol ples", Mista Bun i tok.

Em i tok tu olsem dispela helpim em i no bilong nau tasol na bai pinis. Em i laikim olsem grup bilong em wantaim ol arapela NGO na arapela han bilong gavman long wok pung wantaim long helpim olgeta manmeri.

Long dispela taim tu, Mista Florian Sawan Bahin, siaman bilong Modilon Haus Sik i tok olsem dispela em namba wan taim tru bilong wanpela NGO long luksave na helpim helt dipatmen long Madang. Dispela em bikpela samting tru na soim olsem i gat bikpela tingting bilong wok namel i mas kamap namel long ol NGO, sios na gavman.

"Nau mi singaut long ol arapela NGO long kam na wok bung wantaim mipela. Nau i no taim bilong wok wanwan na hait i stap. Yumi mas wok long helpim ol pipel bilong yumi", Mista Bun i tok.

Long strongim toktok bilong Mista Bahin, narapela memba bilong Madang Haus Sik bod em long Mista John Levi husat i wok olsem namba wan kuskus i tok olsem helt dipatmen i gat bikpela tingting na laik long wok bung wantaim ol NGO long kamapim kaikai bilong dispela nupela helt plen we gavman i bin oraitim pinis.

"Mi gat bikpela hamamas long FPCD long luksave long wok bilong helt dipatmen. Mi tok tenkyu long em long dispela helpim we bai i sut tu long mekim kamap wanem ol tingting na toktok em gavman i oraitim pinis long dispela Nesanel Helt Plen we bai stat long 2001 na pinis long 2010", Mista Levi i tok.

Musa na Wama helpim ol sumatin

WENCESLAUS MAGUN i raitim

OL sumatin bilong ol yunivesiti, koles, teknikel skul na nesanel hai skul i kam long Madang na Raikos distrik i bin kisim helpim long mani bilong baim skul fi bilong ol we ol memba bilong ol i givim.

Memba bilong Raikos i bin save helpim ol pikinini Raikos i skul long ol yunivesiti, koles, teknikel skul na ol nesanel hai skul long las yia yet i kam inap long las wik. Las wik, em i givim ken K5,000 i go long faivpela sumatin bilong Yunivesiti bilong Papua Niugini na K3000 i go long

tripela sumatin bilong Papua Niugini Edukesen Institut long Palamen haus.

Mista Musa i tok em i bin givim K5,000 pinis long ol sumatin i skul long Yunivesiti bilong Teknoloji na em bai i go givim ol narapela K5,000 sampela taim gen long dispela yia.

Em i tok em i helpim tu ol arapela pikinini Raikos i skul long ol nesanel hai skul, ol koles, teknikel skul na ol nesanel hai skul insait long kantri.

Mista Musa i tok em i gat bikpela bilip na laik long saposim ol pikinini Raikos i stap long ol yunivesiti, koles, institut, teknikel skul, na nesanel hai skul long wanem ol dispela

yangpela man na meri bai bringim developmen i go long Raikos long ol yia i kam bihain.

Mista Musa i askim ol papamama long baim skul fi bilong ol pikinini Raikos i skul yet long hai skul long wanem em i nogat inap mani insait long diskresineri fan bilong Rurel Eksen Program mani gavman i save givim ol memba long baim skul fi bilong olgeta pikinini.

Long wankain taim, Memba bilong Madang, Jacob Wama tu i bin helpim ol pikinini Madang i skul long Yunivesiti bilong Papua Niugini las wik taim em i givim ol K25,000.

Mista Wama i givim dispela mani long ol sumatin bilong

UPNG bihain long ol i askim em long helpim ol long baim skul fi bilong ol.

Memba bilong Raikos i tok hevi bilong mani kantri i wok long bungim wantaim hevi bilong TESAS skim gavman i kamapim i givim hevi long ol papamama long baim skul fi bilong ol pikinini bilong ol. Na olsem em i gutpela long ol memba long yusim mani bilong RAP aninit long diskresineri fan bilong ol long helpim ol skul pikinini.

Tasol em i tok TESAS em i gutpela skim tu, long wanem dispela program bai suvim ol pikinini long wok hat long skul long kisim gutpela mak sapos ol i laikim gavman i baim hap skul fi bilong ol.



OPIS BILONG RUREL DEVELOPMEN

TOK SORI

Minista, Dairekta na ol Wokman

long Ministri bilong Opis bilong Rurel Developmen

I salim bikpela tok sori tru i go long Misis Pauline Koki, ol pikinini, ol tumbuna, Gavana bilong Is Nu Briten provins Hon Francis Koimanrea MP, ol famili memba na ol pipel bilong Pomio long dai bilong:

Leit

HON ALOIS KOKI, CMG MP

Long dispela taim bilong krai na sori, tingting na prea bilong mipela i stap wantaim yupela.


Jisas i tok, " Mi tasol em Kirap Bek na Laip. Ol lain i bilip long mi, maski ol i dai olsem olgeta lain bai stap laip gen. Ol i kisim laip i stap oltaim oltaim long bilip long mi na i no inap dai gen," John 11: 25-26.

SOL BILONG EM I KEN KISIM GUTPELA

MALOLO OLTAIM OLTAIM

HON WILLIAM EBENOSI, MP
Minista bilong Rurel Developmen

TONY KEKET
Dairekta - ORD



“Crisis Management - The Pacific Way”

Paper presented to the Conference on
“The Pacific - Zone of Peace or Sea of Troubles
 by

RT HON. SIR MICHAEL SOMARE

Minister for Bougainville Affairs, Papua Niugini

Australian Defence Force Academy, Canberra, Australia - Ogas 18, 2000

LUKAUTIM hevi i no bikpela samting tumas olsem pis na painim we bilong stapim ol dispela hevi long kamap bikpela.

I gat o nogat. I gat sampela we i bikpela tru long Saut Pasifik, em wanpela askim long lukluk bek long ol pepa i bin kamap long ol kain konpres long bekim ol dispela ansa.

Mi laik tokutolsem wanpela lida husat i helpim longtokaut long dispela ya, the We bilong Pasifik, em Sir Kamisese Mara bilong Fiji husat em ol i rausim em long taim bilong Militari Coup i kamap long Fiji.

Solomon ailans tu i painim sampela bikpela hevi long ol eria we ol agrimen i long mekim ol nesenel kapitel long kamapim program bilong rijonal koperesen " *The Honiara Declaration on Law Enforcement*, we ol i sainim long 1992

Semtaim, bihain long 8-pela yia bilong ol indai na trabel, Bougenvil i laik traim long kamapim gutpela sindaun long las tripela yia. Wok bilong kamapim pis long Bougenvil i kamap nau. Tasol mipela i no kisim pis yet.

Bikpela samting we i ken helpim pis long Bougenvil em long gutpela rot we nau mipela i ken lukluk na skelim.

Pis Bilding em wanpela bikpela bilong 5-pela prairiti gavman.

Ripot bilong mi bai toktok long tripela bikpela samting we i ken kamapim pis long Bougenvil: Pis proses, pis-meking, pis-kiping na pis-bilding.

Pinis bilong dispela ripot i ken tokaut long nupela rot We bilong Pasik long stretim ol hevi sapos ol arapela kantri insait long wan solowara i kisim olsem bikpela hevi long Bougenvil.

Tasol nau mi laik mekim sampela toktok long as bilong hevi i kamap long Bougenvil.

Hevi bilong Bougenvil i kamap long planti as.

Dispela hevi i bihain ol socio-ekonomiks, envairomen impek bilong main, na ol hevi long ol kinkain developmen i kamap long han bilong gavman, hevi namel long lokel komyuniti long i no kisim gut kompesensen na peimen bilong bikpela Kopa main long Panguna.

Taim hevi o travel i stat long pinis bilong 1988, ol police long Panguna i no inap stretim. Olsem na ol siganum Police Mobil Yunite long kamapim tasol dispela tu i no helpim long daunim hevi.

Singaut nau i go long ami long Difens Fos sapos sivel woa bai kamap - dispela hevi i stap long go bikpela na go long olgeta eria.

Taim Difens Fos i raus long ailan wantaim gavman dipatmen long 1990, dispela woa nau i kisim olgeta hap bilong Bougenvil.

Ol i singautim Difens Fos long boke long pinis bilong 1990, na dispela taim pait nau i kamap namel long ol yet, Bougenvil pipel.

Bougenvil Resista Paitman (BRF) i fom long traim stapim pait namel long Bougenvil Revolusenari Ami (BRA). Tupela wantaim i pait long bihain taim bilong Bougenvil sapos em i stap yet olsem provins bilong PNG o kamap independent.

Ol koumutuni i stat long bruk. Planti ol ovasis lain tu i bruk sapos ol bai sapotim PNG o Bougenvil. Na toktok bilong bringim pis long Bougenvil Ailan nau i mas gat ol

politikel lida bilong Bougenvil wantaim ol komanda bilong BRF na BRA.

Pis Meking

I gat planti as, i nogat gutpela komyunikesen namel long ol lida na mausman - na planti ol pis toktok we i kamap bipo i kam inap nau i no kamapim pis.

Difens Fos i kambek long Buka long 1990, na bikpela samting tru i kamap long dispela taim em leit Theodore Miriug i bungim ol lida bilong BRA paitman na long lusim gan na kamap long toktok long Arawa. Tasol dispela toktok i no bin kamap.

Bougenvil Tensisenel Gavman (BTG) i kamap bihain lo bilong Papua New Guinea na Theodore Miriung em i kamap premier.

I bin gat sampela miting i kamap long Bougenvil lida - namba wan i kamap long Australia na bihain long Nu Silan. Narapela bikpela samting em long Ocotoba 1997 ol opisel bilong nesenel gavman i bungim ol lida bilong Bougenvil long Burnham Ami Kem long Nu Silan, dispela taim *Burnham Truce* em ol i sainim.

Ol i senisim dispela *Truce* wantaim pis agrimen we i bin kamap long Lincoln Yunivesiti long Nu Silan long Januari 1998, na *Ceasefire Agrimen* i fom na ol i sainim long Arawa long Epril 30 long sem yia.

Nesenel Gavman nau i bingum olgeta lain long dispela agrimen BTG, BRA na Bougenvil Interim Gavman na tu Bougenvil Resistens Fos (BRF).

Tasol sampela strongpela het paitman bilong BRA we Francis Ona i go pas logn en i no stap long dispela tupela ples, Burnham na Lincoln. Nau yet ol i no sainim *Lincoln na Ceasefire Agrimen*

Ol i no stapim pis proses, tasol bai gutpela sapos ol i sainim dispela agrimen bilong tupela ples.

Pis Kiping Fos

Gavman bilong PNG long dispela taim i singaut sampela kantri long Saut Pasifik long kamapim Saut Pasifik Rijonel Pis Kiping Fos we ol i go long Arawa long Oktoba 1994.

Tonga i go pas long dispela Pis Kiping Fos na Australia i sapotim long kamapim gutpela ples we ol toktok bilong pis o gutpela sindaun i ken kamap. Tasol planti ol toktok i no kamap (Planti ol Bougenvil lida i toktok wantaim ol nesenel gavman na Bougenvil Trensisenel Gavman i fom).

Bihain long ol i sainim Burnham Truce na kamapim nupela ami, Truce Monitoring Grup i kamap. Nu Silan i go pas na i gat ol ami bilong Australia, Fiji, Vanuatu i helpim Bougenvil long kamapim gutpela taim long ples.

TMG i narakain long ol arapela pis kiping fos. Ol i nogat samting bilong pait wantaim ol. Orait ol i kisim ples bilong Peace Monitoring Grup we Australia i go pas log em long me 1998.

Taim ol i stat, samting olsem 300 ami na ol austai mna na meri long Nu Silan, Fiji, Australia na Vanuatu, PMG i stap long kamapim gutpela wok bung wantaim ol pipel long Bougenvil.

Bikos i gat kinkain ami long dispela PMG, dispela i soim tru olsem pis bai kamap long Bougenvil.

I bin nogat wanpela hevi i bin kamap taim Truce i stat. Olgeta pipel i stap isis na wetim tasol ol toktok bilong Nesenel Gavman na tu BTG.

PMG i stat long katim daun sais bilong ami bilong em. Bipo em 300 na ol i rausim 50 na namba long yia ol i

i kam long pes 12

rausim 100 long pinis bilong yia 2001.

Yuniated Nesen Observers Mission (UNOM) i sapotim dispela wok bilong PMG. Dispela komiti ya i gat ol maus bilong ovasis misin, ol politikel edvaisa na tu militari edvaisa. Olgeta i amamas tru long wok bilong PMG.

Wanpela bikpela wok bilong UNOMB em long kamap siaman bilong Peace Process Consultative Committee (PPCC) we olgeta man long sait bilong komanda bilong ol paitman long toktok long rausim gan.

Ministri bilong mi i kisim UNOM K200,000 long mekim wok bilong ol long kamapim awaness long ol paitman i mas stapim pait na rausim olgeta gan bilong ol.

Gavman i askim PMG na UNOM long stap long Bougenvil long taim kamapim gutpela sindaun name llong ol pipel.

Disisen bilong singautim arasait lain long kam stretim hevi blong PNG - Bougenvil, em i no isi ya.

Pis Biling

Agrimen bilong Pis Biling long Bougenvil i stat long 1998 - The Lincoln Agreement on Peace, Security na Developmen in Bougenvil, i kamap planti salens we ol i ken stretim long kamapi mwanpela pis tasol bilong Bougenvil.

Gavman bilong Australia i tromoi klostu K100 milien long traim kamapim gutpela sindaun long Bougenvil long las 5-yia.

Yuropean Yunion, Japan Nu Silan na Yuniated Nesen Developmen Program tu i gavim bikpela mani long kamapim pis long Bougenvil.

Helpim i kam long ovasis na tu gavman bilong PNG i kamap olsem K80 milien long wanwan yia, em nesene gavman i save givim i go long kamapim gutpela pis long Bougenvil. AusAids i givim planti mani tu long wokim bikpela long North-South. Yuropean Yunion i wokim ol han rot, liklik ples balus na tu bris bilong ol sip.

Ol viles i save planti kaukau, kopra na arapela kes krop nau i stap long mekim wok bilong. Wok bilong salim kopra i go ovasis i wok long kamap strong nau long ailan.

Bihain long 8-pela yia bilong ol hevi long Bougenvil, wok bilong lukautim mani na wok emdministresen i mas kamap gutpela long ai bilong ol pipel insait long Bougenvil yet na tu PNG. Arapela bikpela samting, olpela paitman, yut na ol komyuniti bilong ol i mas smpela kain we long kisim helpim na ol i ken kamapim gutpela sindaun long ples.

Sapos pis i laik kamap gut olpela paitman, yut na ol arapela lain husat i no save kisi mgutpela helpim i mas kisim helpim long traim kamapim pis insait long komyuniti.

Wok politikis bilong Bougenvil long ibhain taim, planti ol lida i amams na sapot gut tru. Mi salensim ol long kam na wok bung wantaim na givim gavman sampela kain ol askim bilong ol.

Planti ol toktok nau i stap we bai kamap tupela wik bihain long Wewak. Olgeta lida bai go long Wewak na sindaun na paitim toktok long pis agrimen bilong Bougenvil.

Bikpela toktok nau i stap em autonomi bilong Bougenvil, na Bougenvil i tingting long larim konstitusen i givim tok orait long kamapim referendum long larim Bougenvil i kisim independens.

Bikpela miting bilong Bougenvil delegesen long Loloata Ailan long mun Mas i tokaut olsem Bougenvil i mas kamap yet mak bilong ol na i noken wankain olsem arapela ol lain PNG

Bikpela toktok i kamap long dispela Loloata agrimen em Bougenvil Gavman bai kamapim sampela samting long nesene konstitusen long larim ol i kisim independens.

Wanpela eksekutiv woksap long Julai i toktok long kamapim aanew long nesene gavman ajensi long kamapim autonomi.

Las yia Suprim Kot i makim Rijnel Memba John Morris olsem Gavana bilong Bougenvil.

Bougen Interim Provinsal Gavman i tom na wok bilong ol long bungim ol Bougenvil leadu husat i bin kamap bung long wok wantaim. Kalkai i kamap bihain taim Bougenvil Interim Gavman i stap na wok klosut wantaim Bougenvil Pipel Congress (ausait gavman)

Long ol arapela toktok, politikis i nara-pela kain samting. Nesene gavman nau i luluk strong long ol progres bilong Bougenvil Pis Proses. Ol bikpela samting olsem long rausim ol gan.

Pis tru em noken trabel i mas kamap

Ol man naitng i no pilim gutpela taim ol i lukim gan na ol pret samting long ai bilong ol.

Wantaim helpim bilong Australia na Nu Silan, PNG Police Fos i kisim ol Bougenvil olsem riserv plisman meri. Haus slip, gan na transport em ol bai givim ol tu.

Atorni Jenerel na arapela ol gavman ajensi tu i stap long wokim kos haus na haus kalabus na salim ol wokman i go bek long Bougenvil long karim aut wok bilong ol.

Em i hat tru long fri na demokratik ileksen bai kamap bihainim Lincoln Agrimen sapos ol man i pore long gan. Na em i hat tu long lukim ol lida, komyuniti na sios i tromoi bikpela mani long bringim bek bel isi long graun.

Nesene Gamvna i pas tru wantaim pas na spirit bilong Lincoln Agrimen. Planti ol lida na pila long arapela hap bilong kantri i askim long gutpela pasin we ol strongpela het i wok long lusim pis proses sapos ol i no kisim wanema samting ol i askim na lai holim yet gan.

Pinis Toktok

Pis-meking, pis-kipling na pis-biling i no moa nupela sampela PNG na tu arapela Pasifik ailan.

Tasol i gat bikpela skut mipela i ken lainim long ol arapela na ken yusim long skelim hevi bilong mipela.

Mi savedispela kain ol skut i ken helpim long kamapim nupela We bilong Pasifik long sekyuriti kopere-sen.

Rijnel selp-help i mekim bikpela helpim tru long proses bilong Bougenvil Pis Proses. Nu Silan na Australia i helpim long holim toktok na Solomon Ailan i givim ples bilong sindaun na stretim toktok.

Planti man bilong arapela kain i stap insait long Saut Pasifik Rijnel Piskiping Fos long 1994, Truce

Monitoring Grup long tai bilong sainim Burnham Truce na Ceasefire Agrimen.

Australian na Nu Silan em ol bikpela kantri i sapotim pis proses long Bougenvil Ailan.

Tasol lukluk go bek long hevi na agrimen bihain long pis kiping agrimen i kamap, i gat bikpela spes i stap namel long o kantri insait long rijen.

Papua Niugini i luksave long taim em i sainaim Aitutaki Declaration on Rejonal Security Co-operation we ol i sainim long 1997.

Dispela Aitutaki Delarationi tokaut olsem dispela ol agrimen i no helpim na kamapim gutpela luksave long hevi bilong ol pipel insait long Bougenvil taim ol i askim long helpim.

Solomon Ailan i komplek bikos em i no kisim gutpela helpim i kam long ol kantri insait long wansol wara bikos long hevi em i bungim. Tingting bilong i kamap long wanpela bikpela ripot bilong Foren Minister miting long Apia, Samoa long mun Ogas 11.

Sampela hap toktok i olsem: "Ol minista i agri long kamapim proses long harim singaun bilong arapela memba long taim bilong hevi we Forum i no bihain."

Olsem na ol i kamapim wanpela woking komiti long kamapim tingting long kisim i go long kibung bilong Heads of Government long Kiribati long pinis bilong dispela yia.

Forum bilong Foren Ministeia i no mekim toktok, em i laik kamapim nupela We bilong Pasifik.

Nupela We bilong Pasifik i mas kamapim gutpela wok bung wantaim long kamapim gutpela kopere-sen long lukautim hevi insait long rijen.

Gavman bilong bai wok long stretim progressiv politikel toktok i kamap long Bougenvil long traim kamapim pis we i ken stap oltaim.

Mi bilip olsem dispela em sampela gutpela na aidia nogut we ol arapela kantri insait long kanti i ken yusim long kamapim nupela We bilong Pasifik long lukautim wok pis long kamap tru

Tenk yu

Putim bikpela hop long kot i stretim wari



• **Dispela Aborigini famili em Gunner na meri bilong em Cibilo na pikinini man bilong ol Darren i go insait long kothaus bilong harim kot long Stolen Jeneresen.** *Piksa i kam long Weekend Australian niuspepa.*

Dispela samting bilong Stolen Jeneresen we taim ol waitman i kam long Australia planti krismas i go pinis, ol bin wokim nogut long ol asples Aborigini pipel na kisim planti ol pikinini long ol papamama bilong ol. Nau ol dispela lain i kisim samting ya i go long kot na planti Aborigini pipel i putim sapot bilong ol na i kam inap nau, ol i wok long singaut long gavman bilong

Australia long wokim pablik tok sori long ol. Praim Minista John Howard maski i luksave long asua we ol tumbuna bilong ol (waitman) i bin mekim tok em no inap long wokim pablik tok sori. Tasol kot long dispela wik i tok posisen bilong gavman long i no wokim pablik tok sori em i stret. Ol Aboriginel lida i no givap na ol i tok ol bai pait strong

yet long kisim kompensesen long gavman long dispela samting. Planti Aborigini i gat hop bihain long Jastis Maurice O'Laughlin i bin tok em i luksave olsem tru keis bilong Stolen jeneresen i stap, samting gavman i wok long laik abrusim bikos ol i bilip olsem nogat planti Aborigini em ol i bin kisim ol olsem ol Stolen Jeneresen.

Bai igat wok painimaut yet long Rasia samarin



• **Ol famili bilong ol sampela daiman kru i lukluk long Samarin sip bilong Rasia.**

Bai i gat wok painimaut long Nuklia nevi sip bilong Rasia, Kursk we i bin go daun long solwara na bagarap na we olgeta 118 kru long sip i dai long en long Ogas 12 long hap solwara ol i kolim long Barents Sea. Ol ripot i tok taim ol atoriti long Rasia i wok long askim wanem samting tru i bin kamapim bitua ya, ol kain tingting olsem birua wantaim foren samarin o sampela lain yet long sip i gat kros wantaim ol atoriti bilong sip na i ken kamapim hevi.

Ol famili bilong ol dai kru i sori nogut tru na ol i wok long karim ol plawa samting na go lusim long hap solwara we samarin sip i go daun long en. Presiden Vladimir Putin bilong Rasia long neseneletres i bin tok sori na i tok sapos wok painimaut i painim sampela lain i stap insait long sampela paulwok na sip i kisim birua, ol bai givim bikpela mekim save long ol. Difens Minista Igor Sergejev husat i bin givim risain leta bilong taim misin long sevim ol kru i feil i tok

ol bai lukluk long olgeta rot na namba wan hap bilong wok painimaut bai pinis long dispela wik. Em bin tok ol atoriti i wok long lukluk, glasim na skelim ol satalait piksa long ples we birua i kamap long en. Em i tok long lukluk bilong em bihainim ol wok painimaut, planti kru i bin dai kwiktam tasol taim birua i kisim sip. Em bin tok dispela samting we i bin kamapim birua long sip i nogut tru na sip wantaim ol kru i kisim birua kwiktam.

RAMU SUGAR



The Sweetest Thing

Midel Is balus birua kilim 143 pipel


Manama, Bahrain: Ol i painim bodi bilong olgeta 143 dai pipel husat i bin stap insait long wanpela Galp Air balus we i bin mekim ron bilong em long Cairo long Ijip i go olsem long Bahrain long Midel Is. Birua i bin kamap long dispela wik. Ol ripot i tok wanpela long ol daimna i bilong Australia husatr i bin stap planti yia long Midel Is.

Dairekta bilong Bahrain Sivil Difens Abdul Rahman bin Rashed i tok olgeta lain long balus i bin dai taim balus i pondaun na i go daun long solwara long Galp. Ol bin painim tu rekoda we i gat ol tok tok long en na bai helpim ol ealain atoriti long painaut wanem as tru na birua i kamap. Planti long balus em ol skul pikinini husat i wok long go bek long Bahrain bihain long


sama skul malolo bilong ol. Ol ripot i tok planti famili bilong ol Galf na ol ausait kantri i save go bek long ol ples bilong ol bikos em i stat long nupela skul tem bihain long sama skul malolo. Ripot i tok ol bin singautim ol famili na hauslain bilong ol dailain long bung long Manama Hotel na luksave long ol lain bilong ol.

Wara em i laip na lukautim gut!

Wara bilong dring, wara bilong kuk long en, wara bilong waswas, wara bilong wasim klos, wara bilong kamapim pawa na wara bilong lukautim laip. Nogat wara nogat laip. Yumi mas lukautim gut wara bikos em i bikpela samting tru long laip bilong yumi. Planti komyuniti long wol nau i karimaut ol aweanes long lukautim wara bikos wara i stap na wok i laip i stap. Ol ripot i tok ol turangu lain o ol lain i nogat inap samting i save peim 12 taims moa long wanpela lita wara winim ol lain i gat gutpela wara sistem long taun. Ol ripot i tok long sampela kantri olsem neks neiba bilong yumi,



• **Tupela pikinini bilong Saut Sudan long Afrika i wasim han bipo long belo kaikai.** *Piksa i kam long WATER VISIONS magazine.* Jakarta biktaun bilong Indonesia ol puo lain i save peim 60 taim moa long wara, long Karachi Pakistan, 83 taims moa na long Port Au Prince long Haiti Karibien na Nouakchot long Mauritania, 100 taim moa.



Madang makim fainel tim

VOLIBAL RIPOT

MADANG Volibal Asosiesen i makim fanle tim bilong stap insait long nesanel volibal sempionsip long Pot Mosbi. Dispela sempionsip ya bai kamap long Independens wiken long Sir John Guise Indo stadium.

Ol eksekutiv i makim planti ol olupela representativ pilaia na i gat bilip olsem ol dispela ol pilaia bai go pas long ol yangpela pilaia long traim winim taitel bilong Madang.

Presiden Willie Bagore and sekretari Steven Kadam i tok olsem ol i gat bilip tru olsem Madang bai go insait long fainel bikos ol i bin holim longpela taim bilong trening stret.

Mista Bagore i tok i tru

Madang i nogat nem na i no wankain olsem Pot Mosbi na Lae husat i gat planti ol nesanel na intanesenel pilaia, Madang bai traim yusim wanem kain stail long putim strongpela salens egensim dispela tupela senta.

Presiden i tok i tru olsem ol pilaia bilong em i no longpela na nogat straik pawa, em i gat bilip tru olsem tim bilong Madang bai kamapim gutpela gem long sempionsip.

Tim spirit bilong ol pilaia i antap tru bikos ol i save olsem ol i makim Madang ya.

Skwat em: Joyce Balim, Nunua Balim, Samang Balim, Apol Bunag, Dulcie Aeava (vice captain), Leah Basidoda, Anne Kadam (kepten), Josie Eova, Maria M, Dorren J, Shelly J,

Yoripain Lalu and Gununpain Lalu. (mens) Iviki Heni Junior Momo, Hanz Angmai (vais kepten), Ivan Samon, Keith Gedabing, Romeo Sipau, Heni Mea (kepten), Martin Bobo, Rudy Kisom, Joe Koae, George Rasta and Leo Aukongo.

Na taim ol i stap long Madang, Memba bilong Madang Jacob Wama yet bai lukautim haus slip na trenspot.

Ol opisel em Moses Waleigik (tim menesa), Alois Kessak (namba tu tim menesa, Christine Ubenbeni (ekting tim menesa bilong meri), Steven Kadam (kosa bilong man), Dereck Yikolisa (kosa bilong meri), Mathew Raka (teknikel opisa) and Willie Bagore (presiden).

Referi i kisim taim long puripuri

PASIN bilong purpuri o blek mejik i no nupela samting. Ol bilak skin long Saut Afrika tu i save mekim long taim bilong pilai na i no Papua Niugini spot tasol i gat dispela hevi.

Las wik, sampela soka referi long Botswana insait long Afrika i surim tok olsem pasin bilong wokim blek mejik i bagarapim ol na ol i no save mekim gut wok referi.

Wanpela opisel bilong Botswana soka i tokaut long dispela insait long wanpela niuspepa, Gazette, olsem planti klab i save sutim tok long em i no save mekim gut wok referi taim sampela i save samting ya i no stret.

"Mi bin tok nogat long wanpela gol

bikpela mi lukim straiika i paitim golkipa na gol i go insait tasol samting tru dispela pasin ya i no kamap ya," dispela referi i tokaut long dispela.

Blek Mejik em bikpela samting tru long Afrika futbol. Na kain pasin tu i wok long kamap insait long soka bilong Papua Niugini tu nau long ol ruel eria.

Long Afrika, ol i save kolim olsem juju o muti. Pasin bilong wokim dispela ol kain pasin i save kamap long dresing rum we ol bun bilong man na ol kainkain kavavar we ol i save putim long su na t'siot na tu ol i save dring blut bilong man.

Gande helpim Norths long win

RAGBI LIG RIPOT

NAMBA wan top pilaia insait long Madang ragbi lig, Lawrence Gandhi i helpim Norths long autim sempion tim, Hawks, long Ron Alberts oval las wiken.

Gem ya em wanpela strongpela pilai stret tasol ol boi long Riwo i no surik long ol studen bilong Paramed.

Norths i kamapim strongpela gem tru long winim bikpela gem

bilong ragbi lig ya 22-18.

Kepten bilong Norths Kelly Miol, Paul Anton, Wagi Das na Herry Ginis, mekim bikpela pilai we skoa long namba wan hpa i sanap olsem Norths 12 na Hawks gat tu poig tasol.


Insait long namba tup hap, paia i kamap stret long ples klia we ol boi long ples Riwo na Madang Tisas Koles i pasim tok na kilim indai lam bilong ol boi long Hawks. Ol boi Norths i

kisim strong long kepten yet Miol na yangpela Kenneth Gande.

Yangpela Kenneth husat i kamapim gutpela gem tru i setim bik braks bilong em Sigerfred long surikim skao i go long 16. Bikman yet Lawrence i kikim konvesen na skoa i sanap 18.

Lawrence yet i putim arapela skoa na poin bilong Norths i surik i go long 22 na Hawks em 18 tasol.

• Ragbi yunion i wok long kamap strong insait long Pot Mosbi. Hia yu ken lukim gem namel long Harlequins na Defence IRPIR bilong Taurama Bareks.



Koiari bai holim gren fainel

KENNEDY EDENE i raitim

KOIARI ragbi lig bai holim gren fainel dispela bilong ed' long dispela wiken long Sande. Dispela bai namba 10 gren fainel bilong Koiari ragbi lig bihain long em i stat long 1991.

Long A gret gem, Hooks Tigers bai bungim IBS Pukpuks. Dispela em wankain olsem jas yia tasol Tigers i soim moa pawa long winim taitel.

Gem namel long Tigers na Pukpuks bai gutpela stret long sindaun kaikai bua na lukluk long en.

Tigers i gat ol gutpela fowat olsem Ugunie Bore, Aiya Danny, Daela Noel na Joel Sinori. Hapbek Jonah Mairi bai lukautim hapbek posisen na tu lukautim gem plen bilong ol bipela pusi ket ya.

Jonah em wanpela trik mangi long pilai ragbi na ol Pukpuks mas lukaut. Ol Pukpuks bilong Sirinumu ol i no isi lain na bai givim sampela kain ol hait trik

RAGBI LIG RIPOT

bilong ol long Tigers.

Ol Pukpuks bin statim sisen gut na ol tok nogat samting bai pasin ol.

Ol tok wanem samting em trai na pasim rot bilong ol bai ol i kaikaim em tasol.

Kosa bilong Pukpuks Francis Rochus em i no nupela long gren fainel pilai. Em i bin lukautim Pot Mosbi Tarangau long sampeal yia i go pinis na ol i winim gren fainel. Na tu Rochus yet i kamap namba wan kosa bilong Dobo Warriors taim ol i go stap joinim Pot Mosbi Ragbi Lig kompetisen.

Dispela em namba tu sans na ol tok bai ol i no givim ol Tigers sans long win dispela taim.

Kepten bilong Pukpuk Philip Camilus i tok, "Mipela i kamap long hatpela we na mipela save Tigers ol i gat gren fainel ekse-priens na ol i bai i no isi long mipela."

Authur Edene bai go pas long lukautim gem plen bilong

Pukpuks long hapbek posisen. Em bai kisim bikpela helpim i kam long Max Kidu.

Pukpuk i gat ol bikplea fowat olsem Copland Tapio, Henry Amuh na Philip Camilus.

Tigers Gisale Salvo (fulbek), Kidu Eaka na Kelly Womara (winga), Debara Anton, Nuana Momoa (senta), Nelson Muri (five-eighth), Jonah Mairi (hapbek), Ugunie Bore, Daela Noel (props), Geita Warina (huka), Koare Timbe, Joel Sineri (seken rowa), Aiya Danny (lok fowet) na Mana Charlie, Biai Momoa, Rex Ureki na Sabea urdei bai ol stap long risev bens bilong o PUKPUKS: Amari Soger (fulbek), Jonah Oga, Kala Meia (winga), Bobby Jack, Bobby Oki (sentas), Max Kidu (five-eighth), Ata Edene (hap bek), Avara Nuana, Philip Kamalius (props), henry Amuli, Charlie Oga (seken rowa) Copland Tapio long (lok fowet) na Steven Eka, John Toina, Yari Nuana na Tom Waibora bai stap long reserv.

Aitape Eben Soka Kompetisen i kamap tait.

SOKA RIPOT

AITAPE Eben Soka kompetisen insait long Wes Sepik i wok long kamap strong namel long ol tim bihain long toktok olsem wanpela soka tonamen bai kamap long neks mun long amamasim Independens De.

Ol gem i wok long tait bikos ol pilaia i wok long taitim bun long pilai gut long soim stail bilong ol long stap long seleksen.

Long Sande gem long las wiken, i bin lukim wanpela gutpela strongpela primia gem namel long Badis na Rowels we Badis i bin autim Rowels 1-0.

Sekreteri blong Aitape Eben Soka Asosiesen, Mary Umba, i tok Badis na Rowels i bin pilaim strongpela gem tru long namba wan hap.

Mis Umba i tok olgeta dipatmen blong tupela tim wantaim ibin strong tru na tupela i wok long tromoi bal igo ikam long sait blong tupela wantaim.

Mis Umba i tok Rowel i bin strong long namba wan hpa na i bin holim strong bal i stap longpela taim long eria blong Badis na klostu ol i sutim gol.

Ol top pilaia bilong Badis olsem top golkipa Steven Awen na Rowel i bin traim long brukim kiau tasol i no inap. Long seken hap i lukim tupela tim wantaim i strong yet tasol bihain liklik Rowels i wok long slek daun

tasol Badis i no sotwin.

Ol fowat bilong Badis i kirapim pawa blong ol na ol beks long Rowels i sotwin na i no bin inap long difendim gut beklain blong ol.

Klostu long pinis blong seken hap winga blong Badis i bin sutim stret bal i go long senta na i pundaun antap long het blong senta fowat, Godfrey Drashima.

Taim Godfrey i kisim bal em i no westim taim, em i hetim bal i go klostu long gol maus, i siksti bihainim bal i go na i givim stret strongpela straik i go insait long kisim wining gol.

Mis Umba i tok plenti ol lain i bilip olsem Rowel bai i autim tiket blong Badis tasol ges blong ol i abris liklik. Rowels i bin gat plenti sans long win long pes hap taim ol i bin holim strong bal long beklain blong Badis, tasol goli blong Badis i bin pasim gut ol straik blong Rowel.

Narapela ol premia tim em long Maltiks wantaim FCS i dro long 2-2, na Guria wantaim Mangro Ruts i dro 0-0.

Long Namba Wan divisen Maltiks na FCS i bin sanap strong wantaim long wanwan, Badis na Rowels i no bin brukim kiau na dro 0-0, na Guria i bin daunim Mangro Ruts 1-0.

Insait long wimens divisen FCS i bin strong liklik na i bin daunim Maltiks 2-1, Rowels i brukim kiau blong Badis 1-0 na Guria ibin mekim save Mangro Ruts 3-0.



IKEN WOKIM GUTPELA SAMTING LONG YU



• Antap: Richard Sapias bilong Horlequins i laik ranawe long birua bilong em long Pot Mosbi ragbi yunion.

• Daunbilo raithan: Tupela sapota bilong Koki Dockers i rausim wantok bilong ol igo autsait long fil bihain long likilik kros wantaim wanpela pilaia bilong Yunivesiti Bulldogs. Dispela em kain pasin i save kamap long taim bilong gren fainel. *Oi Poto: ISSAC IKUAVI.*

• Daunbilo lephan: Ampaia bilong Cairns husait i bin kam na lukautim gren fainel bilong Aussie Ruls namel long Koki Dockers na Yunivesiti Bulldogs. Yunivesiti win las wik Sarere.

• Antap: Gol suta bilong Chevron Paramana Gewa Raula i holim bal na wing defend bilong Mermaid i laik stapim em.

• Raithan: Tupela susa ya bilong Pot Mosbi i brukim bun las wik long wimens soka resis.





Trening skwat bilong Osenia soka sempionsip

PAPUA-Niugini Futbal Asosiesen (PNGFA) bai tokaut long nem bilong Anda 17 na Anda 20 trening skwat long resis long ol sempionsip we bai kamap long yia 2001.

skwat. Na wankain skwat tu bai kamap long ol arapela soka senta long bihain taim. Skwat bilong Lae bai kam aninit long lukaut bilong Ludwick Peka na Richard Nagai. Nem bilong ol pilaia em Clive Vavine,

Garry Moka, Geoffrey Feegar, Jeremy Mogi, Jethro Olis, Clinton Ikwari, Karo Gorohu, Morgan Tokana, Obert Modagai, Peter Malabag, Peter Polong, Russel Inai, Steven Norbert, Tapas Changol, Yomson Sandy, Edward Wek,

Ezra Yareki, Gedion Kaian, Harris Weveke, Jonah Hansel, Kamo Kila, Moses Jambi, Percy Mataio, Philip Tomowoda, Robert Numbas, Sam Modelewa, Sam Charlie, Sopeng Spotnik na Tiale Topotol.

Enga Mioks bukim spes bilong gren fainel



• Peter Sterlo bilong Vipers sanap strong long takol egenisim Enga Mioks. Soritumas, Vipers train gen neks yia.

SP KAP RIPOT

ENGA Mioks i soim olsem dispela 60-0 win long Wabag long namba tu raun egensim Rabaul Guria i tru bihain long ol i nekim ol namba tri taim long bungim namba wan spes bilong SP Kap gren fainel.

Mioks i mekim save long ol Tobras long Rabaul 27-24 long winim namba wan spes. Na long Mt Hagen, Mt Hagen Eagles i strong moa long daunim pawa bilong Mendi Muruks 22-4.

Mioks nau bai malolo na wetim wina bilong Rabaul Guria na Mt Hagen Eagles. Muruks em i baiba nau long kompetisen.

Ol boi Enga i kam long bihain long winim dispela gem. Long haptaim skoa i sanap olsem Rabaul Guria i go pas 14-11, tasol ol i kirapim paia long namba tu hap long winim dispela gutpela gem.

Kosa bilong Enga Mioks Toksie Nema i amamas long ol pilaia bilong em na givim bikipela tok amamas i go long tupela pilaia Raymond Karl na Tuksy Karu long dispela gutpela win bilong ol.

"Mipela i pilaia olsem tim taim mipela stat long pilai, na olgeta pilaia i mas kism tok amamas bilong mi." Nem i tok.

Em tu i salim bikipela toktok amamas i go long Enga Provinsal Gavman na ol pipel

bilong Enga husat i save sapotim tim.

Gavana bilong Enga Peter Ipatas husat i stap long grensten bilong Lae Ragbi Lig long lukim dispela gem i amamas tru long ol pilaia bilong Enga Mioks i winim dispela gem ya.

"Mipela long soim ol arapela pipel long kantri olsem mipela em namba wan senta insait long kantri," Ipatas i tok olsem.

Kosa bilong Guria Jeff Wade i tok ol boi bilong em i pilai gut tasol ol i mekim planti asua tumas na ol i lus.

"Em i wanpela strongpela gem. Tupela tim wantaim i skorim 5-pela trai tasol mipela ol Guria i no kikim gut konvesen na mipela i givim gem i go long Enga Mioks," Wade i tokim Wantok.

"Mipela bai stretim dispela mistek agensim Mt Hagen Eagles na traim pilai gut long salensim Enga Mioks long gren fainel," Em i tok.

Wade i tok amamas i go long Lucas Solbat na fulbek Stanley Akinu husat i kamapim strongpela gem tru maskim ol Enga Mioks i putim presa long tim.

Ol lain i skorim trai bilong Guria long namba wan hap em Chris Pukikil na Jessie Ulunga i kikim penalti gol na Ale Mathew i skorim tupela trai na hapbek Stanis Kale i kikim fil gol long ran bihain long Guria 11-14.

Insait long namba tu hap, ol

fowat bilong Enga Mioks Raymond Karl, Paul Minape, Leo Kondai na Nathan Anjo i wok long stat kamapim strongpela gem na brukim difens bilong Rabaul Guria long skoa.

I no longtaim gutpela gem i kamap na Ray Tela i sko long surkim skoa bilong ol i abrusim Guria 15-14.

Tasol Guria i no wari. Fulbek Stanley Sukot, Winga William Tale na Kelly Nopi i pilaia strong long stapim ol Wabag long skoa isi.

Ol i pilai i go na Tuksy Karu i skoa bihain long em i abrusim ol difens bilong Guria long surkim skoa i go 21-14. Em yet i kism konvesen long surkim skoa bilong Enga Mioks i go antap.

Guria i wok long pilim olsem ol bai lus nau, ol fowat i stat long wok hat. Ol pilaia olsem Solbat, Giamuki Tau, Channel Aquila na Peter Dunn i wok long kism bal i go brukim difens na setim Kelly Nopi long skoa long surkim skoa i kam klostu liklik olsem 21-18.

Mioks i putim las trai bilong ol i kam long Young Pes. Karu i kikim konvesen na skoa i sanap 27-18. Tasol ol Guria i salim skin stret na Pukikil i putim i las trai na Alunga i kikim konvesen na skoa i stap 24-27.

Guria nau bai bungim Mt Hagen Eagles long Kokopo long dispela wik Sande.

12 tim givim nem long sempionsip

PNG SOFBAL RIPOT

WANPELA ten tu (12) tim i givim pinis nem long stap insait long nesenel sofbal klab sempionsip we bai kamap long Pot Mosbi long Independens wiken.

Pot Mosbi mens, Pot Mosbi wimens na Pot Mosbi junia sofbal asosiesen i go pas long stretim dispela sempionsip.

Ol tim bilong man husat i tokaut long stap insait long dispela resis em, MSC, Waragai Jets (Rabaul), Karanas (Lae), Unicats (Mt Hagen), Gazelle na AB Bears (POM). Na tim bilong ol meri em Bullets (Goroka), Ashes (Rabaul), Malangan (Mt Hagen), Wantoks na AB Bears (POM).

Siaman bilong Ogenaising Komiti Francis Dakenny i tokaut olsem wok redi bilong dispela sempion i wok long kamap na i gutpela ol senta i mas taokaut sapos ol bai salim tim o nogat. Dispela em long givim inap taim long PNG Sofbal Federesen long redim dro.

Dakenny i askim olgeta senta long ringim Steven Raphael long stretim

trenspot na haus slip bilong ol bipo ol i ken kam long Pot Mosbi.

Siaman tu i tokaut long Macellu Pasok olsem tonamen dairekta bilong dispela nesenel sofbal klab sempionsip. Pasok em i wanpela bes ampaia long sofbal.

Ogenaising Komiti i askim pablik long noken salim dring na kaikai long taim sofbal sempionsip i stat bikos POM sofbal klap i kism tok orait long salim ol kaikai na dring long redim ol yet long nupela sisen.

Dispela 4-pela de sempionsip bai stat long Septemba 15 na pinis long Septemba 18. Ol tim bai stat long kamap long Pot Mosbi long dispela sofbal resis long de Septemba 14.

Rijonel sofbal ampaia Tony Simitap i askim olgeta sofbal ampaia long givim nem bilong ol na mas kamap long wanpela miting long Bisini Graun long dispela wik Sande.

Simitap bai kamap olsem tonamen sif ampaia na i laik olgeta ampaia i mas kamap long mekim wok bilong ol.

Momase kism nupela sponsa

MADANG SOKA RIPOT

WANPELA ilektrikel kampani, Niugini Electrical, i sponsarim Momase soka klab wantaim ful uniform bilong olgeta gret.

Las wik, menesa bilong Niugini Electrical Gush Tibong i givim dispela helpim i go long opisel bilong Momase soka klab. Dispela uniform em bilong A gret, Riserv gret, Anda 19 na Wimens divisen.

Momase em wanpela lapun klab bilong Madang soka Asosiesen. Em i stat long 1980 na i winim planti primiasip kik resis na tu i makim

Madang long PNGFA nesenel klab sempionsip planti taim.

Presiden bilong Momase Paias Bokorum i tok em i amamas long helpim bilong Niugini Electrical kampani.

"Mipela i nogat gutpela jesi long longpela taim nau na mi amamas tru long helpim i kam long dispela kampani ya," Em i tok.

Em i tok klab i wok long kamap gut tru long Madang tasol sponsa tasol i save mekim ol yangpela i giv ap.

Mista Tibong i tok kampani bilong em i amamas long helpim ol spot klab,

grup na wanem ol asosiesen i laikim helpim.

Kampani bilong em i amamas long givim dispela nupela jesi i go long Momase klab na em wanpela komitmen bilong kampani long helpim ol spotting grup insait long Madang taun.

"Mipela i mekim olsem long larim ol yangpela i pilai soka na noken tingting long ol kain pasin nambaut," Tibong i tok.

Klab ya i bin kamapim sampela ol intanesenel pilaia olsem Alfred Gabong, Daniel Dou, John Panu, Carson Victor na John Tirimu.

Eagles i kism seken sans long SP Kap

SP KAP RIPOT

FULBEK bilong Mt Hagen Eagles Augustine Justine i kamapim gutpela gem na skorim tupela trai long helpim tim bilong em i stap yet insait long resis bilong SP Kap long las wik Sande.

Justin i putim tupela trai long helpim Eagles i winim Mendi Muruks 16-4 long maina semi fainel long Rebiamaul oval.

Yangpela fulbek ya i mekim bikipela senis tru insait long tim we i helpim ol Mt Hagen long kism sekens sans bilong ol.

Tupela tim wantaim i kamapim gutpela gem stret tasol yangpela Justine tasol i mekim ol boi i bilong Eagles i win.

Eagles nau bai bungim Guria long dispela wiken long Kokopo, Is Nu Briten long painimaut long husat tru baing bungim Enga Mioks long gren fainel. Fainel ya bai kamap long Pot Mosbi.

Mt Hagen Eagles i bihainim olgeta liklik stail bilong ragbi lig long winim dispela gem. Tasol Muruks wantaim kepten Petrus Thomas, Wari Sengiso, Cedric Kengi na Bobby Mangope husat i wok long brukim tru difens bilong Mt Hagen Eagles.

Eagles i no kism gutpela sevis tumas long senta bikos David Gomia na Max Tiri i kism bagarap. Ol Muruks i misim sevis bilong Ruben Ruing husat i kism saspensen i kam long PNGRFL.

Justine husat i skorim wanpela trai

bilong Eagles long namba wan hap tasol i giamanim difens bilong Muruks na ran i go skorim trai. Dispela em wanpela trai i kism skoa 4-0 i go long hap-taim.

Insait long namba tu hap, wankain stail i kamap. Dispela taim em Muruks i winim bal na i wok long giamanim gut difens bilong Eagles.

Hapbek bilong Muruks Tommy Kerak, Amos Imuli na Joseph Omai i wok long pilai strong long traim skorim trai.

Tasol ol Eagles i kamapim strongpela difens we planti bal i bin lus long takol tasol Justine i skorim. Em i setim bikipela fowat John Waka long skor.

Henaol i no abrusim konvesen na skoa nau i go 10-0. Stanley Akinu bilong Eagles husat i save pilai long fulbek i kism wanpela penalti long surkim skoa i go long 12-0.

Albert Paka, Yapet Tee, Kom, Kom Rumints, Francis Poli, Kuli Jacobs na winga James Kops i kamapim gutpela pilaia tru.

McConnor na Stanley Akinu i strong tru na stapim planti gutpela sans bilong Muruks long putim trai.

Kops i skorim wining trai taim em i kism wanpela gutpela bal i kam long Akinu.

Wanpela trai bilong Mendi Muruks i kam long Wale Molosie.



IKEN WOKIM GUTPELA SAMTING LONG YU

Yunivesiti tingting strong long maina primia taitel

PMSA RIPOT

ANZ YUNIVESITI soka klab nau i tingting long winim maina primia bilong Pot Mosbi soka asosiesen bihain long gutpela win bilong ol long Sande. Yuni i wilwilim SP Brewery 2-0 long bikipela primia kik resis.

Dispela win i helpim Yuni long kamap 5-pela poin klia na ranawe long Rapatona. Ol boi Manus i no laki tumas bikos yangpela boi bilong Cosmos i kamapim gutpela gem long dro wantaim ol 1-1.

Gol bilong Yunivesiti i kam long Mathias Ire bihain long papa bilong klab, Joe Aisa i kikim wanpela gutwan i go long golkipa bilong SP Brewery Bradley Bakuwai husat i no holim bal na Ire i tasim i go insait long net.

Paulo Patterson, boi sais 28 bilong Milen Be i wok long kamapim tru nem olsem man i ken kisim ples bilong Jasper Patterson. Boi ros ya i flaim wanpela gutpela straik i go insait lor.g bal long helpim Yunivesiti i win.

Win nau i helpim Yuni long sin-

daun long 51 poin. Rapatona 46, Defence SP Brewery holim yet namba tri ples wantaim 39 poin na Defence i stap namba foa ples wantaim 38 poin.

Cosmos na IBS PS Yunaited i stap long namba faiv ples wantaim 28 poin. Ol arapela tim i sanap olsem Babaka 23, Guria 21, Blue Kumuls 20, Tawala 18, Tarangau 16 na Kurti Andra 7.

Na long dispela wiken, Yuni bai bungim Blu Kumuls. Ol plisman i no kamapim paia moa ating lam bilong ol i mas dai ya.

Ol pilaia olsem Steven Mune, Brian Tani na Adam Andiki i mas slek pinis o. Andiki, boi Aigob ya i mas mekim bikipela wok olsem na em i save painim hat liklik long kamap long trening.

Sapos Yunivesiti i winim Blu Kumuls, ol bai gat sans long pilai insait long nesenel klab sempionsip long Lae. Na gutpela nius moa em, sapos ol i winim husat i sempion olsem Rapatona na ol arapela tim, Yunivesiti bai gat sans long makim PNG long Osenia sempionsip.

Rapatona bai bungim SP Brewery. Tupela wantaim i strongpela tim. Sapos SP Brewery i tingting gut na blokim

ol biknem pilaia olsem Geoffrey Emang, Duri "Ice block" Yarawi, Peter Punau, John Ngahan na Francis Moiyp, ol bai win.

Ol bia pes tim i gat ol pilaia olsem Matis Sam. Sam em wanpela kain stail pilaia i ken winim tru arapela ol pilaia long stail pilai bilong em. Em i gat nem olsem kunai na i luk olsem kunai nau bai paia taim tupela tim ya i bung.

Kosa bilong SP Brewery Baku Bakuwai i gat sampela kain trik we em i ken daunim tru Rapatona long dispela wiken.

Defence bai tu gut long winim Wikila Tarangau long dispela wiken. Kepten bilong Difens Selan Elizah, Patrick Kaega, Michael Tobias na Greg Baro long swipa posisen mas traim hat long winim dispela gem.

Las wik, klostu ol Difens i mekim kosa Komet Parkop i kra i tasol laki tru ol i kambek long seken hap na winim dispela gem 2-1.

Insait long arapela gem, Babaka bai nekim Tawala, Cosmos bai putim gutpela salens long IBS PS Yunaited na Guria bai tu gut long Kurti Andra.

Tupela Pukpuk kam bek long Nu Silan

RAGBI YUNION RIPOT

WANPELA pilaia bilong PNG Pukpuks Paul Joseph i kamapim nem bilong kantri taim em i helpim tim bilong em, Kahukura long winim gren fainel namba tu taim. las wiken.

Kahukura i autim namba wan birua tim, Te Puna long gren fainel.

Dispela win bilong Kahukura nau bai promotim tim i go long Baywide Primia Divisen long neks ya.

Paul Joseph yet i skorim namba wan poin long penalti. Qrait bihain long dispela ol bikipela fowat bilong Te Puna i kambek na winim bikipela gran na Kahukura i mekim planti asua na ol i kisim penalti.

Long namba wan hap, skoa bilong tupela tim i sanap olsem Te Puna i go pas wantaim 9-pela poin na Kahukura i gat tripela poin tasol.

Insait long namba tu hap, ol i kamapim gutpela pilai long bringim skoa i go daun long 9-6. Tasol ol i moa sans na kikim arapela tripela penalti na skoa i sanap 12-6.

"Mipela i gat sans long skoa tasol mipela i no tingting gut olsem na ol

boi Te Puna i putim rivers gia long mipela," Paul Joseph i tok olsem.

Samting olsem 10 minit i stap, Paul Joseph husat i stap fulbek long namba tu hap i kamap gutpela pilai.

Joseph i kisim bal long fulbek posisen na em i ran i go na setim bikipela fowat bilong em, Marcus Verooe long putim trai. Verooe em bikipela namba 8 bilong tim na las wik em i skorim trai long semi fainels na tim i go long gren fainel las wiken.

Te Puna i nap long winim gem tasol ol yet i no kikim gut penalti long las minit.

Joseph yet i no amamas wantaim tim bilong em bikos em i kisim balus na joinim arapela skwat memba bilong em long Bay of Plen Steams Nesenel Provinsel Sempionsip.

Boi PNG ya i winim spes long fainel skwat na ol bai go resis long sempionsip long dispela wiken.

Arapela tupela PNG pilaia long Nu Silan James Pomat na Paul Pomoso i kambek pinis na pilai long klab bilong ol. Pomat i pilai wantaim Difens klab na Pomoso i go bek gen long joinim Wanderers.

Goroka makim junia ruls tim bilong sempionsips long Rabaul

RULS RIPOT

ISTEN Hailens Ruls Futbol i makim pinis wanpela Anda 17 trening skwat bilong em long makim provins long nesenel ruls futbol sempionsip we bai kamap long Rabaul long Indipendens wiken.

Ol selekta i makim 37 pilaia i kam long tupela klab insait long taun kompetitisen. Nem bilong dispela tupela tim ya em Asaroka Tigers na Goroka Town.

Dispela tim ya bai kisim kosing bilong Peter Lassel na Ekime Gorosahu bihain long ol i tokaut long fainel 25 pilaia.

Dispela anda 17 kompetisen i stat bihain long Developmen Opisa bilong Ruls Futbol bilong Australia Rules

Futbal League (AFL) Andrew Cardzow i raun lukluk long Goroka long bigin bilong dispela ya.

Nem bilong ol pilaia em Morgan Genia, Richard Trumb, Albert Gise, David Kuvi, Emos Gorosahu, Jack Lakas, Givisapo Buko, Eddie Mara, Bart Tanga, Francis Ngava, Saito Gorosahu, Gerard Lassel, Jeffrey Basse, Andrew Som, Dickson Kuvage, David Bule, Alex Avio, Buko Kora, Numa Loggal, Frank Kuvi, Francis Robin, Samson Yamet, Sakis Maa, Terrence Gunure, Osupe Ole, Urick Logen, Bosco Nomo, Wesley Steven, Sive Peter Joseph Kare, Rickie Valam, Noris Avimo, Michael Luke, Nahu Kui, Menex Vanu, John Arthur and Samuel Avio.

Boga i skorim moa gal yet insait long hoki kompetisen

HOKI RIPOT

VAGI Boga i wok long kamapim nem long Pot Mosbi hoki wimen's divisen olsem wanpela top skora taim em i helpim tim bilong em, Rockets long dro wantaim MRDC United long wiken.

Na long Sande, em i skorim 4-pela arapela gol gen long helpim tim bilong em i wilwilim stret AirLink 9-1.

Long resis bilong A gret, Air Niugini winim MRDC United and Bismark 1-0, Rocket i autim Sunam 1-0. Na arapela gem, Rockets i dro wantaim MRDC United 0-0.

Bismarck husat i lus long namba wan gem i tainim bek na winim PNGBC 1-0.

Long resis bilong wimen A gret, Bismarck i memeim stret AirLink 5-1. Rocket husat i winim AirLink 5-0 las

wiken i tingting long mekim wnakain pasin long dispela wiken egensim MRDC United.

Tasol dispela tingting bilong ol i abrus bikos MRDC United i givim hat taim long ol pilaia olsem Bog, Rose Gerari na Jacinta Ka long skorim gol.

Golkipa bilong United Paula Pusuahai na ol difenda olsem Kwuapena Tapo, Bettay Sana na Helen Havora i stapim Rockets long skoa.

Boga husat i yusim spit bilong em gut long skorim gol bilong Rocket insait long namba wan hap bilong pilai.

Insait long namba tu hap, ol pilaia bilong Rockets olsem Jacqueline Gaoau na Theresa Boga i no paitim gut bal na pilaia bilong MRDC United Shirley Ponasu i kisim na levelim skoa 1-1 inap fainel wisel.



• Tabitha Suwae (no 8) bilong Telikom i kikim bal long abrusim birua tim. Dispela kain stail i save kukim Bisini Soka graun olgeta wikend. Long dispela gem las wiken, Telikom i winim Kula 2-0. Telikom long dispela wiken bai bungim Tarangau long Wimens 1.

Miting long stretim taekwando spot long kantri

I BIN gat wanpela miting i bin kamap namel long PNG Spots Federesen na PNG Wol Taekwando Asosiesen long stretim sampela hevi i kamap long wok bilong lukautim taekwando insait long kantri.

Dispela miting i bin gat sampela strongpela toktok i kamap namel long PNG Spots Federesen sekretari Sir John Dawaninura na tu presiden bilong PNGWTA Jamuga Stone.

Sir John i askim Mista Stone wantaim tupela arapela opisel bilong asosiesen long traim stretim toktok we i wok long stapim gem bilong taekwando insait

long kantri.

Taim Stone i kisim sans long toktok, em i bin mekim sampela strongpela toktok we i laik kamapim kros tasol Sir John wantu tru i askim em long toktok isi na stretim toktok.

Sir John i toktok na helpim Stone husat i harim tok na miting namel long tupela grup i bin kamap gut tru.

Sekretari jenerel i tokim Mista Stone olsem dispela miting i no bilong bagarapim o daunim arapela man. Miting ya em bilong helpim taekwando i kambek gen olsem memba bilong PNGSF.

"Mipela i no stap long traim

sutim tok long arapela," Sir John i tok.

Sir John i askim Stone na PNGWTA long holim wanpela miting long stretim hevi bilong ol na traim long fomim wanpela asosiesen tasol.

Jamuga Stone na interim kaunsil bai bung wantaim Edward Kassman long traim paitim toktok na kam aninit long wanpela bodi tasol.

I bin gat paul i kamap long pablik olsem wanem taekwando asosiesen i trupela. Bikipela samting tru nau em long traim stretim 2pela bodi long kamapim wanpela asosiesen tasol.



IKEN WOKIM GUTPELA SAMTING LONG YU



• Antap: Ol Katolik yut long Mosbi i mekim save long brukim kundu na singsing long makim kalsa de bilong ol yut long las wik igo pinis.



• Ol pipel bilong Kompam Ambum i redim ol pik bilong givim ol gavman lida husat i bin go raun long ilektoret bilong ol long las mun long Enga provins.



• Lephon: Ricky Mitoi i toktok long ol bikman bilong gavman long hevi bilong ol smolholda kopi groa long noken senisim kopi indastri.

• Raithan: Simeon Wai, Joseph Wamil, John Pundari na Henry Smith i sanap long opim nupela distrik opis bilong Kompam Ambum.



TOK SORI

Long makim ol eksekutiv na ol memba bilong Pipels Demokretik Muvmen Inc. Mipela i salim bikpela tok sori tru i go long Misis Pauline Koki, 7-pela pikinini, na Hon Francis Koimanrea, MP long dai bilong papa bilong ol na brata, Leit

Hon. ALOIS KOKI, MP.

Man bilong ol pipel, trupela lida ol pipel i save long em i save rispekim em, wol i bin gutpela ples taim em i stap long hia...


• JAMIE MAXTONE-GRAHAM

Vais Siaman, Nesenel Eksekutiv

• DR JACOB JUMOGOT

Sektreteri Jenerel, Nesenel Eksekutiv

PEOPLE'S DEMOCRATIC MOVEMENT INC.



WANTOK

NIUSPEPA BILONG YUMI OL PAPUA NIUGINI STRET

Gavman i mas redi long stretim NPF

KOT bilong painimaut ol hevi na asua bilong Nesenel Providen Fan (NPF) i wok long go het yet na i stat long soim planti asua na ol eria we i kamapim hevi long planti milien kina bilong ol memba.

Long dispela wik mipela i harim olsem planti hevi na asua em insait yet long ol bod memba bilong NPF yet we ol i save mekim ol disisen long mani i mas go we o mani i mas mekim wanem wok.

Planti tausen wokmanmeri long ol praivet kampani insait long Papua Niugini i gat mani wantaim NPF. Na namba bilong mani NPF i bin lusim pinis mak olsem K120 milien na dispela i no liklik mani. Menesmen bilong NPF i tok wanpela rot tasol em ol bai katim seavings bilong ol memba i kam daun long hap long mekim NPF i wok na ron gen. Narapela em long Gavman i mas painim wanpela K100 milien na givim i go long NPF hariap long strongim wok bilong em nau.

Wok painimaut nau insait long wanpela Kot ol i kolim Komisn ov Enkwairi i wok long kamap we ol loya bilong Gavman i wok long bungim olgeta bosman bilong NPF na ol Gavman opis long bekim ol askim na tokaut long wanem samting ol i gat save long en long NPF.

Bikpela askim nau em sapos dispela Komisn ov Enkwairi Kot i kamautim olgeta asua na ol nogut we i kamap na nem bilong ol lain husat i mekim dispela bagarap i kamap ples klia, bai wanem samting i kamap?. NPF menesmen i tok i nogat wanpela rot moa long stretim o kisim bek dispela K120 milien we i lus pinis. Na wanpela rot tasol em long katim hap seavings bilong ol memba insait long NPF akaun. Dispela em tru bai mekim bikpela bel pen tru long planti tausen manmeri bilong Papua Niugini.

Olsem na ol memba i laik save long Gavman bilong Sir Mekere Morauta long tokaut long wanem eksen em bai mekim bihain long dispela Komisn Kot i autim ol bagarap na nem bilong ol lain i go pas long dispela bagarap. Plis, noken tru tasim mani bilong ol memba bikos em bai bikpela asua tru insait long kantri. Gavman yet i mas kamap wantaim rot na eksen bilong stretim dispela hevi bilong NPF bihain long wok bilong Komisn ov Enkwairi i pinis.

Kot bilong Komisn ov Enkwairi i no save kotim wanpela man o givim sas long wanpela man. Wok bilong em, em long soim aut tasol ol bagarap na asua we i kamap na husat i go pas long ol dispela asua.

Dispela Kot i autim pinis nem bilong planti lain we ol i gat toktok long tokaut long wanem as ol i mekim sampela kain disisen long dispela taim o bilong wanem na ol i no bihainim lo long mekim sampela disisen long wok bilong NPF.

Komisn i soim tu olsem sampela bisnis we NPF i tromoi mani i go long en i no stret na i no bihainim gutpela toktok o disisen bilong miting. Olsem na mani i lus nating long ol dispela bisnis.

Klostu dispela kot bai pinis na ol pipel i wetim tasol long wanem narapela muv gen bai Gavman i mekim bikos ol i pret bai mani bilong ol wantaim NPF i paia nating.

I tru olsem Gavman i no inap tokaut yet long wanem eksen em bai mekim bihain long dispela Kot. Tasol em i mas gat sampela plen i stap pinis long wanem samting em bai mekim bihain, na tu Gavman i mas givim sampela bel isi long ol pipel olsem mani bilong ol bai ino inap lus nating long dispela hevi. NPF i no bisnis bilong Gavman. Em bisnis bilong ol praivet kampani na ol woklain bilong ol.



• Bodi bilong Alois Koki i kamap long Mosbi long Tunde na bai go long haus palamen. Leit Alois Koki memba bilong Pomio long Is New Briten provins.

Somare askim BHP long stretim ol bagarap pastaim

OL HAP HAP nius

• PAPA bilong Papua Niugini na Minista bilong Maining, Sir Michael Somare i tokim BHP kampani long stretim hevi na bagarap bilong bus na graun long Westen provins pastaim long em i laik pasim wok bilong em long OK Tedi Maining long Tabubil.

Sir Michael i tok sapos BHP i strong long i laik lusim wok na go, ol kompensesen bilong bagarap we i kamap pinis i mas redi long baim i go long ol asples pastaim, na Gavman tu i mas kisim bek 51 pesen (%) sea wantaim OK Tedi maining na salim long ol arapela maining kampani husat i gat laik long kam wok maining long Papua Niugini.

BHP kampani i holim 51% Nesenel Gavman i holim 30% na narapela 19% em ol arapela maining kampani i holim olsem see bilong ol long wok bilong maining long OK Tedi maining.

• LONGTAIM memba bilong Pomio long Is Nu Briten provins, Alois Koki i dal long dispela wik long ples bilong em bihain long em i bin sik longpela taim i kam. Mista Koki i bin stap long palamen olsem memba bilong Pomio moa long 20 krismas olgeta. Leit Alois Koki em bikpela brata bilong nau Gavana bilong Is Nu Briten provins Francis Koimanrea. Leit Alois Koki em memba bilong Pipels Demokratik Muvmen

(PDM) na i bin mekim planti bikpela wok long developmen bilong dispela kantri olsem lida na memba bilong nesenel palamen.

• MOROBE Provinsel Eksekutyv Kaunsil (PEC) i kamap wantaim disisen long las wik Fraide long rausim longtaim na olpela Edministreta bilong provins Aine Sengero. Long Tunde dispela wik, Ekting Gavman Cornelius Smith i bin salim toksave pepa i go long opis bilong Mista Sengero long toksave long em olsem Gavman i pinisim em long wok bilong em olsem Edministreta bilong Morobe provins.

Ol i givim em 7-pela de long railim ol bekim bilong em na givim PEC long skellim. Sapos PEC i no amamas long ol toktok bilong em, bai ol i salim toksave i go long Praim Minista na em bai kamapim long Nesenel Eksekutyv Kaunsil (NEC) miting we ol bai pinisim kontrak bilong Mista Sengero na makim rupela Edministreta bilong Morobe provins.

Mista Sengero i bin sevim Morobe provins olsem Edministreta long longpela taim i kam inap las wik we dispela senis i kamap.

• OL NGO grup insait long Hailas rijon i sainim wanpela petisen pepa na salim i go long Praim Minista Sir Mekere

Morauta long givim marimari long tripela soldia we kot i kalabusim ol long sas bilong mutini we i bin kamap long taim bilong Sandlain hevi long 1997 long PNG. Kot i salim tripela soldia ya i go long kalabus bikos long wok bilong ol insait long dispela operesen Rausim Kwik. Ol NGO long hailans na arapela hap tu i wanbel olsem Praim Minista i mas larim ol i go tri bikos ol i no inap stap insait long dispela mutini sas nating. Hevi bilong Sandlain tasol i mekim na ol dispela soldia i kamapim dispela samting. Ol i tok sapos Nesenel Gavman yet i no bin kisim ol Sandlain Ami kam long Inglen, bai ol dispela soldia i no inap mekim dispela asua. Ol i tok tripela soldia i bin wok hat long rausim ol Sandlain ami i go bek bikos sapos nogat bai ol Sandlain ami i go bagarapim laip bilong planti manmeri long Bogenvil Ailan long 1997.

• SITI bilong Lae i gat rekot olsem planti dai i save kamap long salit bilong ol ka i ron long rot. Long dispela as, ol pilsman wantaim trafik opis na Transport opis i wok bung wantaim long stat sekim ol ka na PMV bas we i nogat laisens, sampela ino gutpela moa long ron long rot na ol arapela samting moa we inap putim ka i go long birua. Dispela operesen i stat long dispela wik. Mande na i mekim planti pasindia bilong ol PMV bas i sanap longpela taim tru long ol bas stop na tu i no bin go kamap hariap long ples bilong wok.

STARLAND FREEZERS

Starland Freezers Ltd.
 Whole Sale Freezer P.O. BOX 3836 BOROKO
 PHONE: 325 1161

Save gut long wokim:
Sosis, Ais Mit, Kakaruk na Bata

Septemba Spesel

baim tupela katen Sosis na kisim wanpela katen Fis

FRI!

Long we: Gabaka Street, Gordons
 Sapos yu laik save long ol Holsel o Ritel prais

Ringim: 325 1161 or Fax : 325 0780



MOROBE PROVINSSEL GAVMAN

P R E S S S T A T E M E N T

Mi raitim dispela pas long givim toktok long sait bilong mi long sampela samting i bin kamap long Tutumang. Mi bin kirap nogut taim Presiden bilong Nabak Lokol Gavman Kaunsol Andrew Horongke i kamapim wanpela praiwet membas bill long floa bilong palamen. Nogat wanpela taim mi bin harim wanpela tok hevi i kam long ol lokol gavman kaunsol presiden o Slaman bilong PEC o gavana olsem mi no mekim wok bilong mi gut. Nogat wanpela taim mi ino bin stretim wok bilong ol gavman disisen na mi laik tok olsem mi no save long as bilong dispela samting i kamap long palamen bilong mipela. Sapos i bin gat wanpela samting i kamap long sait bilong edministresen, em bai i mas kam long ai bilong Tutumang na PEC bai lukluk long em na stretim.

Askim bilong Deputi Gavana Hon. Conellus Smith i bin as bilong bikpela kros pait long Tutumang. Em i bin laik painim aut K2 milien Morobe gavman i no bin yusim i bin go we. Dispela askim bilong em tasol i mekim na ol sampela lain long Tutumang i bin laik rausim em tasol nogat. Ol dispela seim lain ya i kirap na sutim tok gen long mi. Ol i no bin tingting long sekim gut toktok bilong Mista Smith. Mi bin raitim wanpela pas igo long PEC aninit long Siaman bilong moni Ryoden Algel long askim em long dispela K2 milien. Em i givim eksplenesen bilong em na Sam Sewe bilong PEC i tok orait long em.

Long 1997 moni bilong developmen grent long Morobe Provinsel Gavman (MPG) aninit long PID i olsem K6.792 milien. Long pinis bilong ya 1997 Morobe Provinsel Gavman i kisim tasol K4,632,800 aninit long ol PID moni.

Narapela K2,159,200 ol i bin kisim bihain long pinis bilong ya 1997. Morobe Provinsel Edministresen i bin pasim tok wantaim Provinsel Tresera olsem ol bai rausim moni long opereting akaun bilong provinsel tresery na putim i go insait long opereting akaun bilong MPG. Dispela moni, ol i tok, bai kam aninit long baset bilong 1998.

Provinsel tresera i bin raitim 9-pela sek-moni bilong K2,159,200. Dispela moni em i bin putim i go insait long akaun bilong MPG. 1998 baset na ol dispela moni ol ino yusim long 1997 developmen grent i bin kamap olsem "internal" bilong MPG long 1998 baset. Dispela moni i bin kamap olsem moni i kam insait olsem moni bilong 1997 developmen grent ol i no yusim.

Ol project bilong ol dispela moni, ol i no bin kamap na ol i bin tok olsem bai moni i kam bek na go long narapela hap.

Tasol Joint Distrik (JD) na Baset Praioritis Komiti (BPC) i bin tok orait olsem moni long dispela ol projek bai ol i rausim na put i go long ol arapela projek we i nogat mining long ol distrik.

I nogat wanpela samting i rong long dispela bikos JDP na BPC i gat pawa long setim ol projek bilong ol distrik.

Long sait bilong Menyamya distrik, JDP nad

Dispela em i soim brek up bilong ol skul fi subsidi:

711 Division of Education	-	K1,534,700 budgetted
282 Division of Education	-	K1,681,800 budgetted
Total Provincial Budget	-	K3,216,500 budgetted
National Provincial Budget	-	K4,000,000 budgetted

Total Subsidy Budget - K7,216,500

Sapos MPG i apim edukesen subsidi i go long ol greids insait long taun na ples skul, ol bai nidim K7.2 milien. Dispela i winim pinis K6 milien bilong ol edukesen subsidi.

Provinsel Edukesen Baset bilong 2000-08-1 i olsem:

Subsidy	-	K7,216,500
TSC	-	K23,853,500 (salaries)
Infrastructure	-	K930,000
- Construction	-	K54,000
- Maintenance	-	K1,265,300
Admin. Budget	-	K400,000
National Education Services	-	K800,000
Leave Fares	-	K800,000
Total Education Budget	-	K34,519,300

Dispela i makim 40 pesen bilong MPG Baset.

Pe bilong ol subsidi

Paid In 1st Qtr 2000	-	K700,000 Nat. Government
Paid In 2nd Qtr 2000	-	K600,000 MPG
Total Released to date	-	K1,300,000

BPC i tok orait long kisim moni bilong projek long distrik na putim i go long stretim ol rot insait long distrik. Olsem na i gat sampela senis long ol projek olsem Wapi Jenereta, Menyamya Rural Electrification, Yapa-Semi Rot na Menyamya Hai Skul. Long sait bilong Wapi Jenereta ol i pilim olsem stesen ino bin sindaun gut yet na i nogat yus bilong jenereta.

Moni ol i bin rausim bilong ol rot i bin go long dispela ol projek:

Humba-Yaimba, Hungumella-Asuka, Sikon-Wowoka, Waraemen-Yapeka, Okina-Tamaya, Hengitaula Watama, Warabung-Tui, Menyamya-Kwalalim.

Total bilong olgeta wok bilong stretim rot i olsem K2005. Dispela senis long ol moni ya i stap insait long lo.

Moni ol i no yusim long 1997 ol i bin karim i go insait long 1998 baset olsem 711 revenue or moni i kam insait long baset.

Dispela senis JPD na BPC yet i bin tok orait long em, na dispela moni ol i bin yusim aninit long Appropriation Act bilong 1998.

Dispela ol moni ya i no go paul nabaut.

Mi laik egensim toktok bilong presiden bilong Nabak. Edministresen bilong mi na mi yet ino laik wok wantaim ol Morobe provinsel politisen. Dua bilong mi, tupela deuti edministreta bilong mi, ol provinsel progrem edvaisa, distrik edministreta na ol lokol gavman meneja i op long ol nesanel na provinsel MP na ol presiden.

Ol LGC presiden i save kam long ofis bilong mi olgeta dei long askim long ol projek bilong ol.

Ol LLG menega i stap insait long Morobe provinsel edministresen tu na ol i save wok hat long kisapim gutpela sinaun na wok long lokol level gavman.

Mi rausim pinis 6-pela LLG meneja, mi dimotim 4-pela and sasim 2-pela. Ol dispela presiden i mas amamas long ol samting mi wok long mekim aninit long plen bilong ol LLG bilong ol.

Ol toktok long fri edukesen ino tru. PEC ino bin tok orait long fri edukesen long ya 2000. PEC i bin tok orait long moni bai i go long helpim olgeta skul insait long provins.

Toktok olsem bai i gat fri edukesen i no stret bikos provisel gavman i no gat inap moni long givim fri edukesen.

Ol manmeri mas save gut wanem samting em fri edukesen na wanem samting em subsidais edukesen.

Fri edukesen i olsem olgeta moni bilong lukautim wanwan pikinini long skul bai kam long MPG. Sapos dispela hap tok i tru, 40 pesen bilong MPG bast bai i go long edukesen. Dispela bai kamap olsem K6 milien.

Tasol, subsidais edukesen i olsem ol papa mama na gavman bai kontribuyt i go long ol skul mangi.

Aninit long 2000 baset MPG i tok orait long bai i gat moni i go long wan wan ol greid insait long ol ples na taun skul.

Moni ol skul bai kisim i olsem -

- ol skul bilong ples bai kisim 100 pesen subsidi. Dispela bai go long ol elementeri skul, greid 1-8 na 50 pesen subsidi i go long greid 9-10 long ol hai skul i stap long ples.

- ol skul bilong taun bai kisim 50 pesen subsidi i go long ol elementeri greid 1-8 na narapela 50 pesen bai go long ol greid 9-10 long ol skul long taun.

Ol edukesen subsidi i bin go antap long Epril i go nap long Jun. Long Janueri i go long Mas ol papamama i bin peim skul fi ol PEC i makim.

Gavman bai givim narapela hap bilong skul fi subsidi bilong em bilong lukautim Oktoba igo nap long Disemba na MPG bai lukautim subsidi long Julai i go long Septemba.

Mi laik stretim tok tu long ol dispela projek we ol i no pinisim.

Bunsil Wharf (Siassi Island) - wanpela save-man bilong drilim graun i bin kam long mekim wok painimaut long wanpela gutpela hap long wok long sindaun. Ol Unitech i bin glasim ol pipia graun na ol i painimaut olsem ples i

no gutpela long putim wof. Olsem na ol i painim yet ples long putim dispela wof. Dispela kampani husat i go pas long dispela wok i wok long traim na pinisim dispela wof nau.

Nawaeb, Kabwum (Derim) Hai Skul - moni ol i putim bilong ol dispela hai skul, PEC i kisim bek bikos i nogat moni bilong givim. Pastaim long VAT i bin kam insait, provinsel gavman i bin save mekim moni insait yet long provins na i bin igat inap moni bilong ol projek. Bihain long VAT i kam insait, provinsel gavman i bin sot long K700,000 long olgeta mun. Olsem na provinsel gavman nau i gat bikpela dinau i go nap long K4 milien i go insait long 2000 baset. Dispela as tasol na MPG i katim ol projek bilong 1999 na tu 2000.

Moni ol i bin makim bilong ol dispela projek ino bin nap long go het bikos ol toktok bilong graun na ol wok painim aut i no stret yet.

Tasol ol dispela wok i wok long go het nau na klostu nau bai ol i givim moni i go long ol dispela projek.

Mi yet wantaim ol opisa bilong mi i gat gutpela wok wantaim ol nesanel na provinsel memba.

Dispela tasol na mipela inap long go het wantaim ol niupela rifoms. Morobe i bin go pas long ol niupela rifoms taim gavman i bin statim long 1995 na nau yet Morobe i winim ol arapela provins long wok bilong ol rifom.

Waigani yet long Pot Mosbi i tok olsem Morobe i go pas long ol narapela provins long kantri wantaim rifom bilong ol.

Plening na data sistem bilong mipela em nambawan tru long PNG. Dispela, em Yunaited Nesens yet i tok.

Mi no yusim ol saveman bilong autsait long helpim long plenim sot, midium na long tem plen bilong Morobe provins. Mi bin kamap Monitoring Evaluation Unit pastaim long taim ol rifom i bin stat. Dispela yunit nau olgeta narapela provins i wok long yusim.

Olsem na olgeta samting mi wokim i winim ol samting nogut ol man i wok long gijaman long em.


Husat man i gutpela tingting bai ino nap long gat tingting nogut long ol samting mi mekim bilong Morobe.

Mi laik tok tenkyu long ol nesanel memba bilong Morobe na ol Kaunsol presiden husat i rausim ol gijaman toktok insait long Tutumang. Pasin bilong ol tasol i soim bilip ol i gat long mi.

Mipela olgeta inap long stretim gut olgeta hevi sapos mipela sindaun na toktok gut wantaim.

Wanem gijaman toktok i bin kamap long Tutumang bai bagarapim olgeta wok bilong mipela.

Mi nogat koros wantaim ol memba bilong edministresen bilong mi na ol lida husat i toktok egensim mi na mi laik givim gutpela bel long ol we bai sevis bai inap long go het long ol pipel bilong Morobe.


AINEA R. SENGERO, MBE
Provincial Administrator

YOUR ACCOMMODATION GUIDE

Port Moresby

BUDGET INN

QUALITY FOR LESS
Affordable airconditioned rooms with
ensuites for Business and Holiday makers
Pokies and Restaurant Facilities available
323 1611
Fax: 325 5991
P.O. Box 6361, Boroko.

Rabaul

THE BEACH HUT LODGE



K95.00
per night
P.O. BOX 924, RABAUL, E.N.B.P.
PHONE: 982 9226 FAX: 982 9225

Lae

KLINKII LODGE

Lae
25 Rooms
Breakfast, Lunch, Dinner available
GROUP BOOKING DISCOUNTS
472 6040 472 7359
Facsimile: 472 5931

Hagen

NU-WAKA LODGE

Cheapest Executive Suite Rooms at Affordable Rates:
* Two Restaurants * Heuvini Bar * 17 Deluxe Rooms
* Satellite TVs, In-House Movies, Phones, Freezes, Shower and
Coffee making facilities in each room.
* Located 11km to Town from Airport * Safe, Friendly Environment
* Special Weekender Rates
"When in Hagen, Stay With Us"
Ph: 542 2888 Fax: 542 2886
P.O. Box 739, Mt Hagen

IN THE HEART OF THE CITY



The Most Convenient
And Comfortable
Budget Accommodation
All Airconditioned Rooms with
Satellite Colour TV
321 7983
Fax: 321 7396
Cnr. Douglas & Hunter Sts.
P.O. Box 1319, Port Moresby

Rabaul




Hamamas Hotel

"Simply the best address in town"
BUDGET rent-a-car CAR
Airport Lounge Ph/Fax: 983 1970
hamamas@global.net.pg

HONALE 414 LAE GUEST HOUSE

Weybank Street Opposite Sp. Brewery
Planning a weekend holiday in comfort or on business trip to Lae. We
have a place for you at our prestigious guest house at the corner of
Weybank Street. We invite you to experience our service and check out
the unbeatable rates: Single K50/night, Double K95/night day only K90.00,
Self-contained K95/night Double K75. We also provide airport pick up and
drop off at mere K10 for our guest. For reservation please ring us on
Phone: 472 7761 Fax: 472 3702.
Expatriates are welcome and hope to see you soon!

JUMA LODGE MT-HAGEN

BUDGET ACCOMMODATION
* SELF CONTAINED ROOMS
* CONFERENCE FACILITIES
* REASONABLE ROOM RATES
Reservations: 545 1310/545 1410
Facsimile: 545 1368
P.O. Box 740, Mt. Hagen

The Weigh Inn PORT MORESBY

Excellent Accommodation at budget prices. Great
location on freeway. One minute to town, drive five
minutes to Airport. Free Airport Transfer
* 22 Air-conditioned rooms with ensuites * Bars
* 25 Channel Satellite TV * Restaurant
* Back-up power & water
PH: 321 7777 or 321 1332

KOKOPO VILLAGE RESORT

100% NATIONALLY OWNED
* Budget Priced to Luxury rooms * Air Cond. TV &
Coffee/Tea Facilities in all rooms * Large garden setting
with a superb sea view * Central to all Amenities &
Attractions * Excellent Restaurant
* Car Rental * Airport Transfers
We specialise in catering for all occasions
Call us Now on
Phone: (675) 982 8060 or (675) 982 8070 or
(675) 982 9066 or (675) 982 8360
Fax: (675) 982 9061, P.O. Box 269, Kokopo.

LAE TRAVELLERS INN

Newly Open!
Providing Affordable but Quality Accommodation in Lae
Lae Travellers Inn boasts 36 fully sec. complexes comprising: 3
Deluxe suites * 20 standard rms with ensuites * 11 Budget rooms
* Conference room to fit 20 * Dining facilities * Commercial laundry and
more than adequate off street parking all in a quiet area of Lae City.
All deluxe and standard rooms are a/c, have direct dial tel. cable and
channel TV. Located on Vce St. off Coronation Drive, For enquiries
and bookings call us now!
Ph: 479 0416, P.O. Box 1918, Lae, MP 411

HAGEN AIRPORT MOTEL

* 20 Deluxe Rooms * Multi Channel TV
* Alcohol and Pokies Free Zone * Restaurants
* Pick up bus available
Only a minute away from the airport
For a quiet and relaxing stay in Mt Hagen.
Call Paul Owen on 545 1647 or fax 545 1618.
Double Rooms K110.00 VAT inclusive
Single Rooms K 88.00 VAT inclusive

KOKODA TRAIL MOTEL (SOGERI)

16 Family Rooms s. iff contained Bar, Pokies,
Restaurant, Conference facilities, BBQ,
Swimming Pool.
We cater for functions, conferences.
Just 35km from Port Moresby. Room rate
K60.00 per night.
Quote for conference or functions.
P.O. Box 374. WAIGANI NCD.
Ph: 325 4403, 325 4890

Seaview Beach Resort

Superb in Location, Best in Value
To make your stay with us a great experience
we have comfortable air condition rooms, with
private shower and toilet, cable TV, mini bar
fridge, phone, coffee/tea making and study
facilities.
ROOMS: Singles K75.00 per night,
Double K100.00 per night, Transit K55.00 per day.
Added Bonus: Tropical Breakfast, Airport Transfers. For
enquiries or reservation contact: Anne Marie Arns,
Ph: 982 8447/982 8377. Fax: 982 8071, e-mail: arns@datec.com.pg
P.O. Box 2259, Rabaul, ENBP.

MADANG

MADANG LODGE MOTEL & APARTMENTS

WATERFRONT ROOMS & APARTMENTS,
SWIMMING POOL - CABLE TV, PIZZA, SEAFOOD
& CHARGRILL STEAKS, CONFERENCE
FACILITIES - HERTZ RENT A CAR.
PH: 852 3395 FAX: 852 3292
EMAIL reservations@madanglodge.com.pg
website www.madanglodge.com.pg

GOROKA LODGE GOROKA

Budget Accommodation
Single to Family including Ensuites
* COURTESY BUS * COLOUR TV
* LICENSED * LARGE SWIMMING POOL
2 minutes from Airport
Ph:732 2411 or 732 1009 Fax: 732 2307
McNicholl St-P.O. Box 343, Goroka

The Shady Rest Hotel

The Best Rest in Town offers full facilities including
* Club Bar and dining facilities * Gaming area and
Lounge * Small conference and function Venue
* Low to Medium Rate Accommodation
We Look Forward to Being of Service to You
P.O. Box 5367, Boroko Ph: 323 0000
Fax: 323 0060
Email: shadyrest@daltron.com.pg

SUBMARINE BASE RESORT HOTEL RABAUL

* 10 Air Conditioned Bungalows on Beach
* Single to Family room
* Beautiful snorkelling and diving on doorstep
* Bar and Restaurant on Waterfront
* TV Satellite
* Submarine caves and Japanese Tunnels
* Daily sightseeing tours
* Airport Transfers
Phone/Fax: (675) 982 7200
Nonga Road, P.O. Box 1, Rabaul, ENB.

MADANG RESORT HOTEL

* All rooms Fully Air conditioned * Private Facilities/ Shower, Toilet
* Coffee Making facilities * Multi Channel TV, Telephone, & Radio
* Deluxe & Executive rooms with fax machines * Mini Bars
Accommodation Rates:
Standard: - K165/single, K180/twin double,
Deluxe: - K220/single, K235/twin double,
Executive: - K300/single, K315/twin double
All Rates are per night and are subject to 10% VAT
P.O. Box 111, Madang, 511, Papua New Guinea
Tel: (675) 852 2655 Fax: (675) 852 3325 Email: mnh@meltours.com

KAINANTU LODGE

SET IN THE EASTERN HIGHLANDS
2 1/2 Hours Scenic Drive From Lae
* Luxury Suites and * Budget Accommodation * In-House Video
* Licensed Restaurant * Bistro * Sunday BBQ Lunch
* Conference facilities * Reasonable Room Rates
Phone: 737 1021, 737 1020 or 640 4103
Fax: 737 1229 or 640 4102
P.O. Box 31, Kainantu

GRANVILLE MOTEL

Excellent Conference Facilities
Hire Car & Stretch Limousine
* 129 Ensuite Rooms * Self-Contained Units
* Bar/Restaurant * Weekly Live Bands
* Cable TV/Air Conditioned.
CLOSE TO AIRPORT
P.O. Box 1246, Boroko, NCD
Ph: (675) 325 7155 Fax: (675) 325 7672
Email: granvill@online.net.pg

MALANGAN BEACH RESORT

ROOM RATE: Single K180.00 + Vat
Twin K195.00 + Vat
Rooms with A/C, Ciding fan, Bar fridge,
Tea/Coffee facilities, Private Bathroom,
IDD/STD Telephone, Restaurant, Bar
available. P.O. Box 238, Kavieng, Ph:
(675) 984 2344 Fax: (675) 984 2452
Email: mbr@meltours.com

Smugglers Inn Resort Madang

(MADANG MODILON ROAD)
* Deluxe Accommodation
* Waterfront Accommodation
* Apartments (2&3 bedrooms)
* Waterfront Restaurant
* Conference Facilities
* Guest Swimming Pool & Spa
* Cable TV & Airconditioning
* Free Pick Up & Transfers
PH: 852 2744 Fax: 852 2267
P.O. Box 303, Madang, Madang Province

POPONDETTA

ORO GUEST HOUSE & Sum-Biripa Lodge

* ECONOMICAL * TOWN CENTRE * GOOD QUALITY ACCOMMODATION
CENTRE OF TOWN 21-CH. TV
"At Home" Atmosphere K65 Single
K92 Double K114 Triple
WEEK END SPECIAL Fr/Sa 1/2 Price FOR
TOURISTS...ESCAPE MORESBY Pass.Ship:
Lae(We) Alotau (Mo)
PH: 329 7127/438 Fax: 329 7246,
Box 2, Popondetta, Oro Province.

BUKA RABANZ GUEST HAUS

IN THE HEART OF BUKA
"a 3 minute drive from the airport walking distance
from the market & commercial centre & overlooking
the Buka Passage"
Catering for Functions-6 Rooms,
TV in Rooms-Laundry-Coffee Shop/Restaurant
Phone: 973 9730
Facsimile: 973 9950
P.O. Box 78, Buka, NSP.

KAVIENG KAVIENG HOTEL

* 22 Air Conditioned Rooms
* Licensed Restaurant
* Budget Accommodation
* Airport Transfers - Hire Cars
* Cable TV
Phone: 984 2199 Facsimile: 984 2283
Located in the centre of town,
Coronation Drv.
P.O. Box 4, Kavieng


VANIMO Vanimo Beach Hotel

(Owned by Relat Indah Limited)
* Hotel Rooms & apartment units
* Self contained, fully air conditioned, TV cables
* International standard restaurant
* Poker machine, video game, snooker etc
* Public bar
* Standby generator
Ph: 857 1102 or 857 1310, 857 1318 or 857 1018
Fax: 857 1131 or 857 1203 - P.O. Box 41, Vanimo
All are Welcome

Lamington Lodge

* 16 Rooms
SINGLE: K145.00 per night
DOUBLE: K170.00 per night
PHONE: 329 7222 Fax: 329 7065
P.O. Box 27, Popondetta, NP.

For your Directory Advertisements,
Contact: **WALTER D. EDWARD**
Telephone: 325 2500 or Fax: 325 2579



IS NIU BRITEN PROVINSEL GAVMAN

TOK SORI

Ekting Gavana bilong Is Niu Briten, Hon. Leo Dion, QMP, ol memba bilong Is Niu Briten Provinsel Asembli, Provinsel Edministreta, olgeta pablik seven na pipel bilong Is Niu Briten i laik tok sori i go long:

Hon. Francis Koimanrea, MP, Gavana bilong Is Niu Briten, meri na 10-pela pikinini bilong Late Hon. Alois Koki, CMG, MP long dai bilong brata, man na bubu bilong ol husat i dai long August 22, 2000.


Late Hon. Alois Koki, CMG bai stap long tingting bilong meri bilong em, Pauline, 4-pela brata na susa bilong em, 10-pela pikinini, 10-pela bubu na ol femili bilong em.

Tingting bilong mipela i stap wantaim femili bilong em long dispela taim bilong sore.

“Mi go long stretim ples bilong yu...wanem hap mi stap bai yu stap tu”.

HON. LEO DION, QPM, MPA
Ekting Gavana bilong Is Niu Briten

Modaged na Gerail



LONG bipo, bipo tru tupela pisin ya Modaged na Gerail i stap. Na Gerail em gat sotpela tel na em i save stap long bus. Modaged em i gat longpela tel na em i save stap long ples. Na i no save laikim tumas long raun long bus.

Orait stori bilong tupela i go olsem, Modaged em pisin bilong raun long ples na painim pekpek na i go insait long toilet na aninit long haus long digim na kaikai ol rabis samting.

Na Gerail em save laikim bai em i mas kamap wanpela klinpela pisin taim em i kam raun long ples.

Klostu long ples i gat wanpela bikpela diwai na dispela pisin i go antap na sindaun i stap na lukluk long tel bilong Modaged.

Tasol em i bin wari nogut tru long wanem tel bilong long em i gutpela na longpela tasol em i save bagarapim antap long pekpek na long graun tu.

Na Gerail i sindaun i go, i go na em i tingting planti tumas.

Longpela taim na Gerail i tok maski mi go traim askim poroman na mitupela i mas senisim tel hari-

ap. Kwiktaim sotpela tel i kalap i go long ai bilong Modaged na i tok poroman, inap long mitupela senisim tel o nogat. Long wanem mi lukim yu tasol yu no stret liklik.

Modaged i bekim tok, "Olsem wanem Gerail i tok, poroman yu gat gutpela tel. Tasol yu save tromoi nabaut long graun na mi ya tel bilong mi nogut. Tasol mi save lukautim gut. Modaged i tok poroman

ating em tru ya. Long wanem mi no man bilong bus. Mi man bilong ples tasol.

Olsem na 'mitupa bai senisim hariap tasol. Na kisim bilong mi na i go sevim gut antap long diwai na bilong yu mas i kam long mi bai ol tromoi nabaut long ples i stap.

Em tupela senisim ples na sapos yu lukim wanpela kain pisin i save i stap long bus i gat longpela tel

bilong em. Sapos yu tu long Niugini bai yu lukim planti man i save sutim long gan na wokim olsem kangal na ol i save singaut long em na sapos ol lukim narapela i stap long ples em i gat sotpela tu. Na man bilong raun insait long toilet na aninit long haus na digim pekpek na kaikai. Gras bilong tupela wankain i blak.

Paul Tang
Port Moresby, NCD.

Nem: Ben Pora Makal
Krismas: 19 (man)
Adres: P O Box 15, Kongibul Viles, Ialibu, SHP.
Save laikim: Raun lukim ples, painim nupela prens, serimol samting na draivim ka.

Nem: Nelson Paidu
Krismas: 19 (man)
Adres: C/- Yandu Trading, P.O. Box 132, Vanimo, Sandaun Province.

Save laikim: Draivim ka na raun lukim ol nupela ples, tok pilai wantaim ol poroman, harim lokol musik, raitim pas na mekim pren.

Nem: Yvonne Mai
Krismas: 14 (meri)
Adres: Vanimo Provincial High School, P.O. Box 122, Vanimo, Sandaun Province.

Save laikim: Go skul, mekim fani, harim musik, save laikim danis, raitim pas long ol pen pren na mekim pren wantaim ol manki na meri. Mi promis long bekim olgeta pas em mi kisim.

Nem: Nichoir Aralwire
Krismas: 14 (meri)
Adres: Vanimo Provincial High School, P.O. Box 122, Vanimo, Sandaun Province.

Save laikim: Watchim TV, swim long wara, tok stori, danis, pilai volibal, raitim pas na tok pilai.

Nem: Emelda Wasa
Krismas: 14 (meri)
Adres: Vanimo Provincial High School, P.O. Box 122, Vanimo, Sandaun Province.

Save laikim: Watchim TV, swim long wara, danis, pilai volibal, tok stori, raitim pas na tok pilai.

Nem: Harriet Hanson
Krismas: 24 (meri)
Adres: P.O. Box 1294, Cape Coast, Ghana.
Save laikim: Harim musik, pilai ragbi na rit.

Nem: Clare Lamor
Krismas: 15 (meri)
Adres: Malol Mission (Aindrin), P.O. box 15, Aitape, Sandaun Province.

Save laikim: Go long lotu, pilai volibal, waswas long wara, raun wantaim ol poro na mi promis bai mi bekim olgeta pas bilong ol penpren.

Nem: Jeffrey Moyowa
Krismas: 18 (man)
Adres: P.O. Box 352, Mt Hagen, Western Highlands Province.

Save laikim: Serim tok pilai, tok politiks, pilai ragbi tas, volibal, basketbal, ridim niusepepa, raitim pas i go kam long ol pen pren.

Nem: Taigiam Stanley
Krismas: 11 (meri)
Adres: P.O. Box 2229, Lae, Morobe Province.
Save laikim: Pilai, go lotu long Sanday skul na harim tok bilong ol tisa.

Nem: Maicol Manase
Krismas: 17 (man)
Adres: P.O. Box 2229, Lae, Morobe Province.

Save laikim: Go lotu na pilai spots olsem soka, volibal, basketbal, harim redio keset bilong Ziros volim (2). Feveret singsing em ol i kolim "em pasim malo na waswas long wara Watul" na wokim pren i go i kam long ol PNG manmeri.



Nem: Irias Jon
Krismas: 14 (man)
Adres: Huruf Community School, Lowa Watut, P.O. Box 2229, Lae, Morobe Province.

Save laikim: Go lotu na pilai spots olsem soka, volibal, basketbal, harim redio keset bilong Ziros volium 2. Feveret singsing em ol i kolim "em pasim malo na waswas long wara Watul" na wokim pren i go i kam long ol PNG manmeri.

Nem: Stanley Nasia
Krismas: 19 (man)
Adres: Marasas Village, Kaiapit, Markham, P.O. Box 2010, Lae, Morobe Province.

Save laikim: Go long lotu na paitim gita, pilai spots olsem volibal, basketbal, soka, raun wantaim ol poroman na wokim pen pren wantaim ol long PNG.

Nem: Giru Tata
Krismas: 15 (man)
Adres: Mafanazo village, Lowa Watut, P. O. Box 1119, Lae, Morobe Province.

Save laikim: Go lotu na singim ol gospel singsing na pilai spots olsem soka volibal, waswas long Watut wara na raun wantaim ol prens long wok, raitim pas long pren long ol narapela kantri.

Nem: James Kay
Krismas: 20 (man)
Adres: S. SEC Gaoego, P.O. Box 371, Kimbe, West New Britain Province.

Save laikim: Go lotu, tok pilai wantaim ol pren, raun wantaim ol poro manmeri.

Nem: Takman Willie
Krismas: 19 (man)
Adres: Kiunga Monfort Technical High School, P.O. Box 279, Kiunga, 335, Western Province.

Save laikim: Pilai futbol, watchim TV, go waswas long wara, mekim pren, tok stori na tok pilai.

Nem: Rita Lapu
Krismas: 15 (meri)
Adres: Tindua Primary School, P.O. Box 52, Ialibu, Southern Highlands Province.

Save laikim: Pilai basketbal, watchim EMTV, pilai musik, tok stori, helpim papamama na ridim ol buk mi save gat interes long en.

Nem: Elly Loya
Krismas: 16 (man)
Adres: Tindua Primary School, P.O. Box 52, Ialibu, Southern Highlands Province.

Save laikim: Pilai basketbal, watchim EMTV, pilai musik, tok stori, helpim papamama na ridim ol buk mi save gat interes long en.

Nem: Lorivia David
Krismas: 16 (man)
Adres: Tindua Primary School, P.O. Box 52, Ialibu, Southern Highlands Province.
Save laikim: Pilai basketbal, watchim EMTV, pilai

Wanpela taim tasol inap givim sik long yu



Dia LAIPLAIN,

Mi wari tru olsem mi mas kisim sik nogut long pasin pamuk. I no long taim i go pinis mi bin slip wantaim wanpela yangpela meri na bihain mi painim aut olsem dispela meri i wanpela pamuk meri.

Mi mas mekim wanem?

ONCE ONLY

Dia PREN,

Yu gat gutpela tingting long wari olsem yu mas kisim sik bilong pasin pamuk. Yu inap kisim sik nogut sapos yu bin slip wantaim dispela meri husat yu tok i wanpela pamuk meri. Sapos yu bin slip wantaim em wanpela taim tu em yu bai kisim sik yet. Sapos dispela meri yu bin slip wantaim i gat sik, em inap givim dispela sik long yu, maski wanpela taim tu, bai yu stil kisim yet.

Plantu meri husat i gat sik bai no

inap soim sampela sain o mak bilong sik long skin bilong ol tasol ol inap givim dispela sik long yu o husat man i slip wantaim ol.

Yu mas traim go long hausik na sekim sapos yu gat dispela sik. Yu no ken wet inap sampela mak i kamap long bodi bilong yu. Ol dispela mak bai olsem liklik sua, pen o sampela taim bai susu i kamap long kok bilong yu.

Sexually Transmitted Disease (STD) em olgeta sik we i ken kamap sapos yu mekim planti pamuk pasin wantaim kainkain manmeri. Dispela ol sik nogut i ken bagarapim yu sapos yu no kisim marasin hariap. Na i kam inap nau, sapos yu kisim sik AIDS long dispela kain wokabaut bilong yu, nogat wanpela marasin i stap long dispela graun inap pinisim dispela sik.

Dispela sik i save bagarapim bodi na slekim ol ami bilong bodi husat save pait long ol kainkain sik i kam insait long bodi. HIV (binatang bilong sik AIDS) i save go insait long bodi bilong manmeri taim tupela i puspup, mama i gat bel ken givim long pikinini na taim yu kisim blut long hausik long taim bilong sik.

Ol dokta i ken mekim tes long painim aut sapos yu gat HIV long bodi bilong yu. HIV inap kisim 3-pela mun long stat bagarapim bodi na soim aut olsem dispela sik i stap long bodi (ol i kolim dispela taim Window Period).

Bilong kisim tes na marasin long planti bilong ol hausik na klinik insait long kantri i fri na wanem samting ol i painim aut bai i no inap kamap long pablik bilong mekim yu sem, dispela em wanpela strongpela lo long haitim wanem samting yu gat.

Maski long slip raun planti em wanpela gutpela samting long stapim sik. Ol wok manmeri bilong helt i tok aut pinis olsem wanpela gutpela wei bilong i no kisim STD em long slip wantaim wanpela man o meri tru bilong yu, husat i no save paul raun planti.

Kondom em narapela gutpela rot bilong abrusim dispela ol sik tasol i no gutpela tumas. Yu ken stil kisim sik sapos kondom i bruk o sampela taim yu no yusim gut long taim bilong puspup.

Insait long wanpela marit we tupela manmeri i laikim narapela arapela, pasin bilong slip wantaim i wanpela gutpela samting stret. Insait long marit, tupela marit inap plen gut, tok tok isi na stap long gutpela taim na ples i moa gutpela long taim bilong slip wantaim.

I no gutpela wantaim ol pamuk meri we we yu haraip hariap na i no save wanem samting yu mekim, yu tingting strong tru long pinis dispela sikirap yu gat. Yu bai lus tingting long sik o birua na dispela inap bagarapim laip bilong yu.

LAIPLAIN

KANAGE



Kanage em bilong Vanimo. Em man bilong spak, yupela save Kanage em man bilong biksot long olgeta kona taim em kam long haus em kam isi olsem em i no save dring. Tasol samting tru em kilim skin pinis na kam long haus. Wapela taim meri bilong em krosim em na tokim em Kanage yu inap long spak o dring mi les long stap wantaim man save spak planti. Wapela taim na gutpela apinun Kanage lusim haus isi tasol na go kism 6-pela botol na dring i stap na em i no save olsem Misis Kanage kam spai long em na tanim go bek long haus. Kanage pinis dringim 6-pela botol na em ekting wokabaut isi na kam long haus na Misis Kanage askim, yu stap we na kam? Na Kanage tok mi go raun long rot na kam. Na Misis Kanage tokim em olsem, husat sindaun baksait krungut olsem sikau bilong maunten long as bilong diwai long nambis. Na Kanage tok nogat. Tasol meri strong tupela taitim toktok i go i kam na tupela meri bilong em kros. Nau tupela pinis kros na tupela slip, long nait Kanage em hot na em lusim trausis na em slip ok. Long nait yet Misis Kanage em slip na em i laik tanim long slip dispela taim o dispela nait tu em gutpela mun na lait kam insait long windo na Misis Kanage em lukluk i go na em lukim tupela silin-sot bilong Kanage em lait na Misis Kanage em ting wanem samting na em holim na pulim, man mi tokim yupela Kanage em kism taim stret. Na Misis Kanage tokim paps Kanage olsem yu kism em bia yu save dring i mas pasim nek bilong yu a? Na paps Kanage em kism taim na em slip isi i stap.

**Bonien Meiya
Vanimo**

Wapela taim Kanage bilong Wau i go raun long Finsafen long lukim ol papamama bilong em long ples Morukuo. Em kalap long sip MV Giamsao na i go taim em i go kamap long Buki we em kalap long wapela PMV ka ol kolim Kata Expres. Em sindaun long ka na tekov i kam long Gagidu taun long Finsafen so em i go daun na tokim draiva inap mi wan luk tasol long ol stua nambaut pastaim yumi i go na draiva tok yes. Olsem na em wan luk tasol pinis na ol kukim kostol haiwe rot bilong Fins i go na lusim na kism Fins Pindiu rot nau taim ol i go kam long ples Moruruo nau ka stop na em i go daun na i go daun long haus. Taim em i go yet ol famili lukim em na ol singaut na amamas long em i no isi. Em tu amamas long ol tu pinis nau em i go long stua bilong tumbuna bilong em long baim suga long bai boilim ti na dring. Taim em dropim K50 not long kaunta na lapun stat long givim bek senis bilong em yu save lapun pinis olgeta mani pinis long Kanage na em i tok Kote stret Kanage olsem, Abu Nane go Mankic Gole wansiling alitac tomoko go wansiling kosmec. Sem taim pikinini bilong lapun harim na em i kam na em

lukim olsem olgeta mani not na koinis pinis man em i no isi long krosim lapun na Kanage bekim bek olgeta mani bek na kism rait senis bilong em na mani bek na kism rait senis bilong em na tekov long haus.

**Lamu M. Mike
Finsafen**

Kanage bilong Buang na i save wok long haus

masta. Wapela taim ol yangpela meri long strit laik pilai tas ragbi tasol nogat bal olsem na ol askim Kanage long ekskius long bal bilong manki masta pastaim. Kanage tok orait na wapela yangpela meri tok olsem; laikim yu! Na sapos manki masta tok yes long yusim bal orait, laikim em tu. Kanage bai filing stret na singaut i go long manki masta long paul Inglis olsem, masta, or disra brek netip dotas i tok olsem, de orendi rav mi. Olsem na giv dem yo bik wait bor rong ol bai pilai ragabi tas na bai ol i ravim yu tu. Taim ol meri harim tok pisin bilong Kanage olgeta lus wanwan long haus. Yu save manki ari ya, tung gut.

**Robsy P. Singen
Lae**

Kanage em bilong Sepik Wara long Angoram stret. Na em save sekyuriti long Angoram Helt Senta. Man em i no yangpela man, lapun ya tasol pes bilong tromoi tok pisin na kain ol eksen nogut long ol mama save kam kism marasin. Em save ekting olsem A.P.O stret taim ol i no stap, em save givim sut na marasin long ol sik meri. Ol man em save les. Na taim ol kros long em, em i no bisi pes tu bilong tromoim tokpisin na kolim belhat bilong ol man. Wapela foitait wik Fraide, em wok nait pinis na long Sarere moning em go long Angoram maket. Ai bilong em tu wok long slip na em tu em pes bilong kaikai tapiok mumu stret. Na em lukim wapela pes bilong haiwe i salim tapiok mumu stap. Na em askim em. "Susa hamas long mumu tapiok bilong yu." Na em tok K1.00 tasol na Kanage tromoi han long poket long kism K1.00. Tasol boi i kamautim mitnait kauboi long poket na tromoi long kism mumu tasol em lukim hariap na tok sori long susa ya na tok. "Em samting bilong was long hangre bilong mi.

**Bench Hem
Angoram**

Kanage em bilong Bogia, tasol em i go raun long Karkar Ailan na stap long hap. Wapela taim em kam raun long nambis klostu long Waglon plantesen. Em nau tupela waitman, man na meri kam kamap long em. Tupela, em ol lain bilong tanim ol tokples ol kolim SIL. Na ol tok, "apinun tru papa. Yu bilong we?" Kanage kirap na tok, "Mi bilong hia tasol strongpela manki long bik ples." Na i askim em, "Inap yu kolim nem bilong ol sampela samting long tokples Karkar?" Na Kanage em tok Okay. Em nau Kanage kism buai, daka, na kambang na em tok. "Buai long tokples em jeb, kambang long tokples em kau, daka long tokples em ful, tasol long Inglis mi no save, ol sampela man save kolim ol dakses." Man Kanage tokim waitman olsem na waitman em paul tru long harim. Taim waitman i kism diksineri buk bilong em long painim dispela hap tok 'dakses.' Das manki, Kanage em lus wantaim bodi. Waitman tanim long lukim paps Kanage em i no stap moa wantaim tupela. Em nau wait-

man em tok, "tru, tru, tru em i no asples man, em strongpela manki long bikples olsem na em lus wantaim bodi.

**John Dee Wavnada
Bogia**

Kanage bilong Simbu na em save wok olsem wapela foremen bilong boila long Pukpuk fam long 8 Mail. Wapela taim em wok i stap na tingting ples i kism em. Em tingim tambu bilong em, em wokabaut i go long haus na tokim meri bilong em. "Mi go long opis, mi laik ringim tambu bilong mi long ples." Taim em i go long opis liklik bebi bilong em i krai. Kanage kism liklik bebi wantaim na go long opis. Taim Kanage i go sanap long ai bilong waitman, waitman ya i lukluk strong long Kanage na askim em yu gat wari. Kanage tokim bos inap mi ring, waitman ya tokim em telipon i stap. Kanage wantaim bebi bilong em i stat long ring. Taim Kanage ring i go na tambu bilong em bilong em toktok wantaim em tupela mekim save toktok i go, kam amamas nogut tru tokples pinis nating em holim bebi bilong em long rait han bilong em, taim tupela toktok yet bebi bilong Kanage sem taim yetpek i kam daun. Kanage lukim olsem taim telipon i stap yet long maus bilong Kanage em kirap na tokim bebi bilong em, yu stupit. Taim tambu bilong em harim olsem, em mas ting olsem tambu Kanage i mas krosim em ya. Em lusim telipon na go long haus na tingting mi toktok gut wantaim Kanage, mi no pinisim gut toktok yet na em tok stupit long mi. Kanage tu em wari nogut tru na lusim opis na wokabaut i go lusim bebi long haus.

**Samuel Malasan Aloyse
Lae**

Kanage em bilong Ramba rot long Mt Hagen. Wapela taim em wantaim poro bilong em pikim kopi na kism mani na stap long ples. Long wapela foitait wik Fraide, wapela skul tisa i kism pas mani na laik go pilai kas wantaim Kanage na poro bilong em. Taim bilong pilai poro bilong em wantaim tisa i pilai kas na Kanage i stap boskru long poro. Pinis long pilai tisa i lusim olgeta pas mani bilong em. Taim tisa laik go em askim K2.00 tasol long poro bilong Kanage long baim bas bilong em long go long haus. Em askim faiv pela taim na poro bilong Kanage i no givim na tisa i tok, "Anyway forget it," na em kirap na go. Poro paul na tingting planti i go na askim Kanage. Kanage kirap na tokim poro olsem yu wapela pik long ples. Tisa krosim yu nogut long tok Inglis na yu no laik bekim sem toktok long em. Poro i belhat na siksti i go na tokim tisa olsem, "Anyway forget it." Na tisa i lap na tok.

**Michael Pato Wimp
Mt Hagen**

Kanage em wapela boi Kandrian. Wapela taim em i kism Airlink balus i kam pundaun long Hoskins eapot. Orait em i kism bas rout 3 na tekov i go long Kimbe. Trangu em pes taim tu ya long lukim taun olsem na em i go insait long haus kaikai i stap. Na yu save plawa pis i swit na Kanage i les long wokim hap i pundaun olsem na baga i kaikai i go na Kanage i laik kism dring long dring. Na han bilong em i wokim na traipela hap pis plawa i pundaun na baga i lukluk long ol meri save wok long haus kaikai, nau isi isi tru han bilong baga i go daun long kism hap pis i pundaun na ol meri i wok long haus kaikai i

singaut. "Papa just leave it alone." Na baga i tok ples na em tok olsem. "Tavom wa na ngo." Na meri ya i tok Inglis na askim paps, "Can you repeating you question again.?" Na baga i kros nogut tru na em i kaikai tit bilong em na em i tokim meri ya long bruk Inglis na em i tok, "Hey! Hey! susa you know that I am coming with leaves of Malas. Na meri ya i tok. "Your face looks like Malas." Na Kanage i kism hi-filings na em i tokim ol manmeri insait long haus kaikai olsem. "Meri i mas dai pinis long mi ya," na em i smail na tekov.

**Paul Kumbo
Kandrian**

Kanage i nogat wok na i go bek long ples na meri bilong em i stap wok long taun wantaim bikpela susa bilong Kanage long Papindo stua long Lae. Tripela wik olgeta na Kanage i no kaikai lam flaps na kakaruk. Em i kaikai taro na kaukau i go na em i les pinis. Na em i raitim wapela pas i kam long meri bilong em na tok olsem daring yu kism potnait pe na kaikai lam flaps na kakaruk plis lewa noken lusim tingting long mi. Mit bilong em yu kaikai na bun tasol em putim long wapela pas na salim i kam na mi i smelim tasol na tromoi i go. Na Kanage i tingim tasol na i stap long het bilong em. Em orait lewa ples em mi bosim sapos yu kam bai mi bekim dinau na mi kaikai olgeta mit bilong yu na bun bilong yu bai yu karamapim long laplap na karim i go bek long wok bilong yu.

**Anauya Jembok
Lae**

Kanage em bilong Vanimo. Em man bilong spak, yupela save Kanage em man bilong biksot long olgeta kona taim em kam long haus em kam isi olsem em i no save dring. Tasol samting tru em kilim skin pinis na kam long haus. Wapela taim meri bilong em krosim em na tokim em Kanage yu inap long spak o dring mi les long stap wantaim man save spak planti. Wapela taim na gutpela apinun Kanage lusim haus isi tasol na go kism 6-pela botol na dring i stap na em i no save olsem Misis Kanage kam spai long em na tanim go bek long haus. Kanage pinis dringim 6-pela botol na em ekting wokabaut isi na kam long haus na Misis Kanage askim, yu stap we na kam? Na Kanage tok mi go raun long rot na kam. Na Misis Kanage tokim em olsem, husat sindaun baksait krungut olsem sikau bilong maunten long as bilong diwai long nambis. Na Kanage tok nogat. Tasol meri strong tupela taitim toktok i go i kam na tupela meri bilong em kros. Nau tupela pinis kros na tupela slip, long nait Kanage em hot na em lusim trausis na em slip ok. Long nait yet Misis Kanage em slip na em i laik tanim long slip dispela taim o dispela nait tu em gutpela mun na lait kam insait long windo na Misis Kanage em lukluk i go na em lukim tupela silin-sot bilong Kanage em lait na Misis Kanage em ting wanem samting na em holim na pulim, man mi tokim yupela Kanage em kism taim stret. Na Misis Kanage tokim paps Kanage olsem yu kism em bia yu save dring i mas pasim nek bilong yu a? Na paps Kanage em kism taim na em slip isi i stap.

**Bonien Meiya
Vanimo**

Wapela taim Kanage bilong Wau i go raun long Finsafen long lukim ol papamama bilong em long ples Morukuo. Em kalap long sip

MV Giamsao na i go taim em i go kamap long Buki we em kalap long wapela PMV ka ol kolim Kata Expres. Em sindaun long ka na tekov i kam long Gagidu taun long Finsafen so em i go daun na tokim draiva inap mi wan luk tasol long ol stua nambaut pastaim yumi i go na draiva tok yes. Olsem na em wan luk tasol pinis na ol kukim kostol haiwe rot bilong Fins i go na lusim na kism Fins Pindiu rot nau taim ol i go kam long ples Moruruo nau ka stop na em i go daun na i go daun long haus. Taim em i go yet ol famili lukim em na ol singaut na amamas long em i no isi. Em tu amamas long ol tu pinis nau em i go long stua bilong tumbuna bilong em long baim suga long bai boilim ti na dring. Taim em dropim K50 not long kaunta na lapun stat long givim bek senis bilong em yu save lapun pinis olgeta mani pinis long Kanage na em i tok Kote stret Kanage olsem, Abu Nane go Mankic Gole wansiling alitac tomoko go wansiling kosmec. Sem taim pikinini bilong lapun harim na em i kam na em lukim olsem olgeta mani not na koinis pinis man em i no isi long krosim lapun na Kanage bekim bek olgeta mani bek na kism rait senis bilong em na mani bek na kism rait senis bilong em na tekov long haus.

**Lamu M. Mike
Finsafen**

Kanage bilong Buang na i save wok long haus masta. Wapela taim ol yangpela meri long strit laik pilai tas ragbi tasol nogat bal olsem na ol askim Kanage long ekskius long bal bilong manki masta pastaim. Kanage tok orait na wapela yangpela meri tok olsem; laikim yu! Na sapos manki masta tok yes long yusim bal orait, laikim em tu. Kanage bai filing stret na singaut i go long manki masta long paul Inglis olsem, masta, or disra brek netip dotas i tok olsem, de orendi rav mi. Olsem na giv dem yo bik wait bor rong ol bai pilai ragabi tas na bai ol i ravim yu tu. Taim ol meri harim tok pisin bilong Kanage olgeta lus wanwan long haus. Yu save manki ari ya, tung gut.

**Robsy P. Singen
Lae**

Kanage kism foitait pe na spak long ples bilong wok. I go inap 9.30 long nait. Na em tekov long haus. Mama tokim bikpela pikinini meri long was long ol liklik na slip long rum. Mama tekov na pilai kat long neks haus. Taim Kanage i kam. Ai i pas pinis. Na em tingim Misis bilong em pinis. Papa i go insait long haus na go stret long rum. Em ting olsem mama i slip wantaim ol liklik manki. Papa holim pikinini meri na i stat long kis long em. Kanage kirap nogut long harim olsem pikinini meri i singaut olsem papa em mi ya. Kanage harim nek bilong pikinini meri na i bikmaus stret. Spes bilong mama, em spes bilong mama. Maski long senis senis. Mama harim olsem Kanage kros i stap long haus. Hariap tru em tekov long haus na giamanim Kanage olsem. Mi go long toilet na kam. Papa harim kon bilong meri na i ting i tru.

**Goi Morgan
Lae**

Long yia i go pinis i gat wapela oil Kampani i bin bes long Hauna viles antap long Sepik wara. Wapela de kuk boi bilong bos bilong kampani i bin raitim wapela pas long pikinini meri bilong Kanage. Kanage i bin belhat stret

• I go moa long pes 26

KANAGE



Taim junia pundaun antap long paps, em kabubu strong tru na dispela i mekim kakaruk meri brukim kiau na em ron i go wel olgeta. Mama bilong liklik junia ya kros na em tokim dedi long blokim rot nek\$ taim.

Mathew Dedebou Holey Banz

"Kol ples Goroka ples bilong amamas" na sem taim tambu meri bilong wan wok tisa ya kamaul. Kanage salim tingting i go long Goroka stret na hariap kalap na holim pasim yangpela meri Bituri na tok "You are cold place Goroka na em kra i nogut stret. Ol lain Bituri i ting olsem em mas kastom bilong ol Apo ya tasol nogat Kanage putim laik pinis long meri Westen ya.

Mathew Dedebou Holey Banz

Lapun Kanage kaikai sting kapis wantaim kru sago lip na em traut long nait i go painim moning. Neks de em wokabaut olsem wanpela dok nogat teil long en. Em i go sindaun long fom bilong ol sik manmeri long Kapiago haus sik nau wanpela nes i kam klostu long em i laik askim em long wanem sik em kism. Tasol baga lapun lukim nes na lek wantaim han i guria na tingting bilong em i paul na em tok "pikinini mi kaikai kapis wantaim sako na pekpek long nait i go moning. Em laik tok mi traut na em popaia. Planti sik manmeri i lap krangi stret olsem meme kaikai gras.

Mathew Dedebou Holey Banz

Bikpela nois bilong woa balus mekim lapun Kanage skin guria na han tasol i go beksait, ges paia long lip diwai and rapim o klinim as bilong em. Samting tru i no lip diwai em traipela lip bilong wel salat. Taim lapun Kanage ron long sevim laip bilong femili. Woa balus bilong Japan flai daunblo tru makim het bilong diwai na kokonas i kam, sem taim wel lip bilong salat mekim save long as bilong lapun Kanage. Lapun rausim giaman laplap bilong em na mekim save long sigirapim as. Taim woa balus i makim stret na kam lapun Kanage sigirapim as na raunim as bilong diwai taim wel balus i kam i go bek, lapun Kanage sigirapim as na raunim as bilong diwai gen. Ol lain bilong Kanage lukim lapun Kanage wok long sigirapim as bilong em na raunim as bilong diwai. Taim woa balus i go bek long kem bilong ol Japan, ol lain bilong lapun Kanage kamaul long ples hait na i no isi isi long krosim lapun Kanage. Tasol lapun strongim sait bilong em na tok - A-a-a- Yupela maski. Yupela tu i no save long wanpela samting. Yupela save long trikim pailot na abrusim bulet bilong masin gan tu Oh-o. Long ai bilong yupela stret mi trikim pailot na abrusim laip bulet bilong masin gan i go na pailot mekim i go nogat na em go pinis. Tasol samting tru tru traipela lip bilong wel salat i mekim save long as bilong lapun Kanage na em wok long sikirapim as bilong em na raunim as bilong diwai. Long apinun lapun Kanage kism sik malaria long warim as bilong em solap olsem liklik buk i kamap long as bilong lapun Kanage.

John Yau Lae

• I kam long pes 25

na em i no ritim na pinisim pas ya nogat. Em ritim tasol antap bilong pas ya i tok olsem: Dia papa Kanage, it's my laik your pikinini meri. Kanage i go long oil Kampani na ripotim kuk boi olsem. Masta, sam toks tu yu. Wait man tok yes, go ahead Masta, kuk boi rait a pas tu mai pikinini meri. Masta, yu holim his het and bam bam het. I break his tit and he daunim my tit. Masta i askim: When was that? Na paps Kanage i bekim, What about on Friday? Masta i tok. Oh you stupid! Na paps Kanage i bekim. No masta, mi no bilong Sepik. Masta i tok, then you are a liar, na Kanage tok yes masta mi bilong Lae stret. Masta askim: I beg your pardon? Na paps Kanage i tok. Ha-ha-ha yes masta tenkyu Sir. Na em i go long haus bilong em. Waitman i paul pinis i sindaun ai op na dua i pas long pes bilong em.

Seba Wulung Ambunti

Junia Kanage pilai antap long ruf bilong haus na ruf wel na i pundaun kam daun. Sem taim paps Kanage slip long bet na ritim stori bilong Sir Pita Lus. Aninit long bet ya kakaruk meri i putim kiau i stap.

Kanage em wok long Tabubil wantaim maining kampani. Wanpela Sarere em harim olsem i gat disko long taun na em bom stret na go danis. Em dring na danis i go i go klostu olgeta musik i pinis.


Las musik ol pilaim Dolly Parton singsing ya "When you think about love think about me," dispela singsing i mekim na em kism hat atek na pundaun i dai i stap long floa. Ambulens kism Kanage i go long haus sik long Ningerum na taim meri bilong em sanap klostu long bikman ya em isi tasol opim ai na kra i olsem sap nil i sutim em.

Isi tasol tokim meri na tok "When I think of you I think of love."

Mathew Dedebou Holey Banz

Kanage em bilong Magitu eria long Bena insait long EHP. Em save wok olsem tisa na go wok long Bituri insait long Westen provins. Wanpela wiken em sindaun arere long wanpela diwai mango na ritim stori bilong Wantok Toro i stap.

I no long taim na narapela tisa man karim redio i kam na pilaim musik. Nokondi Nama bilong Goroka i singim dispela singsing





‘BIKPELA HAMAMAS’

I GO LONG WORKERS MUTUAL GROUP OF COMPANIES (WMG)
LONG OPENING BILONG

MUTUAL RUMANA

LONG SEPTEMBER 7, 2000

Long makim ol Fainensel Membas bilong Public Employees Association (PEA) insait long kantri, Nesenel Presiden na Siaman bilong Workers Mutual Group (WMG) Mista Napoleon Liosi i laik tok amamas long yu long opim dispela namba wan na bikpela opis. Dispela opening bai planti i tingim yet bikos em i kamap wantaim 25 eniveseri selebresen bilong kantri. Antap long dispela, Mutual Rmuna i olsem wanpela namba wan opis bilong ol pipel stret long “gutpela laip i kam” insait long dispela nupela yia.

Mista Liosi i laik surukim tok amamas tu long makim ol Fainensel memba bilong PEA Superannuation Fund na ol dispela grup:

PEA-SF, WORKERS MUTUAL FUND, EDA MUTUAL LTD, YAGUDI LTD, MUTUAL SECURITY SERVICES LTD, EM SAVE JOINERY LTD, HOME GUARD LTD NA OL WORKERS MUTUAL INSURANCE LTD.

Bikpela Hamamas !!

NA GUTPELA GOD PAPA I KEN GIVIM YU GUTPELA NA HEPI
25TH ENIVESERI SELEBRESEN

NAPOLEON . B. LIOSI (MAICD)
PRESIDEN (PEA), SIAMAN (WMG)

Lae siti pulap long pamuk na stil pasin

Dia Edita,

Mi i gat wanpela wari na mi i laik putim aut ples klia long Wantok niuspepa bai ol arapela brata susa i ken lukim tu na i mas lukaut long dispela pasin i wok long kamap bikpela long siti bilong yumi Lae na ating arapela bikpela siti na taun long PNG.

Dispela wari bilong mi em i no bilong mi tasol nogat, i bilong olgeta manmeri long kantri olgeta.

Wari i olsem, taim mi raun long arere bilong Lae siti, mi save lukim planti pamuk meri tumas, sapos yu wanpela man tasol yu raun lukaut ol dispela meri bai i bihainim yu na askim askim yu long pilai wantaim ol, maski yu les na laik ronawe, tasol bai ol i ronim yu yet na askim, askim yu yet.

Sapos ol man i gat strongpela bilip ol bai inap ronawe long ol.

Tasol ol man i gat liklik bilip sori tumas, o bai harim tok tasol na i go pilai wantaim ol. Na tingim ol dispela kain meri em ol i pulap tru long sik nogut bilong pamuk.

Ol inap tru long givim ol gutpela manmeri long sik bilong pamuk, sik AIDS na gonorea o arapela sik bilong pamuk.

Mi sori tru long Lae siti. Ol pamuk meri i pulap nating long olgeta kona bilong Lae na bagarapim siti bilong yumi, kain olsem Sodom na Gomorah long baibel bipo. I no long taim bai God i kukim Lae siti.

Narapela samting tu, ol planti pikpoket i pulap tru long dispela siti. Tru ol i no givim sik tasol ol tu i bagarapim siti na kantri PNG.

Bai yumi i mekim wanem nau? Yumi i tok kantri PNG i kristen kantri, tasol insait em planti pasin haiden i stap.

Bilong pasim tok bilong mi, inap gavman i mas lukluk moa long dispela tupela kain lain manmeri hia. Em long ol pamuk meri, na ol stil lain na pikpoket. Na tu ol wokman bilong sios tu, i noken slip. Wok strong long kisim bek ol sin manmeri bihain bai God i givim gutpela bel tu bihain.

Em tasol long wari bilong mi na bilong ol manmeri bilong PNG olgeta. Sapos wanpela i laik sapatim o egensim pas bilong mi, yu i welkam tasol. Toksave olsem mi bai i no inap bekim tok-pait bilong yu, sapos yu egensim mi em orait long wanem mi i stap long bus na em bai i hat liklik long mi i kisim Wantok niuspepa bilong ritim bekim bilong yupela. Tenkyu.

Duks Se Menyama

Politiks insait long foe asosiesen

Dia Edita,

Mi wanpela man bilong ples na mi wanpela papa graun bilong Kutubu oil na ges, tasol nau mi wok long lukim planti politiks nogut i kamap long Mosbi long niuspepa.

Na dispela man nem bilong em Mista Hame Yawari em i laik wokim politikel kempen long yia 2002 ileksen na dispela man i wok long yusim nem na bisnis kampani bilong mipela Foe pipel long Kutubu papa graun na tu em yet, wok long yusim gijaman signesa bilong ol gutpela lida bilong ples Kutubu.

Na tu Mista Hami Yawari wanpela gutpela man, tasol pasin bilong em i gridi tumas na em strong tumas long bosim na lukautim olgeta wok bilong Foe pipel insait long Kutubu.

Na planti nem bilong lida bilong Foe asosiesen ol i raitim long Trinde Ogas 9, 2000 long Nesenei niuspepa em i bikpela gijaman bilong dispela man Mista Hami Yawari.

Em tasol bel hevi bilong mi na sampela i laik bekim em i laik tasol.

Hale Solo Kutubu, SHP

Noken daunim ol Hailans pipel

Dia Edita,

Mi hamamas tumas long bekim pas bilong wanpela man nem bilong em Charles U. Kutu em bilong Maprik long Is Sepik provins.

Nau brata ya tokim Wantok nius man long Ogas 10, 2000 olsem ol Hailans man i stap long ol taun olsem Wewak, Madang, Lae, Kimbe ol i save sutim nus na han i go insait long rabis pipia tin na buai spet nambaut long ol taun.

Nau brata Charles Kutu, dispela pas bilong yu mipela wok long ritim na mi sem nogut tru. Bikos yu bagarapim gutpela nem bilong Hailans.

Brata Charles mi laik askim yu.

1. Yu i gat wanem kain bel hevi long ol Hailans?
2. Yu save PNG i gat tupela kain man? Olsem 1. Em ol rish man, 2. Em ol rabis man.

3. Ating yu yet yu rishman? Olsem ol waitman o mani man? em i tru?

4. Sapos nogat Charles U. Kutu tingting na tok-tok bilong yu i smel nogut olsem toilet. Sapos yu laik bekim orait bekim. Nogot orait noken mekim ol pipia tok olsem gen.

P. Hama WHP

Viles kot na kaunsel save helpim ol trabel man

Dia Edita,

Mi wanpela manki Niakhatogum insait long Kubalia eria.

Wari bilong mi olsem. Mi save lukim viles kot na kaunsel save helpim ol trabel man.

Planti taim ol man save mekim kainkain trabel na ol manmeri save go tokim ol. Lo man ol save skelim na tok bai yupela stretim long kastom pasin na stap wanbel.

Tasol mi save lukim hamas taim (planti taim) ol i save tokim yumi long stretim long kastom pasin bilong yumi. Tasol dispela i no helpim liklik long famili na komyuniti long ples. Tingting bilong mi olsem ol lo man mas lukim sapos ol bik het man i no rispek long kastom lo o pasin bilong yumi na harim tok na stap gut wantaim arapela. Orait ol viles kot o kaunsel mas sapatim o witnessim kompleman na tokim plis long arestim dispela man na kalabusim em.

Mi ting olsem lo i kam long stretim gutpela sindaun long famili na komyuniti long ples na provins na kantri wantaim olsem na mi no hamamas long ol lo man save tok nogat long ripotim dispela kain hambak man long plis long ples bilong mi.

Em tasol na husat laik sapatim o egensim rait tasol long Wantok niuspepa na mi lukim.

mipela bai bagarap olgeta. Ol lo man save mekim dispela tok na save pretim man long kotim trabel man. Olsem na planti pasin nogut wok long bagarapim gutpela sindaun long famili na komyuniti long ples bilong mi olsem na mi no hamamas long dispela ol pasin mejistret na kaunsel save mekim long ples bilong mi.

Mi tingting olsem sapos ol man mekim trabel na viles kot na kaunsel i tok long stretim long kastom pasin bilong yumi long ples. Na ol trabel man i noken harim tok na stap isi orait ol lo man i gat pawa long witnessim kompleman na tokim plisman long arestim dispela man na kalabusim em.

Mi ting olsem lo i kam long stretim gutpela sindaun long famili na komyuniti long ples na provins na kantri wantaim olsem na mi no hamamas long ol lo man save tok nogat long ripotim dispela kain hambak man long plis long ples bilong mi.

Em tasol na husat laik sapatim o egensim rait tasol long Wantok niuspepa na mi lukim.

Herman Waffingual Wewak

Ol plis brukim lo Ol Simbu setelmen save stilim kopi

Dia Edita,

Mi wanpela oltaim rida bilong Wantok niuspepa na em i no pestaim bilong mi long rait tu, mi gat bikpela wari o bikpela hevi mi save oltaim lukim na harim long ia bilong mi nau em wari bilong mi i go olsem.

Oltaim mi save lukim ol plis i save rotblok na sekim ka nambaut long rot bilong ol taun ol i save tokim ol draiva long givim laisens bilong ol long plis na ol i save tokim ol long pakim ka long sait, taim ol draiva pakim ka long sait, ol yet save ol i rong so ol i save givim braviri hariap long taim ol givim laisens samtaim.

Dispela em i no gutpela pasin. Sapos yu draiva na yu save yu rong pinis, yu mas stap tasol na larim plis sekim yu wantaim ka, na long gutpela pasin yu ken berim yu yet (spot fine) na kisim risit wantaim so bihain bai yu go long kot long rifan o kot bai kisim yu wansait. Mi save lukim planti wantok sistem i save kamap long Kainantu taun na i no stret.

Sapos yu plis na yu laik karim wok bilong yu mas karim stret bihainim mama lo bilong kantri bilong yumi.

Em tasol liklik wari bilong mi sapos yu husat brata o susa laik sapatim o egensim, em yu welkam tasol.

Jonnie Boy Taima Nokondi town, Obura

Dia Edita,

Mi wanpela grasrut manki bilong Malbana. Mi gat liklik wari olsem, long ples mi save hat wok long kopi na sampela wok tu. Taim mi karim kopi bek i kam long Banz kopi maket. Ol Simbu setelmen lain save pulim kopi bek na sampela kopi save paul na mipela kisim taim long dispela.

Mi manki Malbana bilong ples mi raitim pas i go long yupela ol pablik bilong Westen Hailans provins olsem. Ol dispela lain ol i gat graun bilong ol o nogat.

Mipela manmeri bilong ples mipela lukim yupela i save sanap nating long Banz kopi maket olgeta taim.

Traim na go long ples na holim graun bilong yupela liklik. Nogut yupela lapun nating long kopi maket. Mipela manmeri na pikinini bilong ples mipela putim dispela kompleman long Banz maket kopi olsem, yupela lain bilong baim kopi, yupela save lukim kopi skel na baim kopi.

Dispela em mipela i no amamas long dispela. Em tasol na tenkyu, husat i egensim o husat i laik sapatim bai mi wet tasol long kisim bekim bilong yu long Wantok niuspepa.

Maikel Tumun Malbana

Sapos yu man tru, go long ples

Dia Edita,

PLIS givim mi wanpela hap spes long Wantok niuspepa olsem mi ken bekim pas bilong brata Shuck bilong Sandaun bilong Lumi, August 3, 2000.

Brata bilong mi, dispela nem "Shucks ov Sandaun", em i nem bilong yu a? Plis niknem em maski.

Yu harim, olgeta memba bilong palamen i mas i gat sampela kain plen o straksa bilong ilektoret bilong em. Sapos wanpela memba i nogat plen bilong helpim em long sampela wok em i laik kirapim insait long 5 o 10 yia, ol man dispela memba i stupid man tasol. Olsem yu lukim, bipo i nogat straksa o plen bilong olgeta memba bilong Aitape, Lumi. Olsem wok tenis i no kamap, mekim na yu bel hat nambaut ya yu save nau?

Memba bilong yu, Eddy Saweni i spendim tripela de long Madang na hat wok tru long painim ol isi (i no dia tumas) rot kampani long Madang long wokim na pinisim dispela ikonmikol rot namel long Aitape, Lumi distrik.

Mista Shucks ov Sandaun, olgeta memba bilong palamen i save sanapim ol komiti (opis) bilong lukautim ol pablik bihain bilong ilektoret bilong em. I gutpela yu painimaut na askim ol opisa bilong memba, bai ol i ken helpim yu long luksave long straksa na tingting bilong memba bilong yu.

Ol gutpela sitisen bilong kantri o provins, ol i no save raitim pas long niuspepa na daunim bikman o man i gat nem, nogat, ol i save helpim na givim tok bilong gutpela developmen.

Mista Shucks ov Sandaun, i nogat wanpela memba o wanpela man inap senisim sindaun bilong yumi, nogat tru. Em luksave bilong famili bilong mi. Wan wan bilong yumi yet i mas taitim bun na kamapim mani na senis na developim ples bilong yumi na provins bilong yumi. Sampela bisnis yumi yet i mas ronim bilong kamapim gutpela sindaun.

Olgeta provins i develop liklik pinis ya, em ol manmeri i wok hat long painim mani. Ol i givim takis i go long gavman, long dispela, gavman i tingim provins bilong ol moa moa yet.

Mista Eddy Saweni i no bringim

sevis na senis na developmen long Lumi nau, na husat man o meri bilong Lumi inap long senisim na developim Lumi ovanait?

Developim wanpela nesen (kantri) i no inap long kisim wanpela o 5-pela yia (1-5) sori tru, brata bilong mi. Aitape na Lumi i go bagarap bilong wanem, olpela memba bilong yu bipo i no setapim gutpela straksa o plen, olsem bai nupela memba inap long bihainim na olsem yumi lukim yu wanpela bilong Lumi i no bilipim memba bilong yu yet na wok long senisim ol memba bilong Aitape Lumi long olgeta ileksen.

Mi bilip, sapos yu kamap memba bilong palamen long yia 2002 bai yu mekim wankain stail na pasin olsem memba bilong yu i save mekim. Mi ting, yu bai nogut moa long Eddy Saweni. Larim God i skelim pasin bilong man, i no yu, Shucks ov Sandaun.

Mel Kavel i no mangi bilong raun long olgeta provins nating nating, olsem yu. Mel Kavel i stap long Madang, isi tasol lukautim PMV bas sevis bilong bikbro (brata) bilong em na banis kakaruk bilong em yet - kampani bilong kransi bilong Yagaum haus kil i save baim na stail meri bilong em i save helpim long lukautim tu, em yet i save salim buai na kokonas long Hailans. Mipela i amamas long olgeta de, yumi i gat mahi na bilong wanem bai mi lusim mahi bilong mi na mi painim wanem long arapela siti?

Famili bilong yumi i helpim developim taun bilong yumi long givim takis i go long senisim Madang i kamap beautiful Madang (yu no inap lus tingting long em).

Yu lusim Lae hot na yu go bek long Lumi na mekim Lumi i kamap narakain, olsem bai yu i no inap bel hat tumas long memba bilong yu.

Husat i laik sapatim o egensim tingting bilong mi. Mel Kavel i laik lukim long neks Wantok niuspepa, tenkyu.

God blesim yu, Shucks ov Sandaun bilong Lumi.

Mel Kavel Madang

Sapos yu laik salim ol pas bilong yu i kam long dispela niuspepa. Salim i kam long dispela adres: Putim nem na adres bilong yu tu.

THE EDITOR
WANTOK NEWSPAPER
PO BOX 1982, BOROKO, NCD.

WOK BISNIS
MANDE IGO FRAIDE
8.am igo 5.pm apinun

WANTOK
KLASIFAIK TELIPON: 325 2500

ADVATAISIN SEILS
Min Alort: ext 214 Walter D.Edward :ext 218
John lagata: ext 217



Department of Lands and Physical Planning



NOTIS BILONG ASKIM OL LAIN I LONG BAIM HAUS

Dipatmen nau i salim pinis notis bilong Demand for Payments (yelo cad) long husat pipel i sindaun long haus bilong gavman na i no stretim yet pe bilong haus long las 6-pela mun.

Dispela em long toksave olsem mak bilong mani bai kamap aninit long fofit i go long Stet sapos ol i no stretim dispela insait long wanpela mun.

Dipatmen bai stat long fofitim ol haus long Septemba 2000.

Olsem lisholda i mas baim pe bilong haus maski yu kisim notis o nogat. Sapos yu gat sampela mani i stap yet egensim haus bilong yu, yu mas kam na stretim so haus bilong yu bai i no inap fofit i go long stet (gavaman).

Sapos yu gat save askim, ringim Revenue Opis 301 3199 or 301 3202


GUAO K. ZURENUOC, OBE
Sekretari



TOK SORI


Ekting Spika bilong Nesenel Palamen na Memba bilong Kerema, Hon Sir Tom Koraea long makim olgeta Memba bilong Palamen, ol famili bilong ol, Palamentri Sevises Woklain, ol pipel bilong Kerema ilektoret na Ledi Elizabeth na ol pikinini i laik salim bikpela tok sori tru i go long Misis Pauline Koki, ol pikinini na ol famili memba, ol wantok na ol pren long dai bilong:

Leit ALOIS KOKI CMG. MP
Memba bilong Pomio Open

Leit memba i bin wanpela gutpela na isi lida na i bin sevim gut tru ol pipel bilong em long stat i kam inap long em i lusim laip bilong em. Laikim bilong ol pipel long em i bin lukim ol i makim em i go long palamen inap 20 krismas olgeta.

Em i ken kisim gutpela malolo bilong God.


SIR TOM KORAEA, Kt, MP
Ekting Spika bilong Nesenel Palamen



BUSINESS

ISSUE NO. 31

K1.00

1st Parliament Sitting 2000

Mining & Petroleum projects set to start...

■ Napa Napa oil refinery

■ Napa Napa oil refinery
■ Napa Napa oil refinery
■ Napa Napa oil refinery

SEPTEMBER

ISSUE

KAMAUT

NAU!!



PAPUA NEW GUINEA

BANKINDO CORPORATION

PEOPLE'S BUSINESS
GROWTH PROMOTION

RIGHT ADDRESS PAPUA NEW GUINEA WE BRING BUSINESS TO YOU



WANTOK SPOT



• Johnny Tinsley-Lulu.

FIFA i oraitim PNGFA long holim Futuro II

HENRY MORABANG i raitim

FIFA, wol soka bodi i givim tok orait long Papua Niugini Futbol Asosiesen (PNGFA) long go het long nolim Futuro II. Dispela Futuro II em wanpela edukesen program bilong FIFA i save kamap long ol soka kantri insait long wol.

Mausman bilong FIFA na tu eking presiden bilong Osenia Futbol Konfederesen Johnny Tinsley-Lulu i givim tok orait bihain long em i kam lukluk raun long kantri long las wiken.

Mista Lulu i bin kam long kantri long las wik Fraide na go bek long asples bilong em Vanuatu long Tunde.

Dispela Futuro II o FIFA edukesen program ya bai kamap long Lae bihain tasol long nesanel klab sempionsip. De bilong Futuro II em long Septemba 18 i go long Septemba 24 long Rose Kekedo Hall long Yunitek.

Mista Lulu i tok dispela Futuro II kos i karamapim ol eria bilong edministresen, referi, kosing na spot medisn.

Mista Lulu i raun long lukim eria we dispela kos bai kamap na i amamas tru olsem olgeta haus slip na trening ples bilong ol kosa na pilala i gutpela stret.

Na em i no mekim wanpela toktok moa na salim pas i go long OFC sekretari Josephine King long larim FIFA i oraitim PNGFA long holim dispela kos.

Mista Lulu husat bilong Vanuatu i amamas tru bikos olgeta stedium na haus slip we dispela kos bai kamap.

Mausman bilong FIFA i daunim asples bilong em bikos em i ting wok bilong PNGFA na PNG i winim tru ol samting long Vanuatu.

Presiden bilong PNGFA Madiu Andrew husat i kamap namba wan i tokim ol niusman olsem em i amamas tru olsem wanpela FIFA opisel yet i kam na lukim wanem kain ol soka developmen i stap insait long kantri.

Nau em taim bilong FIFA opisel o OFC opisel i ken tokim PNGFA long wanem rot em i ken bihainim long mekim soka i kamap moa gut.

Sekretari Jeneral bilong PNGFA Ivan Ngahan i askim olgeta memba asosiesen long salim wanwar mausman bilong ol long kam long dispela Futuro II kosa.

Na long kos bilong spot medisn, em i laik wanwan asosiesen i mas makim tupela dokta long kam stap long dispela kos.

Miting long stretim taekwando spot long kantri

I BIN gat wanpela miting i bin kamap namel long PNG Spots Federesen na PNG Wol Taekwando Asosiesen long stretim sampela hevi i kamap long wok bilong lukautim taekwando insait long kantri.

Dispela miting i bin gat sampela strongpela toktok i kamap namel long PNG Spots Federesen sekretari Sir John Dawaninura na tu presiden bilong PNGWTA Jamuga Stone.

Sir John i askim Mista Stone wantaim tupela arapela opisel

TAEKWANDO RIPOT

bilong asosiesen long traim stretim toktok we i wok long stapim gem bilong taekwando insait long kantri.

Taim Stone i kisim sans long toktok, em i bin mekim sampela strongpela toktok we i laik kamapim kros tasol Sir John wantu tru i askim em long toktok isi na stretim toktok.

Sir John i toktok na helpim Stone husat i harim tok na mit-

ing namel long tupela grup i bin kamap gut tru.

Sekretari jeneral i tokim Mista Stone olsem dispela miting i no bilong bagarapim o daunim arapela man. Miting ya em bilong helpim taekwando i kambek gen olsem memba bilong PNGSF.

"Mipela i no stap long traim sutim tok long arapela," Sir John i tok.

Sir John i askim Stone na PNGWTA long holim wanpela miting long stretim hevi bilong ol

na traim long fomim wanpela asosiesen tasol.

Jamuga Stone na interim kansuil bai bung wantaim Edward Kassman long traim paitim toktok na kam aninit long wanpela bodi tasol.

I bin gat planti paul i kamap long pablik olsem wanem taekwando asosiesen i trupela. Bikpela samting tru nau em long traim stretim tupela bodi long kamapim wanpela asosiesen tasol.

Brothers na Souths pait long PRL taitel

BIKPELA gren fainel bilong Pot Mosbi ragbi lig bai stap namel long Downer Construction Souths na Toyota Brothers long dispela wiken.

Tupela tim ya i bungim gren fainel las wik bihain long ol i autim Waliya na Magani long priliminari fainel.

Long rekot, Brothers i winim dispela gem wanpela taim, na Souths tu i winim gem wanpela


taim. Souths i gat bikpela wok tru long winim dispela taitel bikos ol i mas difendim na resis gen long Kambridge Kap.

Brothers husat i bin traim hat longpela taim tru long winim dispela fainel tasol lak i no save stret. Las taim Brothers i kam smelim tasol fainel em long 1989 taim Gordon Paks na Kunai Tumba i papa long Brothers.

Dispela taim Wilson Kotson, tim menesa bilong Brothers long dispela taim i no save kaikai gut, em

i save dring coke tasol na slip taim tim i lus.

Tupela tim wanpela bilong Hailens na bai i gat bikpela sapot tru i kamap long Lyod Robson oval.




• Tupela kepten Wayne Moary (Souths) na Richard Sinamoi (Brothers) i resis long soim masel husat tru bai winim dispela sil long Sande. Foto IVAN BAYAGAU.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



WANTOK

30 WAA

Aniveseri

1970-2000



32 pes

Namba 1,362

Komyu... kalabus em gu... Mipela rot

RAYMOND PALANGAT

SISTEM bilong Lo insat long...
bilong lo na oda insat long...
Janeral na Jasta Selaletu...
tok.

Mista Gabi i tok dipela tingting...
nogat kalabus bilong en, em i kamapim...
wok helpim i go bek long komyu...
kamapim rot bilong stream na...
paen i go gutpela na i strepela...
paen bilong yumi ci man. Em i tok...
pela bai daonim planit koe bilong...
long kamapim.

Long daonim tu namba bilong...
adus ten long haus kalabus...
inap helpim wok edem...
haus kalabus na gutpela...
bilong stream of lain...
haus kalabus inap kamapim...
Mista Gabi i...
insat long komyu...
wotusp long Mipela...
wik.

WANTOK

WIKI I STAT LONG FONDE OGAS 3, 2000

70t

Mipela

Mamamas

wantaim

Spesol suplimen
bilong Wantok
Niuspepa

• Siaman bilong Bod ov Dairekta Pater Vince Ohlinger (aiglas) wantaim edita bilong Wantok, Yakam Kelo (hankais) na tupela ripota bilong Wantok Veronica Hatutasi na Wenceslaus Magun i katim kek long makim 30 yia bilong Wantok



Wantok mas go het yet: Pater Vince

THEO THOMAS i raitim

"Mi amamas tru mi lukim ol misin yet i kirapim dispela niuspepa bilong painimaut tingting bilong ol netif. Tasol lukaut, dispela wok em i no isi samting."

Dispela hap toktok em Siaman bilong Haus ov Asembli, Jon Guise i bin wokim long taim em i bin tanim ki bilong masin bilong prinim pepa long taim Wantok Niuspepa i bin stat olsem 30 krismas i go pinis.

Jon Guise i bin save olsem kain wok bilong ronim pepa i no isi olsem na em i bin givim tok lukaut long ol lain husat bai ronim Wantok niuspepa.

Dispela tingting bilong Jon Guise i no popaia liklik.

Siaman bilong Bod ov Dairekta bilong Wod Pablisig, Vince Ohlinger (Pater) tu i bin wokim dispela toktok taim ol wokman bilong Wantok i bin katim kek long makim 30 krismas bilong Wantok.

Pater Vince tok pasin bilong kirapim ol wok na ronim i go longpela taim ino isi samting.

Kain wok olsem i hatwok tru.

Ol lain husat i gat bilip long wok ol i wokim na tu i redi long wokim bambai wok ol i kirapim long en i ken go het tasol i ken stap long wokim wok go het.

Yu husat man i no redi long wokim kain samting olsem i no inap long wokim wok go het.

Pater Vince tok taim Wantok Niuspepa i bin stat, nogat man i bin save sapos niuspepa ya bai stap faivpela yia, tenpela yia o 30 yia.

Tasol long hatwok bilong ol lain husat i wok insait long kampani na ol lain husat i save givim halivim long wokim bambai niuspepa i ron i wokim na nau mipela i selebretim 30 yia bilong Wantok Niuspepa.

Sampela ol wokman bilong Wod Pablisig em Fr. Vince i kolim long gutpela wok ol i wokim long longpela taim tru em Jenerel Menesa yet, Anna Solomon; man bilong droim ol fani piksa olsem Toro na Biabia, Jada Wilson; Jimmy John, Leila Gilchrist, na Ivan Bayagau.

Fr. Vince tok bod i amamas long gutpela wok ol i wokim na em laik bambai niuspepa i go het yet long wokim ol gutpela wok em i save wokim.

Pasin bilong kirapim ol wok na ronim i go longpela taim ino isi samting.

- Pater Vince

GUNA AUTO SERVICES LIMITED

Would like to extend their
Congratulations to

Wantok Niuspepa

on its

30th Anniversary

Kunai Street,
Hohola
P.O. Box 3975
Boroko
Papua New Guinea

Phone: (675) 325 9006
Fax : (675) 325 7089

Cat
SERIES
IT428C BACKHOE
LOADER

The hydraulic Quick Coupler enables you to switch most attachments without leaving your seat.



Attachments available through Hastings Deering include:

- Pallet Forks • Brooms • Blades
- Asphalt Cutters • Sweepers
- General-Purpose and Multi-Purpose Buckets

From earthmoving to excavating, lifting to loading, landscaping to site cleanup, the Cat®IT428C backhoe loader can perform just about any task.

With a powerful new front loader, modern spacious cab, excavator-style backhoe, load-sensing hydraulics you can dig deeper and load faster with more efficiency and comfort.

Add to this Hastings Deering's range of Product Support Services and you've got much more than a machine... you've got a partner that's **Surprisingly Easy to Own!**

Hastings Deering



And of course, Hastings Deering backs the Cat®IT428C with a range of Product Support Services unmatched in the industry.

PORT MORESBY Phone: 325 6422 Fax: 325 0774
LAE Phone: 472 2355 Fax: 472 1477
TABUBIL Phone: 548 9045 Fax: 548 9155
RABAUL Phone: 982 1244 Fax: 982 1129

• Anna Solomon, Jenerel Menesa bilong Word Publishing.

Niuspepa bilong yumi ol Papua Niugini stret



THEO THOMAS i raitim

TAIM Jon Guise i bin tanim ki bilong opim Wantok niuspepa long Wewak long Sande, namba tu de bilong mun Ogas, 1970, planti ol lain long ples, gavman, misinari na skul sumatin i bin stap long lukim.

Wanpela bilong ol lain husat i bin stap long hap na lukim dispela em Jenerel Menesa bilong Wod Pablisng Kampani, Anna Solomon.

Anna i bin stap olsem wanpela sumatin long Yarapos Haiskul long dispela taim.

Long dispela taim yet, Anna i no bin save olsem long taim em pinisim skul bilong em, em bai joinim Wod Pablisng, kampani we i save ronim Wantok Niuspepa.

Nogat. Em i mas gat tingting long go pinisim skul bilong em long yunivesiti na bihain go wokim sampela arapela wok.

Tasol nogat. Rot em i bihainim long en i karim em i kam kamap olsem jenerel menesa bilong kampani we i save lukautim dispela Wantok niuspepa we em yet i bin go lukim long taim niuspepa ya i bin stat.

Anna i bin joinim Word Pablisng long Disemba 1979 na i wok olsem 20 krismas olgeta.

Taim em stat em wok olsem wanpela ripota tasol long bihain em holim ol wok olsem Edita bilong Wantok na The Times of Papua New Guinea. Taim Anja i kamap olsem edita bilong Wantok, em i nambawan taim tru wanpela Papua Niugini i holim dis-

pela wok.

Long 1997 taim olpela jenerel menesa bilong kampani, lan Fry i go, Anna i kisim wok bilong em na bihain ol bod ov dairekta i makim em olsem jenerel menesa bilong kampani.

Long dispela mun yet taim ol wokman bilong Wok Pablisng na Siaman bilong Bo ov Dairekta, Fr. Vince Ohlinger i bin katim wanpela kek long makim 30 krismas bilong Wantok Niuspepa long Papua Niugini, Anna Solomon i bin tok kain wok Wantok Niuspepa i save wokim i nambawan tru.

Em tok Wantok Niuspepa em niuspepa tru bilong Papua Niugini bilong wanem dispela pepa i gat ol stori we ol i raitim long Tok Pisin.

Anna tok maski kantri bilong mipela i stap independens long 25 krismas, planti ol lain bilong mipela i no save long rit gut long Inglis na Wantok niuspepa i save halivim dispela ol lain long save long wanem ol samting i wok long kamap long kantri na long ovasis long sait bilong gavman, lotu, pilai na ol narapela samting nambaut.

Anna tok dispela wok Wantok i wokim i bikpela tru na i halivim gut tru ol man-

meri long save na tu long skelim ol wok em gavman i wokim long ronim kantri.

Em tok long nau yet ol wokman bilong Wantok Niuspepa tu i save taitim bun tru bilong ol long painim ol gutpela stori long olgeta hap bilong pepa long wokim bambai ol manmeri i ken luksave olsem dispela pepa i karim tru ol nius bilong Papua Niugini stret.

Em tok em i hamamas tru long wok Yakam Kelo, edita bilong Wantok niuspepa wantaim tupela ripota bilong em Wenceslaus Magun na Veronica Hatutasi i save wokim.

Em tok long ol yia i kam, Wod Pablisng bai go het yet long bringim ol nius i go long ol pipel bilong dispela kantri long kain tok-ples we yumi save.



• Pater Vince Ohlinger, siaman bilong Bod bilong Word Publishing (namel), Yakam Kelo, edita na Anna Solomon i luk-luk long kek we i makim 30 yia bilong Wantok.



Save With MOROBE SAVINGS AND LOAN SOCIETY

For your Credit needs In the new Millennium

- School fees for children
- Medical Expenses
- Holiday Expenses
- Building Materials

or

- Business Project that you want to kick start.



Why not call in and see us before it is too late.

We are at Vele Rumana Building, on the Ground Floor.

We would like to Congratulate Wantok Niuspepa for 30 successful years of business and would like to wish all the success in future endeavors and look forward to doing business with you.

P.O. Box 3488
Fourth Street, Lae

Phone: 472 1777
Fax: 472 1778



• Edita bilong Wantok, Yakam Kelo.

Isi long ritim na tingting i klia

Sia bilong Edita - YAKAM KELO

TAIM mi kam wok wantaim Wantok niuspepa long 1994, mi ting em i isi wok bikos olgeta samting em mi ken raitim hariap tasol long tok pisin. Mi man bilong tok pisin long taim mi manki yet i kam olsem na mi no warl long wanpela samting.

Olpela bos bilong mi Francis Uliau i bin putim mi long sia bilong spot na mi stat long raun lukim ol pilai long wiken na raitim stori long ol. Na mi ken pilim stret, raitim tok pisin em mi mas tingting planti long

wanem kain toktok bai mi raitim na i mas kamap long niuspepa na ol manmeri i ritim i ken save tru long dispela stori mi raitim.

Tasol long raitim tok pisin, mi noken bihainim stail bilong mi yet bikos stail bilong raitim nius olsem long ol Inglis niuspepa i mas wankain. Tok pisin i nogat narapela stail bilong em yet.

Long luksave bilong mi long dispela tok pisin niuspepa, em i wanpela gutpela niuspepa tru bikos mi pilim olsem mi save oltaim toktok wantaim ol manmeri long olgeta provins long ol taun na ol asples tu. Mi save lukim olsem bikos taim mipela i save salim niuspepa olgeta Fonde na Fraide i go long olgeta provins, ol manmeri

i save baim na ritim wanem kain nius i stap. Na dispela i kirapim bel bilong mi long oltaim mi mas raitim moa nius bai ol manmeri i ken ritim na save long wanem samting i save kamap long narapela provins na tu insait long kantri. Gavman i mekim wanem samting, wanem kain lo i kamap long kantri, woa bai kamap o nogat, fektori bilong rais i paia na planti arapela kain kain nius we i save kamap. Na dispela i mekim mi pilim olsem mi wok long sanap olsem namel man long tokim ol manmeri long wanem samting i kamap olsem na mi laikim tru dispela wok.

Mi olsem man i go pas long mekim plen bilong Wantok niuspepa na skalim nius i go long wanwan pes na wok bung wantaim ol wanwok bilong mi bai mipela olgeta i mekim wok wantaim long putim kamap 32 pes niuspepa long olgeta wik.

Mi save lukim planti manmeri i save raitim pas i kam long Wantok long tokaut long wanem kain bel hevi o komplek o ol gutpela samting ol i laik arapela manmeri i mas ritim na save. Na dispela i save soim mi olsem ol manmeri save ritim Wantok niuspepa bikos mipela i raitim long tok pisin na em i isi long ritim na na klia gut.

Wok painimaut bilong Wantok i soim olsem taim wanpela man o meri i save baim niuspepa, arapela i save pulim long em gen na karim i go ritim. Tasol bihain narapela gen bai i kam na pulim na inap mak olsem 10-pela lain olgeta bai ritim wanpela Wantok niuspepa. Dispela i soim olsem Wantok i gat planti manmeri i save laikim long ritim.

Wantok i luksave tu olsem ol pipel bilong em, em ol manmeri bilong ples, ol bas na PMV draiva, ol kapenta, mekenik, plama na ol manmeri we skul bilong ol i kamap mak long gret 10. Wanwan wokmanmeri bilong opis i save ritim Wantok.

Wantok i bin stat long 1970, Ogas 5 long Wiru ples long Wewak we olpela Katolik Asbisop Leo Arkfeld i bin statim pepa ya long Wiru. Ol Edita i bin go pas long lukautim na ronim Wantok niuspepa i kam em, namba wan man o Edita em Pater Frank Mihalic, Pater Jim Frank, Anna Solomon nau em menesa bilong kampani, Joe Kau, Francis Uliau, Leo Wafiwa na mi yet Yakam Kelo.

Nau yumi tingim na makim dispela 30 yia bilong Wantok Niuspepa insait long Papua Niugini, em i wanpela tok pisin niuspepa we i save kam aut long olgeta Fonde na go long olgeta hap provins bilong Papua Niugini. Em i olsem wanpela niuspepa bilong kantri bikos em i gat nius bilong olgeta provins. Nius long ol wok bilong Gavman, ol wok na projek i kamap long wanwan provins na rijon, o wanem hevi i kamap, ol nius long kainkain pilai spot, ol tok pilai olsem Toro, Biabia na Kanage na ol nius i kam long ovasis tu.

Wantok i gat foapela fultaim wokman. Ol em Veronica Hatutasi bilong Bogenvil, Wenceslaus Magun bilong Madang, Henry Morabang bilong Madang na Yakam Kelo bilong Morobe provins.

Wantok i gat tupela susa niuspepa tu. Tupela em The Independent niuspepa na PNG Business niuspepa long tok Inglis. Tripela niuspepa wantaim i stap aninit long kampani bilong Word Publishing na planti i save pinis o planti i no save yet, dispela em kampani bilong Katolik, Luteran, Engliken na Yunaitet Sios insait long Papua Niugini.

Wantok i amamas na tok bikpela tenkyu long gutpela sapot yupela ol manmeri i bin givim long stap klostu na sapotim pepa long bipo yet i kam inap long dispela 30 krismas bilong niuspepa long dispela yia 2000. Dispela sapot bilong yupela inap strongim mipel ol wokmanmeri bilong Wantok long get het yet long wok bilong mipela na niuspepa tu bai i go het yet long givim yu ol gutpela nius na ripot. Ritim long tok pisin em i tru long luksave na tingting i klia gut.

PN printing

For Quality and Service

LEADING PNG IN THE PRODUCTION OF BUSINESS FORMS AND COMMERCIAL PRINTING

Extend Their Congratulations to

WANTOK NIUSPEPA

on its

30th Anniversary for All Your Printing Requirement

KONEDOBU
P.O. Box 633,
Port Moresby
Tel: 321 2277
Fax: 321 2543

LAE
P.O. Box 759,
Lae
Tel: 472 2005
Fax: 472 3448

**RABAU
VUNAPOPE**
P.O. Box 1239, Rabaul
Tel: 982 8433
Fax: 982 8277

GOROKA
P.O. Box 230,
Goroka
Tel: 732 1227
Fax: 732 1046

MT. HAGEN
P.O. Box 1237,
Mt. Hagen,
Tel: 542 1760
Fax: 542 2743

Olpela ripota glasim Wantok Niuspepa

JAMES KILA i raitim

HEPI 30 KRISMAS i go long niuspepa bilong yumi Papua Niugini stret! Wantok Niuspepa.

Bipo mi givim wanem tingting bilong mi, mi laik askim, long wanem mining bilong ol dispela, "Political Integrity, Stabilization na Corruption."

Ol skul manmeri bai save, tasol sore tru, ating ol lapun o ol liklik man long ples insait long ol eria olsem olsem Karamui, Telefomin o as lain long Manus em Mbuke bai ino inap save long mining bilong dispela tok.

Mi ken tok klia olsem nau yet Wantok i mekim bikpela kain tok i go daun na ol lapun o ol liklik manmeri long ples bai ken save long mining bilong en. Dispela eksampel mi givim em wanpela bikpela wok Wantok i save mekim.

Em i kisim ol stori o nius na mekim i go ples-klia na ol liklik manmeri long viles o hauslain i ken save. Gut wan Wantok.

Bihainim bikpela tingting bilong Pater Frank Mihalic long kirapim dispela niuspepa long 1970 long sevim ol liklik manmeri insait long Papua Niugini, planti ol gutpela samting tru i bin kamap long bringim nius na ol toksave i go long ol pipel.

Olsem wanpela nius-ripota husta i wok samting olsem 8-pela krismas wantaim Word Publishing Company, em mama kampani bilong Wantok mi skelim olsem dispela rot bilong bringim nius igo long ol liklik manmeri bilong yumi long viles komyuniti em bikpela samting tru.

Ol liklik manmeri long ol viles na

haus-lain i mas save long wanem samting i kamap insait long kantri na go wantaim dispela developmen long sait bilong gavaman disisen, ekonomi na tu long sosel o komyuniti sindaun.

Yes, mi ken tok olsem planti ol gutpela ripota nau long kantri i bin statim wok bilong o keria bilong ol wantaim dispela niuspepa. Em i helpim ol yangpela ripota long save gut long wok bilong ripotim nius na bringim infomesin i go long ol pipel bilong yumi.

Wantok i helpim ol liklik manmeri tru long save gut na glasim sindaun bilong ol yet insait long dispela bikpela komyuniti bilong yumi em Papua Niugini.

Nau yet yumi ken tok olsem em i ol yia bilong infomesin na komyuniti, tasol long bringim ol toksave na ripot long wanem ol kain samting i kamap insait long sait bilong gavaman, ekonomi, sosel na tu long sait bilong developmen insait long PNG, yumi nidim wanpela kain tul o midium long mekim dispela.

Planti i ken tok olsem em ol yangpela bilong Papua Niugini i go long bikpela skul na yunivesiti, ol skul na gat moa save long rit na rait long Inglis. Tasol, yumi mas noken lus tingting long dispela bikpela tok em Tok Pisin.

Tok Pisin i bin helpim Papua Niugini gut tru long kisim Independens na tu long bringim developmen i go insait long ples na haus-lain bilong planti manmeri tru long kantri. Olsem na nau yet dispela bikpela wok Wantok i mekim i surukim yet as tingting long bringim infomesin na nius i go long ol liklik manmeri long ples.



• Tony Pesiana (hankais), lamo Raga na Limbo Basave, printing menesa lukluk long Wantok we i kamaut nau tasol long masin.

Niuspepa i bringim kam long yumi nius long wanpela toktok we olgeta manmeri long PNG i ken luk-save long em.

Long ol dispela 30-pela yia, em ino save bringim nius tasol em save halivim long lainim ol manmeri long lukautim pasin tumbuna bilong ol. Tok pisin em wanpela tok ples we ol manmeri bai nap long harim na toktok long wanem dispela kantri igat 700-pela tok ples long em.

Caritas PNG i laik givim bikpela tok tenk yu long Word Publishing na Wantok Niuspepa long ol stori em save raitim. Na long dispela taim we igat planti manmeri husat i no save long long rit na rait, em gutpela long igat wanpela niuspepa husat inap long tokim ol manmeri long ol stori iwok long kamap long PNG na wol. Ol manmeri save ridim Wantok na save toktok long ol stori save kamap na dispela em gutpela along wanem ol manmeri husat no save long rit na rait bai nap long harim ol stori na long dispela wei bai olgeta manmeri nap save long ol wanem-samting wok long kamap long PNG.

Long dispela toktok Caritas PNG i laik tok bikpela tenk yu na amamas long Word Publishing na Wantok Niuspepa long 30 yia bilong ol wok bilong ol.


Tok Pisin i senis

OLSEM wanpela niuspepa insait long Papua New Guinea husat save raitim Tok Pisin, Wantok Niuspepa i save raitim ol kain stori ol manmeri save laikim. Olsem ol manmeri husat save toktok long tok pisin, yumi ol manmeri bilong Papua New Guinea save amamas long ol pasin tumbuna bilong yumi, wei ol manmeri save tingting na wei ol save toktok.


Long ol provins olsem Madang, wantaim ol planti tokples bilong ol long kantri, tok pisin tasol em wei bilong ol manmeri long PNG long toktok wantaim. Tok pisin i wok long senis long ol yia igo pinis na ol yia bai kam. Long ol memba bilong palamen igo long ol gras ruts, tok pisin i kisim niupela stail.

Ol lapun long peles save toktok yet long tok pisin bilong bipo na ol manmeri save singautim olsem "tru tru tok pisin". Na planti husat i stap long ol taon o siti save kisim ol niupela toktok long wokim ol toktok bilong ol bai stretlong save bilong ol.

Long nau yet kantri bilong yumi wok long kamap narakain na ol pasin bilong ol wanwan manmeri i wok long senis, na tok pisin i wok long senis, tu. Long ol manmeri husat save toktok long tok pisin, yumi mas tok bikpela tenkyu i go long Wantok Niuspepa long stail bilong em na wei em save presentim em yet olsem tok tok bilong ol manmeri. Na tu yumi mas amamas long wanem Wantok



• Sir Michael Somare i lukluk long ol masin bilong printim niuspepa taim em i opim nupela fektori bilong Word Publishing Company long 1983. Guba Vai i soim ol hau masin i wok.



• Brian Namiat bilong Is Sepik namba tu editor bilong Wantok long 1975.

Hastings Deering



Congratulates

**WANTOK
NIUSPEPA**

on Their

30th Anniversary

Hastings Deering





FOR SALES AND ENQUIRIES

Port Moresby
Phone: 325 6422
Fax : 325 0774

Tabubil
Phone: 548 9045
Fax : 548 9155

Lae
Phone: 472 2355
Fax : 472 1477

Rabaul
Phone: 982 1244
Fax : 982 1129



Laip bilong Wantok long buk bilong

DE em 5 Ogas, 1970. Namba wan Wantok i kamap. Pepa i no bikpela olsem bilong tude, i gat 20 pes, i gat narapela kain prin long en na ol edvetismen i stap wantaim na karamapim 7-pela pes.

Long fran pes i gat wanpela bikpela poto i soim wanem samting i kamap long kantri. Dispela fran pes poto i soim wanpela provinsal gavman kibung, ol nes long yunifom i stap long klasrun, wanpela fama i brukim drai kokonas bilong wokim kopra, wanpela naispela bebi, wanpela lokal helt teknisien long ples bilong wok, wanpela seveya i glasim mep bilong Papua Niugini na ol pipel i rausim lip bilong ti long Hailans.

Wanpela Olympier letrik taipraita i raitim olgeta toktok long pepa. Tupela pes bilong pepa i stap long tok English bilong amamasim ol lain husat i ken ritim.

I gat sampela arapela poto tu i stap. Planti em bilong olupela edministreita, Hay, husat i laik lusim kantri, poto bilong tripela soldia i kisim sevis medal, Praim Minista Gorton bilong Australia na minista memba Mathias Toliman bilong Rabaul.

Tripela namba wan pas i go long edita i amamasim namba wan Wantok niuspepa, Dispela ol pas i kam long spika biong Haus ov Asembli Honerebel John Guise

(Sir), Bisop Simon Gaius bilong Yunaited Sios na Bisop Zibang Zurencuo bilong Luteran Sios.

Ol lokal nius i toktok long Mataungan Asosiesen bilong Gazelle Peninsula, indai bilong kaunsil bilong Gazelle Peninsula, Thomas To Bunbun, nupela edministreta, stori bilong Niugini Nius sevis, stori biong Pater Nilles, SVD, winim sia bilong Simbu long Haus ov Asembli, Sir John i wari long graun, wanpela spes bilong YC (yangpela kristen), wanpela pes bilong helt nius, limlimbur bilong Praim Minista

Gorton i go long Niugini na ol Komonwel gem long Edinbag.

Ol lain husat i bin putim namba wan edvetismen long pepa em TAA (Trans Australia Airlines, Tang Mow, Wewak Pharmacy, Breckwoldt, Wirui Pres, Wirui Store, Edwards Dunlop bilong Brisben, Canvas na Cordage bilong Rabaul).

Wantok i bin prinim namba wan 20,000 kopi. Na prais bilong pepa long dispela taim em 10 cents long wanpela. Na long amamasim dispela namba wan pepa, bikpela bung i bin kamap long 5 Ogas long 10 kilok moning. Spika bilong Haus ov Asembli yet long dispela taim, Honerebel (Sir) John Guise i bin kamap.

Sir John i kisim balus long Mosbi

na pundaun long Wewak. Dispela bung long tingting bilong em bai stap olsem wanpela bikpela stori bilong bipo.

Bisop Leo Arkfeld i blesim Wirui Press bilong en na ol opis bilong mipela long narapela sait tasol. Ol lain husat i bin kamap tasol em ol lokal gavman opisa, Frank Mihalic, edita Ray Goodey na meri bilong en na ol 6-pela wokman na meri bilong niuspepa.

Wanpela lain grup meri bilong Yarapos Haiskul i kamap na kisim sans bilong lukluk raun long opis.

No gat wanpela bikpela tok save o nius i bin kamap long dispela bung bilong makim namba wan Wantok niuspepa. Lokal redio stesin tasol bilong Is Sepik i bin putim liklik long nius. Olgeta narapela niuspepa i ting olsem dispela samting i no bikpela na bai i nogat nem.

Tupela yia bihain

Long pinis bilong yia 1970, namba bilong Wantok niuspepa em ol pipel i baim na kisim i go antap long 4000. Long 1972, Pater Frank Mihalic i kisim wok olsem edita, pablisa na menesa.

Namba wan samting em niuspepa i no inap winim long dispela taim em lokal peris pipel. Mipela i ting olsem ol pipel bilong lokal



• Papa bilong Wantok, Pater Frank Mihalic sekim pepa we i kamaut long printing masin.

peris yet bai gat laik long ritim niuspepa na save long wanem samting i wok long kamap insait long kantri. Tasol dispela ino karim kaikai. Ol pipel i no gat laik long baim na ritim niuspepa Olsem na namba bilong ol pepa em mipela i salim i sutnus i go daun.

Dispela i mekim na planti lain bilong lukautim ol bukwok i givap. Ol i les na i go. Mipela i traime long ol stua tu. Tasol namba bilong ol niuspepa ol pipel i baim i stap daunbilo yet. Mipela i traime long salim ol niuspepa long ol maket na stat long pulim nau ol pipel. Mipela i laik traime long ol praimer skul tasol edukesen dipatmen long dispela taim i strong tru long tok Inglis. Olsem na ol tisa i pret na tok nogat.

I go na namba bilong ol Wantok niuspepa em mipela i salim i go antap. Bikos mipela i kisim nau ol ovasis kastama Long dispela taim tu, tupela niuspepa bilong Rabaul na Mosbi i egensim mipela. Tasol nem bilong Wantok i kamap

bikpela wantaim helpim bilong ol bukstua.

Long Katolik graun bilong mipela yet, ol misin i no wanbel. Bikos mipela i no stap olsem Katolik niuspepa tasol. Nogat. Mipela i karamapim olgeta kain nius bilong Papua Niugini ... tasol wok bilong sios na kristen bilip ... ol misineri bilong mipela i no luksave long dispela. Sapos wanpela pris i apim nem bilong Wantok Niuspepa long peris nius, em nau mipela bai salim moa pepa.

Wanpela samting em i pulim ol rida em pas i go long edita pes... ol pipel i laik lukim nem bilong ol i stap long pepa...na toktok na autim tingting bilong ol long wanem samting ol gat laik o i no wanbel long en...na bihain ol i save belhat na wari tru long we em ol narapela i daunim poin bilong ol. Mipela i traime kamapim ol kainkain resis. Tasol bihain liklik, ol pipel i les na mipela i rausim bihain long namba 4 taim.

Olgeta lain i laik win...Na taim



• Ol narapela susa niuspepa bilong Wantok em PNG Business na Independent.



ELECTRICAL CONTACTORS (A National Owned Business Co.)

- Emergency (Troubles)
- Maintenance
- Installations
- Alterations
- Additions

Free Quotations

Always Ready to serve you 24 hrs a day

- Appliances Repairs
- Hot Water Systems
- Wiring
- Lighting

Congratulates

Wantok Niuspepa on its 30th Anniversary.

P.O. Box 7179, Boroko, Varahe Road, Gordons
Phone: 325 6014 Fax: 325 5105

Frank Mihalic

dispela tingting bilong ol i no karim kaikai. Ol i givap. Hevi i kamap long ol lain longwe olsem long Bogenvil husat i stap insait tu long resis.

Mipela i no putim tumas wol nius insait long pepa long dispela taim. Pepa i save pinis hariap tru long wanem provins i gat planti nius insait long pepa. Mipela i no gat ol nius ripota long ol provins o ol narapela lain i wok long mipela. Planti taim, mipela i save tanim nius bilong Pos Kuria long Inglis i go long tok Pisin. Bikos mipela i save kamap long olgeta fotnait na i no save kisim ol strongpela nius. Strongpela nius bai luk lapum taim em i kamap long hap em i laik sutim bel bilong ol pipel long en. Wanem samting mipela i save mekim long dispela taim em long tanim strongpela nius i go long tok Pisin wanem kain provinsal na nesenel nius em i gutpela na mipela i ting ol tok Pisin rida i no save yet long en.

Wanpela gutpela ples bilong mipela tru long kisim ol Gavman na ovasis nius em long Gavman opis bilong Infomesen an Ekstensen Sevies (DIES). Na mipela i save helpim ol long autim nius bilong ol i go long pablik. Olsem na ol i save givim mipela planti kopi na mekim ol wok i isi liklik.

Long dispela taim tu, lo bilong Pos Opis na takis bilong prinim ol samting i antap moa. Olsem na mipela i traim long tanim het bilong ol poltisen long senisim dispela lo. Tasol dispela i no kamap. bikos em i no bagarapim pipel na wanem ol lain insait long kantri. Hevi i bilong Pos Kurio na Wantok niuspepa tasol. Olsem na taim Sir Julius Chan i kamap Fainens Minista, em i givin sampela tausen kina bilong helpim mipela long salim niuspepa i go long ol rurel eria.

Bikos dispela ol lain pipel i mas save long wanem senis na bikpela samting i kamap long kantri.

Long namba wan taim, i hat liklik long kisim ol edvetismen. Bikos mipela i no salim inap pepa. Na tu planti bisnis i stap long han bilong ol waitman na ol i no save ritim tok Pisin. Sampela bilong ol tu i no laikim tumas dispela tok ples. Ol palisiti opisa bilong ol bikpela kampani olsem BP na Steamships kampani na ol liklik han bisinis bilong ol i gat tingting olsem ol lain husat i save ritim tok Pisin bai i no gat inap mani bilongh baim ol bikpela masin na kago, ka na ol trak em ol i putim long edvetismen. Maski mipela i tokaut long givin fri sevis long tanim toktok. Long dispela taim, wanpela misin woka bilong Australia bin lukautim advetismen wok bilong pepa. Na



• Taim Wantok i bin stat, i bin hat long kisim ol advetismen. Tasol long wantaim ol selsman na meri Wantok i save kisim sampela Advetismen long olgeta wik.

em i save mekim ol dispela wok long Wewak yet. Em i no save long wanem samting i kamap long hetkwata bilong kampani long Mosbi.

Mi ken tingim yet taim advetaising menesa bilong Singer masin bilong smapim klos i save kisim batus long Melbon na flai i kam long Mosbi olgeta yia bilong baim hap spes bilong putim edvetismen long olgeta yia.

Mipela bai sindaun na tanim ol toktok i go long tok Pisin. Em i tok Wantok niuspepa i save helpim em tru long salim masin bilong kampani long smapim klos (800 pesen). Isi isi, ol lain bilong gav-

man i stat tu long putim ol edvetismen bilong ol. Planti i save kam long ol lain bilong kot long senis long lo na kot em pablik i mas luk-save long en.

Mipela i traim tok save long ol lida olsem bikpela namba bilong ol pipel long Papua Niugini i no save ritim samting long Inglis.

Na sapos ol i laikim pipel long luksave tru long ol senis na bikpela samting i kamap long kantri, Wantok em niuspepa bilong mekim dispela kain wok. Tasol long dispela taim, planti opisa na bikman i bosim ol opis em ol waitman na planti Papua em ol wait-

man skulim ol. Olsem na ol i tingting tumas long dispela.

Wantok Niuspepa i win tru

Namba wan taim tru planti i luk-save nau long helpim bilong Wantok em long taim bilong ileksen.

Em nau, olgeta kendidet bilong Niugini sait i laik grisim ol pipel. Na long mekim dispela, ol mas sutim bel bilong ol pipel long tok ples em ol pipel yet i ken ritim gut tru na save long en. Olgeta i ron i kam long Wantok niuspepa. Mipela i tanim ol toktok i go long tok Pisin.

30th Anniversary Congratulations, Wantok



Divine Word University in Madang would like to congratulate *Wantok Niuspepa* for its 30 years service to Papua New Guinea. The newspaper has a well-earned reputation for setting high journalistic standards and brings up-to-date and accurate information to thousands of Tok Pisin speakers across the country.

Fr. Frank Mihalic SVD, founder of *Wantok*, made an important contribution to Divine Word University. Many journalism students learned their skills from him and benefited from his many years' experience. He has written books as well, some published by the DWU Press, including *Readings in PNG Mission History*, *1000 Stories You Can Use, Volumes 1 and 2* and *Enga Jubili*. Last year the University's Communications Art Department created an award for the top journalism student in honour of Fr. Mihalic and is proud to send special congratulations to PNG's most widely read newspaper.


Aburusion tupela tan na faipela yia
MVIL e helpim ol Papua Niu Gini
manmeri bihain lon ol kisin
bagarap lon ol rot akident taim ino
asma bilong ol.

MVIL i tok hamamas lon wantok
niuspepa lon tripela tan yias lon
futpela na tru nius ripot blon ol.

Yumi bung wantaim na bai yumi
promotim sefti lon ol rot bilong
yumi.



LUSHIP



MINIGULAI TWICE WEEKLY PASSENGER SERVICE

Lae - Kimbe - Rabaul - Kimbe - Lae

MONDAY

DEPART LAE 1500

TUESDAY

ARRIVE KIMBE 0600

DEPART KIMBE 0800

ARRIVE RABAU 1600

WEDNESDAY

DEPART RABAU 0800

ARRIVE KIMBE 1600

DEPART KIMBE 1800

THURSDAY

ARRIVE LAE 1900

FRIDAY

DEPARTS LAE 1500

SATURDAY

ARRIVE KIMBE 0600

DEPART KIMBE 0800

ARRIVE RABAU 1600

SUNDAY

DEPART RABAU 0800

ARRIVE KIMBE 1600

DEPART KIMBE 1800

MONDAY

ARRIVE LAE 1900

ECONOMY CLASS <MEALS INCLUDED> TOURIST CLASS

Tickets available at LUTHERAN SHIPPING'S Wharf - Voco Point

Phone: 472 2066 Facsimile: 472 5806

Ticket available at METRO TRADING Kimbe

Phon: 983 4278 Facsimile: 983 5332

Tickets available at COASTAL SHIIPPING Rabaul

Phone: 982 1746 Facsimile: 982 1734



BIKPELA TOK AMAMAS I GO LONG YU "WANTOK"

Long makim maus bilong Lady Veronica, na ol pikinini bilong mi na ol pipel bilong Is Sepik,

Mi salim bikpela tok amamas tru i go long Wantok Niuspepa long amamasim 30 Krismas bilong raitim tokpisin nius na ol stori insait long kantri.

Taim Fr. Frank Mihalic i bin statim dispela niuspepa long Wewak long 1970, Mi wantaim ol narapela ol lida i wok hat tru long bringim Papua New Guinea i go long kisim Independence long han bilong ol Australia. Bikpela wok Wantok Niuspepa i bin mekim long dispela taim em long tokaut stret long ol man meri long wanem samting em i independence na wanem samting em mama lo bilong kantri.

Nau Wantok i gat 30 Krismas na em i wok long mekim nambawan wok yet long lainim gut o grasruts manmeri. Em i wanpela niuspepa tu planti man i save laik ritim long lainim gut tok pisin. Wantok em wanpela niuspepa we planti ol grasruts manmeri i save givim tingting bilong ol long ol kainkain samting olsem politiks, laipstail na ol kainkain wari bilong ol long olgeta dei.

Wantok bai strong yet long ol yia i kami

M. T. SOMARE GCMG CH
Membra bilong Is Sepik na Minista
Bilong Mining na Bogenvil Afeas



SHAMROCK
PRINTING SUPPLIES LTD

As a supplier of Printing Supplies to
Word Publishing
we wish to congratulate the

WANTOK NIUSPEPA

on its

30th Anniversary

and trust it continues the good work it
has been doing for the
last 30 years.

P.O. Box 610, Archerfield 4108, Qld. Australia.
Phone: 617 3344 3100, FAX: 617 3344 3116



WANTOK
30 YIA NAU

pes 10 Ogas 31, 2000 WANTOK

Bungim ol poro bilong yu long Wantok

THEO THOMAS i raitim

LONG Papua Niugini, i no gat wanpela niuspepa em bilong ol Papua Niugini stret. Wantok Niuspepa em wanpela niuspepa tasol we ol i wokim bilong halivim ol liklik manmeri long save long ol nius we i save wok long kamap long PNG na tu long ovasis.

Long dispela yia, dispela Niuspepa Bilong Papua Niugini Stret i selebretim 30 krismas bilong en na long tamblo bambai yu ritim ol stori na tingting bilong sampela ol wokman bilong dispela niuspepa.

Wenceslaus Magun

OLGETA manmeri bilong dispela kantri i mas i gat sampela kain rot bilong harim, ritim na luksave long ol samting we i kamap long gavman long PNG na long ovasis long sait bilong ol pilai, ron bilong gavman, ol lotu na ol arapela kainkain samting olsem.

Taim ol manmeri maski ol i gat bikpela sku! o ol gras rut i save long ol kain samting olsem, dispela i bai halivim ol long stretim sindaun bilong ol long ples na tu long luksave long wanem kain ol samting i wok long kamap.

Dispela em tingting bilong ripota bilong Wantok Niuspepa, Mista Wenceslaus Magun.

Mista Magun tok Wantok Niuspepa husat i save raitim ol stori long Tok Pisin i save wokim bikpela wok long wokim bambai ol gras rut o ol liklik manmeri i ken save long wanem ol samting i wok long kamap insait long PNG na long ovasis na em i amamas olsem em i wok wantaim dispela niuspepa.

Mista Magun husat i joinim Wod Pablisng long 1997 tok taim em stat wok, Wantok Niuspepa i bin gat wanpela ripota tasol - em Yakam Kelo, Edita bilong Wantok. Olsem na ol i askim em long go wok long hap.


Em tok long tingting bilong em yet, em i no bin laik go wok long Wantok bikos em ting olsem sapos em wok long ap em bai lus tingting long rait gut long Inglis na tu planti lain i mas gat tingting olsem Wantok i no kain pepa bilong ol saveman meri.

Tasol bihain em bihain em skelim dispela wok go na lukim olsem dispela wok em mas wanpela singaut bilong God long em.

"Mi lukim go na mi ting ating dispela em mas singaut bilong God long mi long raitim ol stori bilong ol gras rut manmeri," Mista Magun tok.

Long nupela yet, em i savewokim ol stori bilong ol provinsef nius, laipstail, na ol stori bilong lotu.

Tasol Wantok Niuspepa i nogat planti ripota olsem na em i save halivim tupela wanwok bilong em long kisim ol stori bilong ol narapela hap bilong Wantok Niuspepa olsem ol stori long politik, Madang Nius na ol pas i kam long ol pipel.



Mista Magun tok long nau we Wantok Niuspepa i selebretim 30 krismas bilong en, ol lain husat i bin kirapim dispela pepa i mas amamas.

Em tok ol lain husat i bin wok bipo na long nau olsem ol ripota, edita, no ol memba bilong bod i mas amamas long wok ol i wokim long karim dispela pepa i kam inap nau.

Long wokim bambai pepa i ron yet na stap strong, menesmen i mas wok hat long wokim bambai pepa i ron gut.

Tu em tok sapos yu wanpela man or meri husat i save ting olsem ol lain husat i wok long Wantok Niuspepa i no save wok hat long painim nius na i save stap tasol long tanim tok long Inglis i go long Tok Pisin, tingting bilong yu i no stret.

Dispela em bikos ol lain husat i wok long Wantok Niuspepa olsem ol ripota i save taitim bun tru bilong ol long painim ol nius na i no save wet tasol long tanim ol toktok long Inglis i go long Tok Pisin.

Dispela em toktok, wanpela ripota bilong Wantok Niuspepa, Wenceslaus Magun i bin tok.

"Yu husat man o meri wantaim kain tingting olsem i traim na luksave olsem mipela ol ripota bilong Wantok i save wok hat tru long painim ol nius," em tok.

"Planti taim mipela i save raitim ol stori we ol narapela niuspepa o redio o TV i no ronim na dispela i soim olsem mipela i no save sindaun nating na wet tasol long tanim tok Inglis i go long Tok Pisin."

Mista Magun i marit na i gat wanpela pikinini man na em bilong Madang provins.



Jada Wilson

SAPOS yu wanpela man husat i save kilim skin long lap taim yu lukim ol pani stori na piksa bilong Biabia, Tambu Toro na Kanage na save traim long save long man husat i save droim ol dispela pani piksa, orait nau mi ken tokim yu long man husat i save brukim baksait bilong em long wokim bambai sait bun bilong yu i lus.

Man ya em Jada Wilson. Jada i bin joinim Wok Pablisng long 1979 na nau taim Wantok selebretim 30 krismas bilong en, Jada bai selebretim 21 krismas bilong em wantaim kampani.

Jada i no bin go long skul long lain long dro. Save bilong em long dro em samting em yet i lainim long taim em i stap liklik mangi yet.

Dispela save bilong em i wokim na taim em i pinisim taim bilong em long Boys Town aninit long lukaut bilong Pater William Liebert, Pater i wokim rot bilong em long joinim Wok Pablisng.

Dispela wok olsem man bilong droim ol pani piksa em Jada i holim i stap i kam inap nau.

Tasol ol piksa Jada i droim i no save kamap tasol long Wantok niuspepa. Han mak bilong em i stap pinis long olgeta hap bilong Pacific na graun tu.

Sampela ol bikpela megasin em yu ken lukim i gat ol piksa we Jada i droim em Pacific Islands Monthly, Financial Review na Pacific Business Monthly.

Sampela ol bikman husat Jada i wokim piksa bilong em Sean Dorney, niusman bilong ABC husat i bin stap long-pela taim tru long PNG, Australian Ai Komisina David Irvine na ol arapela bikman olsem.

Sapos yu skelim wok Jada i save wokim na tingting tu long ol han mak bilong em we i stap nau long olgeta hap kona long graun, yu bai ting ating Jada em wanpela bikman tru.

Tasol nogat. Jada em wanpela gutpela man we olgeta lain wanwok bilong em i save amamas long stap wantaim. Em i nogat kros na man bilong tok pilai na lap tumas.

Olsem na tingtim, sapos yu kilim Jada long wanpela pani stori, noken kirap nogut sapos yu lukim stori bilong yu long Kanage, Toro o Biabia. Baga nogut em resa ya.

Jada i marit na i gat tupela pikinini na em bilong Rigo.

Veronica Hatutasi



"Mi amamas long stap olsem wanpela ripota bilong Wantok we i wanpela Tok Pisin niuspepa bilong wanem mi ting mi i save halivim ol gras rut lain bilong mipela husat i no save long rit long Inglis long save long nius i kamap insait long PNG na tu long ovasis."

Dispela em hap toktok, Vernica Hatutasi, nara-pela ripota bilong Wantok Niuspepa i tok.

Veronica tok long wankain taim we mipela i bringim nius i go long ol pipel, mipela tu i wokim ol i lap na amamas long ol pani stori bilong mipela.

Veronica i bin joinim Wok Pablisng long 1993. Em tok taim em joinim, kampani i bin askim em long kamap olsem wanpela ripota bilong Wantok na long sem taim tu ripot long ol samting we i wok long kamap long Bougainville.

Em tok em i no gat save long rait long Tok Pisin taim em i stat tasol taim em wok i go, em i pilim wok i no hat tumas na long nau em painim olsem raitim ol stori long Tok Pisin i Waikai bilong em tru.

Vero tok em pilim olsem wok Wantok Niuspepa i save wokim i bikpela tru bilong planti ol manmeri bilong mipela i no save gut long rit na klia long Inglis.


"Bihain long 30 yia, namba bilong ol manmeri husat i no save long rit na rait i stil stap antap yet na mi bilip olsem Wantok Niuspepa i gat bikpela wok yet long kantri long skulim, amamasim na halivim ol manmeri long klia long ol samting we i kamap long gavman bambai ol yet i ken skelim sapos wok na desisen gavman i wokim i gutpela-o nogat," Veronica tok.

Veronica tok tu long nau we edukesen dipatmen i wok long wokim ol rifom we i kamapim ol elementeri skul, planti ol tisa bilong ol dispela skul i save statim wok bilong ol long Tok Pisin, na long dispela sait, em pilim olsem Wantok tu i wok long halivim edukesen bilong kantri.

Em tok em i amamas long wok wantaim tupela wantok bilong em, Edita, Yakam Kelo na ripota Wenceslaus Magun bilong wanem maski ol tripela tasol, ol i save gut tru long wanem kain wok ol i mas wokim na tu long taim wanpela i no save stap, ol yet i save skelim wok long halivim ol yet.

Veronica bilong Not Solomons Provins na i marit wantaim faipela pikinini.

CARITAS PAPUA NEW GUINEA



Caritas Papua New Guinea (CPNG) congratulates Word Publishing Company Limited on the occasion of the 30th Anniversary of Wantok Newspaper.

SPAK!?!
 HUSAIT I TOK MI
 SAVE SPAK?! MIEM
 FADA LONG DRING!

OKE
 OKE
 FADA!

KEBA
 KEBA
 SP CAN

EM!!

!?!

XXX

NETAT
 NIU
 K XE

GO TO BIN
 MARKET!

GO EASY
 ON THEM!

BOOT!!



RESIGN!
 RESIGN!
 QUIT!

HEY SANIBOI! HUSAIT MAN
 I LAIK SALENSIM KANAGE,
 DEAI SALENSIM PAPUA NIU
 GINI... TU SAVE, MILITER
 KU BAI KAMAP LONG PA G!



QUAI/QUAI!
 PLS NI BA-
 GARAP YAH..
 BUAI WE?!




STRONG TRU... OL B.S.P BOYS
 RAF NA BRUKMI LEK BILONG
 SPELA KI-PIWAIA BILONG
 P.N.G.B.C...



NAU OL IKARIM EM I GO AUISAIT
 REBO I NAER TRU...



J A D A



Man bilong droim ol fani pksa
 insait long WANTOK... PA
 olsem To... nage,
 Rebo... laik.
 Hia em ol sampela wok em bin
 mekim long 20-pela yia em i bin
 stap wantaim WANTOK.



GOOD SHOT
 OL... WHEN ARE
 CONNA SEE
 DEVELOPME
 IN MADRIK.

GIVE A KINA FOR OUR COUNTRY

1975-2000



'APPEAL TO EVERY CITIZEN - MEN, WOMEN AND CHILDREN

Papua New Guinea is our home, this year will mark the 25th year of our Independence, our silver jubilee, this land we call our home has given all of us life and carries the memories of our ancestors and the hope of our Children.






What have we given back to our Papua New Guinea?

Now is the time we need to give something back to our Country.

The Media Council of PNG along with other community groups ask you to Give a Kina for our Country, Walk in to any bank in the Country and put your Kina into the collection boxes provided.

It doesn't matter who you are or where you live, if you love your Country, make a difference, Give a Kina for our Country, You can deposit your Kina at any bank in the country. You can make a difference.

With the Support of
MEDIA COUNCIL OF PNG & VARIOUS COMMUNITY GROUPS



OL DIKSA NABAUT

• Leo Wafiwa. Olpela Wantok Edita, nau Leo i lukautim sekulesen wok long Wod Pablising.




Em i Gutpela, Em i Tuna Em i bilong PNG stret...

Congratulates
WANTOK NIUSPEPA
On it's 30th
Anniversary!


- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol.

Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.


- ◆ Prais inap tru long yu baim.




• Issac Ikuavi i sekim filim na bai wasim poto.



• Nicky Bernard i redim kamera bihain long mekim negetiv.



• Thomas Kwimberi i wok long redim ol negetiv long mekim plet.




Ol piksa nabaut




• Francis Ullau, olupela Edita bilong Wantok (wait slot) wantaim ol ripota (hankais i go hansut), Yakam Kelo, Winis Map, Veronica Hatutasi na leiaut atis Geoffrey Kala.




• Edita bilong Independent niuspepa, Fay Duega wantaim ol narapela ripota long niusrum.




• Selina Baewam, wampela meri husat i save putim ol stori na piksa long ol pes bilong niuspepa.



• Judith Sauto, wok long ansarim telepon na tu save helpim Alice long taipim ol stori.



• Alice Gwand, meri bilong taipim ol stori long niuspepa.



• (hankais i go hansut) Priscilla Konalali, Francis Auko, John Opotio, Elizabeth Konga na Janice Dingel. Dispela em ol lain nogut bilong akauns dipatmen.



National Capital District Commission

Welcomes

*You to Port Moresby
the city of opportunity*

*Wokabaut wantaim,
Raka Hebou and
Walking Together
to celebrate PNG's
25th Anniversary*



89.9 93 96 98 100



*i tok hamamas
i go long*

WANTOK NIUSPEPA

*long
30th Anivesari
bilong ol!*

Yumi sanap strong long
tok ples bilong yumi yet!

PNG FM LTD Trading as NAU FM, YUMI FM & TOTAL EVENT MARKETING
P.O. Box 774, Port Moresby Papua New Guinea
Ph: (675) 320 1998 Fax: (675) 320 1998 <http://www.naufm.com.pg>

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.